

NISAMUCU BAMA APOSTOLERRÜ LOS HECHOS

Artri Espíritu Santo rranrtti ayeti usahu

1 ¹Süro tanu nirraquionco aemo naqui Teófilo. Au manu cusürübo niyesa librurrü iconomota nanaiña arrüna nizamutenti y ñanunecacarrti Jesucristo auqui maübo, ²hasta que ñatai manu nanenese anche camperoti tato au napese uiti Tuparrü. Numo anaticui icu na cürrü, manunecanati ui nicusiurrti Espíritu Santo ümo bama nesarrti apostolerrü, bama tacümanauncunu tücañe uiti. Urapoiti isucarüma arrüna yachücoboiboma. ³Numo tüpasao nitaquisürücürri, süboricoti tato, itusiancanatiyü isucarüma. Cuarenta naneneca nacarrti aübuma. Sane nauquiche tusio nurria ümoma, ta süboricoti tato, y tacane urapoiti isucarüma causane arrtü üriabucati Tuparrü eanama icu na cürrü.

⁴Nauquiche anancatiqui ichepema, nanti ümoma:

—Tapü amecatü auqui Jerusalén. Aparrüpera cheperrtü cocono arrümanu nurarrti Iyaü, que artri Espíritu Santo cuati ñana aume. ⁵Tai ñemanauntu, artri Juan tücañe maunimianati aume eana turrü —nanti ümoma—, pero ta chübubiuquipü cuantio naneneca arrüna anche ayeti Espíritu Santo au nabausasü. Tone caüma arrüna nabüriqui tato.

⁶Ñanquitioma ito pünanaquiti, namatü:

—Señor, ¿taqui auquito caüma taesüburu tato obi arrüna sobesa cürrü Israel pünanaqui bama rromanorrtü, nauqui yüriaburrücü suiñemo?

⁷Iñumutati Jesús:

—Chümopü atusi aume arrüna sane. Artri Tuparrü naqui uiche uraboiti anche. Itopiqui artri ane nüriacarrti. ⁸Pero arrtü cuati Espíritu Santo au nabausasü, torrio aume abüriacabo, na amenotü apanitane nisüri, auna Jerusalén, auna cürrü Judea, au cürrü Samaria y au nanaiñantai icu na cürrü.

Artri Jesús süroti tato au napese

⁹Numo chauqui arrüna nurartri ümoma, isucarüma nurria iquiamperotiyü, niyücürtri tato au napese. Auqui cuatü taman cüsaüborrü taburriuti uirri. Auqui champürtrü asaramatiqui tato. ¹⁰Nauquiche amoncomainqui arrtayomatü isiuti Jesús niyücürtri tato au napese, auqui paecüburuma esama torrü mañonünca, purusubi naibirrimia. ¹¹Namatü ümoma:

—Arraño auqui Galilea, ¿causane süsio año amarrtaiquiatü icu napese? Artri Jesús süroti tato au napese amopünanaqui. Pero ta, cuati tato ñana tacana arrüna amarrtaiquiatü isiuti.

Tacümanauncunuti Matías itoboti Judas

¹²Auqui süroma tato au Jerusalén onüqui manu yiriturrü nürirri Olivos. Tamantai kílometro nichequirri auqui manu.

¹³Nauquiche tiñataimia tato taha, süroma ape au manu quiatarrü piso nesa manu porrü auna cauta nantarrü iyoberabaramacü. Arrüpecuma anancati Pedro, artri Jacobo, artri Juan, artri Andrés, artri Felipe, artri Tomás, artri Bartolomé, artri Mateo, artri Jacobo aütorrti Alfeo, artri Simón naqui auqui manu partidorrü nürirri cananista, y artri Judas yaruquitorrti Jacobo.

¹⁴Arrüma iyoberabaramacü nantarrü na eama. Amoncoma ito bama yaruquitorrti Jesús, nipiácütoti y arrüba piquiataa paüca.

¹⁵Au manio naneneca artri Pedro atüraitü cümüinata manuma amoncoma acamanu, taqui ciento veinte nubiquirrimia, nanti ümoma:

¹⁶—Masaruquitaquí, chauqui tücocono arrümanu turapoiticaü Espíritu Santo turuquiti yüriaburrü David. Ta maconomonoti tücañe sane icu Nicororrü icütüpüti Judas, naqui cusürüboti tücañe aübu manuma uiche aiñenomati Jesús. ¹⁷Artri Judas tücañe tacümanauncunuti ochepe, y tacane torrio ito ümoti arrüna trabacorrü usaca aübu. ¹⁸Pero artri macomporarati cürrü ui manu monirri torrio ümoti itobo na churriampatai yachücoiti. Taha paquioti cusürübo nitanurrti acü. Poboti, cuantio tanene nanterererrti. ¹⁹Numo tütusio ümo bama auqui Jerusalén, iñatama üribo manu cürrü Acéldama. Nantü auqui nurarrümantoe: “Cürrü auna cauta arapara notorrü.” ²⁰Itopiqui icu manu Nicororrü niyobesa Salmos nantü sane:

Tari cücheca nicürtri y tapü anati naqui vivibo acamanu. Ane ito corobo sane:

Tari ñatoconati quiatarrü aübu nesartri cagorrü.

²¹'Aboma auna uyarrüpecu bama amoncomantai ochepe enterurrü manu tiemporrü nuñame ichepeti Señor Jesús, ²²auqui numo ürioti uiti Juan hasta numo camperoti au napese. Sane nauquiche urria artrü tamanti uturuquimia iñanatiyü ochepe na uraboitito, que süboricoti tato Jesús, itopiqui asaratiti ta süboricoti.

²³Auqui nombraboma bama torrü uimía: Arrti José Barsabás nürirrtito Justo, y arrti Matías. ²⁴Meaboma sane:

—Señor, arrücü asuputacai nausasü macrirrtianuca, aitusiancarrti suisucarü quiti naqui uturuqui bama torrü urria au naquionco, ²⁵nauqui asuriuti nesarrti cargorrü Judas tücañe numo apostoltiqui. Pero churriampataito yachücoiti, sane nauquiche tanati taha auna cauta nipenequirrti.

²⁶Auqui suerteaboma uimía. Tocabo ümoti Matías. Auqui manu nanenese iñanatiyü ichepe manuma once apostolerrü.

Niyequirrti Espíritu Santo

2 ¹Iñatai manu nanenese Pentecostés. Namanaiña bama icocoromati Jesús iyoberabaramacü taha au Jerusalén. ²Rrepenteatai rabotü süuru auqui napese tacanarrtü arrone maquiütüca fuerte, y cutañarrü au manu porrü auna cauta amoncoma. ³Auqui butusio onü nitanurrüma arrümanio sane tacana nonco pese mochiomancatai. ⁴Enterurrüma süroti Espíritu Santo au nausasürrüma. Manitanama caüma uiti piquiatacatai manitacaca.

⁵Au manio naneneca amoncoma au Jerusalén bama israelitarrü auqui nanaiñantai nacioneca, bama tarucu ñacoconauncurrüma ümoti Tuparrü. ⁶Oncoimia manu nisüurrü onü manu porrü. Ipiacünomacü asaborimia, cütüpürrüma macrirrtainuca. Cütomutañama ui na oncoimia ñanitaca bama ñanunecasarrti Jesús au na nurarrümantoe. ⁷Cütobüsoma, chümarrtacarrüpatai ümoma, namatü ümomantoe: —¿Canapaemo auqui Galilea enterurrüma bama manitana? ⁸¿Causane aipiama anitama nusura? ⁹Auna aboma bama auqui Partia, auqui Media, auqui Elam, auqui Mesopotamia, Judea, Capadocia, Ponto y auqui manu provinciarrü Asia, ¹⁰auqui Frigia y Panfilia, auqui Egipto, y arrüba puebluca abe manrrü tahiqui pürücü Cirene. Aboma ito uyarrüpecu bama auqui Roma bama pohosoma auna. Eanama aboma bama propiorrü israelitarrü y arrübama yasutiumantai nesarrüma religión. ¹¹Aboma ito bama auqui Creta y Arabia. Enterurrü onü oñoncoi nurarrüma auqui na numanitatatoe. Champü causane, iyebo nurria uimía. Urapoimia arrüba nomirria uiti Tuparrü. ¹²Enterurrü cütobüsoma, chümarrtacarrüpatai ñapensacarrüma. Ñanquitioma pünanaquimiantoe:

—¿Isane naca arrüna sane?

¹³Aboma ito bama iyapoimia, namatü sane:

—iOrisübaboma arrümanuma!

¹⁴Auqui atürait Pedro aübu manuma maquiataca once apostolerrü. Fuerte nurria nurarrti, nanti sane:

—Arraño bama mañonünca auqui Judea y arrübama auqui Jerusalén, amonsoi nurria arrüna sucanañü aume. ¹⁵Arrüsomü champürrtü soborisübaca, tacana arrüna napapensaca. ¿Causanempü soborisüba? aübapae ane ape surrü. ¹⁶Más bien arrüna sane ta tone arrümanu turapoiticaü tücañe profetarrü Joel. Nanti sane:

17 Sane nurarrti Tuparrü:

Au nitacüru cuantio naneneca, iñemecata aruqui niyesa Espíritu onü macrirrtianuca.

Arrübama aütorrúma y arrüba nitaquiumucuturrüma ipianacatema ñana arrüna nisura.

Arrübama mayaüca ausüratai ñana arrtaimia auqui na quiatarrü narrtarrüma, y arrübama maporriquia iñunecacama auqui niposiquirrimia torrio ümoma sobi.

18 Au manio naneneca iñemecata ito aruqui niyesa Espíritu onü bama baserebioma iñemo y arrüba paüca paserebio iñemo.

Arrüma caüma ipianacatema nisura.

19 Itusiancaquion ñana ausüratai señarrü icu napese y icu cürrü ito: Notorrü, pese y cüsaüboca tacana nausirri.

20 Surrü ñana rruparrio.

Pama isamunü cüturiqui tacana notorrü, arrtü tüsaimia manu nanenese champü tacanache, arrüna ensümunu uiti Tuparrü.

21 Enterurrüma bama yabiromati Tuparrü nauqui aicocoromati, tonema bama taesüburu ñana uiti pünanaqui carrticurrü.

22'Amonsoi te bama mañoñunca auqui Israel arrüna sucanañü aume: Arraño apiplate nürirrti Jesús auqui Nazaret. Amasaquio ito arrüba milagorrü y señarrü omirriante uiti. Ui arrüna sane tusio que arrti ane nüriacarri uiti Tuparrü. 23Pero arraño nauquiche tütorrioti aume, apitorrimiacati ümo bama extranjerurrü nauqui añanamati apü curusürrü, itopiqui sane ñapensacarri Tuparrü auquiapae. 24Arrti Tuparrü isümoniancanatiti tato, itaesusümunucunutiti pünanaqui concorrü, itopiqui chüpuerurrüpü süsioti coiñoti. 25Ta arrti yüriaburrü David tücañe manitanati icütüpüti Jesús sane:

Arrti Tuparrü anati siemperrü ichepeñü.

Anati auna sane ümo nepanauncu niñe tapü ane ñünanache irru.

26 Uirri ipucünunca au niyausasu.

Sane nauquiche iñanauncati aübu nisura.

Champü causane nirraquionco arrtü isonca.

27 Itopoqui arrti Tuparrü chichetatipü asio niyausüpü esa bama macoiñoca. Chichetatipito apore nisütüpü, itopiqui yaserebiquia ümoti.

28 Uiti isüboriquia tato ñana.

Auqui caüma tarucu nipucünuncu arrtü yasacati.

29'Arraño bama masaruquitaquí, apapensasio nurria arrüna sane. Arrti David chapürrtü ümotiatoepü arrüna nurarrti, itopiqui arrti coiñoti. Süroti cütü y arrüna nicürrti aninqui auna uyarrüpecu. 30Arrti David ipianacatenti nurarrti Tuparrü tücañe, itopiqui profetarri. Sane nauquiche arrti Tuparrü urapoiticaü isucarüti aübu juramentorrü que tamanti uturuqui bama nesarri familiarrü tonenti Cristo. Tonenti naqui tümonsoti ñana au tronorrü na üriaburuti. 31Sane nauquiche arrti David urapoiticaü tücañe, arrti

Cristo tiene que asüboriti tato ñana, y arrüna nausüpurrti chüpuerurrüpi asio eana bama macoiñoca. Chüporeopito nicütüpurrti. ³²Artri Tuparrü isümoniancanatiti tato Jesús. Enterurrü somü terricurrtü somü ümo arrüna sane. Sumasacati süboricoti tato. ³³Iyebo uiti au nepanauncurrti Yaitoti. Artri bacheboti üriacaboti na acüputi icu na cürrü ümoti Espiritu Santo. Tone caüma arrüna amarrai y amoncoi one auna. ³⁴Champürrtü artri David naqui süroti tato au napese aübu cürrü nicütüpurrti. Pero artri nanti sane:

Artri Tuparrü nanti sane ümoti iyesa Señor:

“Atümo rrupetacuñü au nepanauncu ñiñe, na üriaburü saübuñü, ³⁵cheperrtü bachesoiyoma aesacü sobi aesa enemigorrtü.” ³⁶Sane nauquiche tapü anati naqui chicocotapü au na cürrü Israel, que artri Jesús, naqui süroti aboi apü curusürrü, tonenti Señor y Cristo uiti Tuparrü.

³⁷Nauquiche toncoimia arrüna sane, iñorronconomacü au nitusirrimia. Ñanquitioma pünanaquiti Pedro y pünanaqui bama maquiataca apostolerrü: —¿Causane caüma sobio?

³⁸Artri Pedro nanti sane ümoma:

—Apñorroncosaño. Tari abüriquia au nürirrti Jesucristo. Sane rrimiacana tato aume nomünantü aboi. Artri Tuparrü caüma icüpurutiti Espiritu Santo au nabausasü. ³⁹Aume te arrüna nurartri Tuparrü sane y ümo bama abaübosi y ümo bama ito aboma iche, bama tasuruiqui uiti Tuparrü.

⁴⁰Ausüratai ñanunecacartri Pedro ümoma. Ubuturuqui manio ñanunecacartri, nanti sane ümoma:

—Tapü abasiquiaiqui eana bama churriampatai nisüboriquirrimia. ⁴¹Arrübama yasutiuma ñacuansomocorrti, ürioma. Au manu nanenese iñanamacü arrüpecu bama icocoromati Jesús, taqui tres mil nubiquirrimia. ⁴²Enterurrüma süroma isiu na ñanunecarrüma bama apostolerrü. Macumanaunrrüma ümomantoe. Iyoberabaramacü nauqui chépe ahama y nauqui eama.

Nisüboriqui bama primero icocoromati Cristo

⁴³Tarucu nicütöbü macirrirtianuca oboi ba milagrorrtü y señarrü omirriante ui bama apostolerrü. ⁴⁴Enterurrü bama icocoromati Jesús chépe nacarrüma. Macumananama ümomantoe arrüna ane uimia. ⁴⁵Ipiaventecatama arrüna nenarrirrimia. Nicuarrü caüma rrepartibo uimia ümomantoe isiu naca na narrantümoma. ⁴⁶Naneneca oberabarama au niporrti Tuparrü. Au niporrümantoe caüma basoma juntorrtü. Pucünuñamantai y tacane ichimiancanamacü au nausasürrüma. ⁴⁷Iñanaunumati Tuparrü. Tarucu nicuarrüma ümo genterrü. Artri Tuparrü naneneca bacheboti uüboma.

Urriancati tato taman ñoñünrrü

3 ¹Taman nanenese artri Pedro ichepeti Juan süromatü au niporrti Tuparrü a las tres isiu nimümrü, itopiqui arrümanu horarrü nantarrü meaboma macirrirtianuca acamanu. ²Naneneca anati acamanu taman ñoñünrrü naqui

chüpuerurrüpü amenti auquiapae numo aübo anati icu cürrü. Iquianamati acamanu, iñanamati abeu manu tururrü nürirri “Coñorrtai”. Acamanu manquioti limosnarrü pünanaqui bama pasaoma, niyücürrümampo. ³Nauquiche pasaoti Pedro ichepeti Juan niyücürrümampo, manquiotito limosnarrü pünanaquimia. ⁴Tochencoma nauqui asaramatü ümoti, auqui arrti Pedro nanti ümoti:

—Asasatü suiñemo.

⁵Arrti maniqui ñoñünrrü asaratitü nurria ümoma, ñaquioncorrti macumananama ñana ümoti. ⁶Arrti Pedro nanti ümoti:

—Champü monirri sobi ni oropü. Pero arrüna ane sobi puerurrü ichüci. Au nürirrti Jesucristo naqui auqui Nazaret sucanañü aemo: ¡Atüsaí, ame!

⁷Auqui arrti Pedro iñatünaiñacanatiti auqui nepanauncu nipiarrti. Au manu rratórrü urrian tato nipoperrti. ⁸Tobüsoti tape, amencoti bien urria. Abu arrti tücañe chüpuerurrüpü amenti. Sürotipo ichepema au niporrti Tuparrü. Tobüsotiatai tape, nipucünuncurrti. Iñanaunutiti Tuparrü. ⁹Enterurrü genterrü asaramati, amencoti aübu ñanauncurrti ümoti Tuparrü. ¹⁰Tarucu nicütobürrüma ui arrüna arrtaimia sane. Tusio ümoma, ta tonenti maniqui nanenecatai anancati tümonsoti abeu nituru niporrti Tuparrü, arrümanu nürirri “Coñorrtai” nauqui acumanama ümoti.

Nisermónrti Pedro

¹¹Arrti maniqui ñoñünrrü urriancati tato nacarrtiatai tanu isiuti Pedro y arrti Juan. Amoncoma au manu nicorero niporrti Tuparrü nürirri Salomón. Tapü arrübama macirrtianuca ipiacünomacü esama, nauqui asaborimia. Tarucu nicütobürrüma. ¹²Ui arrüna sane nanti Pedro ümoma:

—Arraño bama mañoñünca auqui Israel: ¿Causane tarucu naucütobü?

Abasiqia amarrtaiquiatü suiñemo, tacanarrtü soboi urriancati tato naqui ñoñünrrü. Champürrtü urriancati tato soboi ni ui arrünampü tarucu supaquionco iyoti Tuparrü. ¹³Ta arrti Tuparrü naqui ümoche tarucu tücañe ñacoconauncurrti Abraham y arrti Isaac y arrti Jacob, bama upariente tücañe, tonenti naqui uiche aisamune arrüna sane, na atusi ümo macirrtianuca arrüna tarucu nicuarrti Jesús ümoti. Artti Jesús baserebioti ümoti Tuparrü, pero torrioti tücañe aboi ümo bama mayüriabuca na aconti. Artti yüriaburrü Pilato rranrrtipü tücañe aiñemecanatiti, pero arraño chaurriancapü. ¹⁴Abu arrti champü isane nipünatenti, bien urria nisüboriquirrti. Pero arraño apanquítio nauqui ataesübuti maniqui quiatarrü ñoñünrrü yatabayorrti. ¹⁵Sane apitabaiquiatü naqui bachebo osüboriquibo. Pero artti Tuparrü isümoniancanatiti tato. Arrüsomü sumarrtai nanaiña arrüna sane. ¹⁶Ui nicusiurrti maniqui Jesús urriancati tato naqui ñoñünrrü itopiqui sopicococati. Arraño apisuputacati nurria naqui ñoñünrrü urriancati tato. Torrio suiñemo uiti Tuparrü nauqui sopicocoroti Jesús; uirri te urriancati tato nurria naqui maunrocono, tacana arrüna amarrtai.

¹⁷Bueno, bama masaruquitaquí, tusio iñemo, arraño ichepe bama mayüriabuca apitabaiquiatü Jesús, pero ta ui na champürrtü tusio aume

arrtü tonenti Cristo. ¹⁸Pero ta sane cocono uiti Tuparrü arrümanu nurarrti tücañe turuqui bama nesarrti profetarrü, que arrti Cristo taquisürüti ñana. ¹⁹Sane nauquiche apiñorroncosaño. Auqui caüma morrimiacana tato nomünantü aboi. Bacüpurutito caüma omirriantai naneneca aume, nauqui urria nabaca y aupücünuncatai. ²⁰Sane ito caüma icüpurutiti tato aume naqui Cristo auqui napese. ²¹Tusio oemo que anati baeta au napese cheperrtü tanaiña coñocono uiti Tuparrü, tacana arrüna nantarrtai nurarrti tücañe turuqui bama profetarrü, bama baserebioma ümoti.

²²Sane ito nurarrti Moisés ümo bama upariente israelitarrü tücañe:

—Artri Tuparrü bacüpuruti ñana taman profetarrü abuturuqui, tacana arrüñü.

Apacoconaun ümoti.

Apicoco ito nurarrti.

²³Namanaiña bama chümacoconaunpüma ümoti, tari penecoma eanaqui bama israelitarrü, chütonemainquipü nesarrti genterrü Tuparrü.

²⁴Auquiapae numo süboricotiqui profetarrü Samuel, enterurrüma bama maquiataca profetarrü urapoimia ito arrüna tiemporrü caüma (nitiemporrü Cristo). ²⁵Aume te arrüna nurarrti Tuparrü tücañe turuqui bama profetarrü. Autacu masamunuti Tuparrü tratorrü tücañe aübu bama upariente, nauquiche nanti ümoti Abraham: “Nanaiña genterrü icuqui na cürrü curusüu ñana auqui naca naesa familiarrü”. (Itopiqui arrti Jesús auqui nesarrti familiarrü Abraham.) ²⁶Artri Tuparrü isümoniancanatiti tato naqui Aütorrti. Icüpurutiti primero aume nauqui autaesübu eanaqui nomünantü, nauqui apicoñoco arrüna churriampatai nausüboriqui.

Artri Pedro ichepeti Juan aboma esa mayüriabuca

4 ¹Amoncomainqui manitanama arrti Pedro y arrti Juan, auqui iñataimia esama manuma sacerdoterrü, ichepeti maniqui yüriaburrü ümo niporrti Tuparrü y arrübama saduceorrü. ²Tüboricoma, itopiqui arrti Pedro y arrti Juan manunecanama ümo genterrü y urapoimia que arrti Jesús süboricoti tato eanaqui macoiñoca, na atusi que puerurrü asüborimia tato bama macoiñoca. ³Auqui enoma uimia. Aüroma au preso hasta quiatarrü nanenese, itopiqui chauqui tütümümüca, champü tiemporrü nauqui acurrtama aübuma manu nimüümürrü. ⁴Sürümanama bama amoncoma onsapecoma nurarrti Pedro, icocotama. Sane nauquiche manrrü nubiqui bama icocoromati Jesús. Taboma cinco mil mañoñunca (abe ito paüca y masiomanca).

⁵Au manu quiatarrü nanenese tansürü oberabarama au Jerusalén bama üriatu bama israelitarrü ichepe bama mamayoreca y arrübama manunecana nüriacarrü. ⁶Anancati Anás, naqui yarusürürrü sacerdoterrü, ichepeti Caifás, arrti Juan, arrti Alejandro y namanaiña bama maquiataca auqui nesarrüma familiarrü bama üriatü sacerdoterrü. ⁷Bacüpuruma

nauqui ayeti Pedro ichepeti Juan acamanu esama. Auqui iñataimia acamanu. Süroma cümuinta uimia. Ñanquitioma pünanaquimia:

—Uiche ane arrüna nabüriaca, quiti naqui yacüpucuche aume nauqui apacura ümoti maniqui ñoñünrrü.

⁸Auqui manitanati Pedro ui nicusüurrti Espíritu Santo, nanti ümoma:

—Bueno, arraño bama üriatu pueblurrü y arrübama mamayoreca au Israel, ⁹arraño apanquiritio somopünanaqui arrüna sopisamute urria ümoti naqui maunrocono. Apanquitito uiche urriancati tato. ¹⁰Suburaboira ausucarü, nauqui atusi ümo na genterrü auqui Israel. Artti naqui ñoñünrrü amasacati auna, urriancati tato au nürirrti Jesucristo naqui auqui Nazaret, naqui süro apü curusürrü aboi. Pero ta uiti Bae Tuparrü süboricoti tato eanaqui macoiñoca. ¹¹Artti Jesús tonenti tacana canrrü arrüna botabo ui bama masamunu porrü, pero uiti Tuparrü artti tacana arrone canrrü manrrü urriampae ümo porrü. Tone manrrü yaserebiquirri. Arraño te tacana bama masamunu porrü. ¹²Champüti quiatarrü naqui uiche puerurrü utaesübu eanaqui nomünantü, uitiatai Jesús. Itopiqui champüti quiatarrü torrio oemo uiti Tuparrü icu na cürrü naqui uiche puerurrü utaesübu eanaqui nomünantü.

¹³Arrümanuma mayüriabuca tütusio ümoma que artti Pedro y artti Juan champü nirrurrrüma. Tusiataito ümoma que champürtrü ipiacamampae nicororrrü. Auquito caüma tusio ümoma, tonema bama amencoma tücañe ichepeti Jesús. ¹⁴Tacane artti maniqui ñoñünrrü urriancati tato anati acamanu ichepema. Asi que champü isane urapoboiboma. ¹⁵Auqui baciüpuruma ümoma ariorrrüma baeta türüpo auqui manu, nauqui aparimia. ¹⁶Namatü:

—¿Causane caüma osoi ümo bama mañoñünca? Enterurrümantai bama auqui Jerusalén tusio ümoma arrüna milagorrü urriante uimia. Sane nauquiche chüpuerurrüpi uiañaneca. ¹⁷Pero tapü asio genterrü icuata nüri arrüna sane, mejor bachera mapirrumucurrü ümoma nauqui tapü asioma uraboimia nürirrti maniqui Jesús.

¹⁸Auqui tasuruma tatito uimia. Urapoimia isucarüma tapü asioma anitanema nürirrti Jesús y ñanunecacarrti. ¹⁹Pero artti Pedro ichepeti Juan iñumutama nurarrüma, namatü ümoma:

—Apapensasio arraño: ¿Taqui urria ümoti Tuparrü artrü supacoconaunca aume, tapü ümoti champü? ²⁰Causanempü sopiñaneca arrüna sumarrtai ui suisütoatoe y arrüna somoncoi.

²¹Auqui rranrrüpüma achema manrrü mapirrumucurrü ümoma, pero au nitacürurrü emecanama uimia. Chütübücopü uimia causane nauqui carrticaboma uimia, itopiqui enterurrü genterrü iñanaunumati Tuparrü ui arrüna urriante uimia.

²²Artti maniqui ñoñünrrü urriancati tato, ta tütabe cuarenta añorrü ümoti.

Neancarrüma bama icocoromati Jesús

²³Artti Pedro ichepeti Juan numo tütaesüburuma uimia, süroma tato esa bama icumpañeruturrüma nauqui uraboimia isucarüma arrüna nura

bama üriatu sacerdoterrü y bama mamayoreca. ²⁴Nauquiche toncoimia nurarrüma, chépema meaboma. Namatü sane:

—Señor, obi aisamune napese, cürrü, turrü y nanaiñantai. ²⁵Arrücü ito ucanü tücañe turuquiti David naqui amoso, numo maconomonoti uiti Espiritu Santo sane:

¿Causane pahiyaca nacioneca y arrübama macrirrtianuca
ñapensaracama ñome arrüba champüatai iyebo auqui ümoma.

²⁶ Arrübama mayüriabuca icuqui na cürrü, tüboricoma y arrübama
üriatu puebluca iyoberabaramacü, itopiqui tüboricoma ümoti
Tuparrü y ümoti Cristo, naqui tacümanauncunu uiti.

Sane ñaconomosorrti David.

²⁷ Ñemanauntu arrti Herodes y arrti Poncio Pilato juntaboma auna pueblurrü ichepe bama extranjerurrü y arrübama israelitarrü, enterurrüma tüboricoma ümoti Jesús naqui Cristo. Tonenti naqui anaunu obi. ²⁸ Sane urriante uimia nanaiña arrüna tanancatai au napensaca arrüna pasabobo. ²⁹ Sane nauquiche Señor, tusio nurria aemo nurarrüma suiñemo. Ayura suiñemo tapü sopirruca ñünana nurarrüma suiñemo, nauqui suburaboi nura aübu tarucu narucurrü suiñemo. ³⁰ Ache suiñemo nauqui puerurrü urrianama tato soboi bama maunrocono, y nauqui puerurrü sopisamune milagrorrü au nürirrti Jesús naqui Ahü, naqui anaunu obi.

³¹ Nauquiche tacürusu neancarrüma, paichoconono manu cauta amoncoma oberabarama. Enterurrüma süroti Espiritu Santo auma. Champü nirrucurrüma uraboimia nurarrti Tuparrü.

Nenarrirrimia nesa namanaiñantai

³² Enterurrüma manuma icocoromati Jesús chépatai naca ñapensacarrüma y arrüna nirrantiümoma au nitusirrimia. Champüti naqui nanti nesarrtiatai arrüna nenarrirrti, ta nesa namanaiñantai arrüna nenarrirrimia. ³³ Arrübama apostolerrü aübu nanaiña nüriacarrüma urapويمia arrüna süboricoti tato Señor Jesús. Arrti Tuparrü tarucu ñacunusüancacarrti ümoma. ³⁴ Champüti eanama naqui taquisürü, itopiqui arrübama abe niyorrüma y arrübama abe niporrüma, mupaventeo uimia. Auqui caüma ane nimonirrimia. ³⁵ Torrio uimia caüma ümo bama apostolerrü. Uimia caüma torrio ümo cadati taman isiu naca na nirrantiümoma. ³⁶ Sane uiti maniqui José nürirrtito ui bama apostolerrü Bernabé, nürirrti auqui besüro “ñoñünrrü naqui ipiaca apucüruti”. Arrti eanaqui nesarrti familiarrü Leví, pero sunaunti au cürrü Chipre. ³⁷ Arrti naqui ñoñünrrü ipiaventecatati niyorrti. Auqui itorrimiatati nicuarrü ümo bama apostolerrü.

Arrüna nomünantü uiti Ananías y ui Safira

5 ¹ Anaito quiatarrü ñoñünrrü nürirrti Ananías y nicüpostoti nürirri Safira. Paventeo uiti taman niyorrti. ² Cümuinta nicua manu ñanaunrrü ahüburu

uiti ümoti. Quiatarrü nicümuintarrü itorrimiatati ümo bama apostolerrü. Tusio ümo nicüpostoti arrüna sane, urria ümo. ³Auqui nanti Pedro ümoti Ananías:

—¿Causane aüroti choborese a nausasü? Arrücü apanca ümoti Espiritu Santo. Aitorrimiata cümüintatai nicua manu naho, pero arrücü ucanü que tone nanaiña nicuarrü. ⁴Naesa te manu ñanaunrrü, puerurrü aisamune isiu narrianca aübu. Numo tüpaventeo obi, naesa te manu monirri, puerurrü ito aisamune isiu narrianca. Pero arrüna napanca champürrtü ümo mañonüncatai, ta ümoti Tuparrü.

⁵Numo oncoiti Ananías arrüna sane nurarri Pedro, taübücoti acü y coiñoti. Enterurrüma bama ipiatema, birrubuma ui arrüna sane. ⁶Cuamatü manuma mayaüca aicümurrianca namati, canati uimia nauqui aiñanamati cütu.

⁷Iyau ba trerrü horarrü, iñatai manu nicüpostoti Ananías. Champü tusiobo ümo. ⁸Ñanquitioti Pedro pünanaqui:

—Urasoi isucarüñü, ¿taqui enterurrü nicua manu ñanaunrrü pabenteo aboi arrüna sane?

—Unca enterurrü, nantü.

⁹Aiñumuti tatito Pedro, nanti:

—¿Causane apiña napapantu ümoti Espiritu Santo, abu chisiupü naucusüu? Ichepatai na napapantu. Caüma cuama tato manuma mayaüca uiche aüroti cütu aiquianü. Arrücü ito caüma aconca. Uimia ito caüma aeca cütu.

¹⁰Au manu rratörri taübüco ito esati Pedro, coiño ito. Arrümanuma mayaüca iñataimia tato acamanu, besüro narrtarrüma ümo, coiño. Iquiatama ito, aiñama cütu ipetacuti iquiana. ¹¹Enterurrüma manuma icocoromati Jesús y nanaiña arrübama ipiatema arrümanu sane, tarucu nirrucurrüma uirri.

Omirriante milagrorrü

¹²Sürümanatai milagrorrü omirriante ui bama apostolerrü isucarü macirrtianuca. Arrübama icocoromati Jesús iyoberabaramacü nantarrü au manu nicorero niporrti Tuparrü nürirri Salomón. ¹³Arrümanuma maquiataca birrubumantai aiñanamacü ichepema. Pero arrübama icocoromati Jesús tarucu nicuarrüma ümo genterrü. ¹⁴Naneneca aboma bama icocoromati Señor, sürümanama mañonüncatai y paüca. ¹⁵Arrübama macirrtianuca iquianama bama maunrocono isiu cayarrü aübu nanaiña nicüurrüma, ümo arrtü pasaoti Pedro esaquimia, nauqui apasa ito nausüpüturrti onüquimia, nauqui urrianama tato. ¹⁶Cütüpürrü macirrtianuca iñataimia acamanu esa bama apostolerrü auqui manio piquiataca puebluca saimia ümo Jerusalén. Cuamatü uimia bama maunrocono y arrübama taquisürüma itopiqui aboma machoboreca auma. Enterurrüma urriancama tato.

Tüboricoma ümoti Pedro y ümoti Juan

¹⁷Arri maniqui yarusürürrü sacerdoterrü ichepe bama icumpañeruturrti, arrübama auqui manu partidorrü nesa bama

saduceorrü arrübama amoncoma ichepeti, ünantü ümoma. ¹⁸Enoma bama apostolerrü uimía, süroma au preso. ¹⁹Pero au tobirri cuati taman ángel iyaiüburutiño turuca, carübuma auqui preso uiti. Nanti ümoma:

²⁰—Amecosi au niporrti Tuparrü apanitase arrüna manitacarrü isucarü genterrü, uiche coñocono tato nausüboriqui.

²¹Numo tütaneneca tato süromatü au niporrti Tuparrü. Acamanu manunecanama.

Na arrti maniqui yarusürürü sacerdoterrü ichepe bama icumpañeruturrti oberabarama uimía enterurrüma bama mayüriabuca y bama mamayoreca auqui Israel. Bacüpuruma iyo bama apostolerrü na ayematü esama auqui preso. ²²Süromatü bama policiarrü iyoma, pero numo tiñataimia taha champürrtü abomainqui. Auqui süroma tato, uraboimía. ²³Namatü:

—Champüma. Causanempü, tai ananca bien mamana arrümanu cauta amoncoma y arrübama masortaboca amoncoma bacuirarama yutacu turuca. Pero nauquiche sopiyaübuta, champüti naqui anancapo.

²⁴Nauquiche tütusio ümoti maniqui üriatu bama bacuirara itacu niporrti Tuparrü y ümo bama üriatu sacerdoterrü, chümarrtacarrüpatai ümoma. Chütusiopü ümoma causane arrüna sane. ²⁵Auqui iñataiti taman ñoñünrrü acamanu, uraboiti isucarüma arrüna sane:

—Arrümanuma mañoñünca amoncoma au preso aboi, aboma au niporrti Tuparrü manunecanama ümo genterrü.

²⁶Auqui arrti maniqui üriatu bama bacuirara itacu niporrti Tuparrü aübu bama policiarrü yebomatü iyoma. Iñataimia esama. Masamuña niyüciürüma esama ui nirrucurrüma ñünana genterrü tapü yaruruma oboi canca, arrtü ane causane uimía ümo bama apostolerrü. ²⁷Süromatü uimía esa manuma mayüriabuca, bama ane nüriacarrüma, nauqui acurrutama. Iñataimia esama. Arrti maniqui yarusürürü sacerdoterrü nanti sane ümoma:

²⁸—Chauqui tüsuburapoi ausucarü, tapü abasiquiaiqui apanuneca arrümanu sane au nürirrti maniqui Jesús. Pero ta tütusio nürirrti aboi au nanaiñantai Jerusalén. Aurrianca nauqui ane sopipünate itopiqui niconcorrti naqui ñoñünrrü.

²⁹Auqui arrti Pedro y arrübama maquiataca apostolerrü inümutama sane:

—Arrüsümü supacoconaunca ümoti Tuparrü. Champürrtü ümo mañoñüncatai. Churriampü te ümoti, arrtü supacoconaunca aumeantai. ³⁰Arrti Tuparrü iñanaunumati bama uyaütaiqui tücañe. Arrti te isümoniancanatiti Jesús, naqui coño aboi apü curusürü. ³¹Arrtito Tuparrü aübu nanaiña nicusüurrti isamunutiti Jesús yüriaburrü naqui uiche ataesübu genterrü eanaqui nomünantü, nauqui puerurrüma arrübama auqui Israel aiñorronconomacü, nauqui amorrimiaca nanaiña nomünantü uimía. ³²Arrüsümü sumarrtai y suburapoi arrüna sane, y arrtito Espíritu Santo sane urapoiti ausucarü arrüba omirria. Ta torrioti uiti Tuparrü ümo bama macoconaunrrüma ümoti.

³³Numo toncoimía arrüna sane, arrone nurria nitüborirrimia, rranrrümampü aítabajoma. ³⁴Pero eana manuma mayüriabuca

anancati maniqui taman fariseorrü nürirrti Gamaliel, naqui manunecana nüriacarrü. Tarucu ñacoconaucurrüma macrirrtianuca ümoti. Atüraiti, bacüpuruti acaübuma baeta türüpo bama apostolerrü. Süromatü türüpo.

³⁵Auqui nanti Gamaliel ümo bama mayüriabuca:

—Arraño bama auqui Israel: Amasasai nurria tapü ane causane aboi ümo bama mañoñünca.

³⁶Apaquionsaño bama isumpañoero auqui Israel, chiicoboipapae anati maniqui nürirrti Teudas naqui rranrrtipü champüti manrrü pürüciüti, taqui cuatrocientos nubiqui bama süroma isiuti. Pero numo taborioti pünanaquimia, ñarriomantai iyauti. ³⁷Auqui caüma au manio naneneca nesa mapacümuncucurrü ümo genterrü, anati maniqui Judas auqui Galilea. Bahiyoti aübu bama rromanorrü. Aboma bama süromatü isiuti. Pero taboriotito ui bama mayüriabuca, y namanaiña bama aboma ichepeti ñarriomantai. ³⁸Sane nauquiche sucanañü, tapü abasiquia icuata bama mañoñünca, tapü ane causane aboi ümoma, itopiqui arrtü uimiantai nanaiña arrüna sane, contoatai mameso. ³⁹Pero arrtü uiti Tuparrü, chüpuerurrüpi año apiñamesoco. Amasasai nurria. Tapü apahiacaño aübuti Tuparrü.

⁴⁰Auqui namanaiña urria ümoma nurarrti. Bacüpuruma tatito iyo bama apostolerrü. Champürrtü coiñoma uimia, pero cüborioma uimia. Bacüpuccurrü ito uimia ümoma tapü asioma uraboimia nürirrti Jesús. Auqui emecanama uimia. ⁴¹Auqui arrübama apostolerrü süromatü auqui manu esauqui manuma mayüriabuca. Bien pucünüñama, itopiqui urria ümoti Tuparrü arrüna taquisürüma auqui nacarrti Jesús. ⁴²Champürrtü ñocotama ñanunecacarrüma au nürirrti Jesucristo. Naneneca manunecanama au niporrti Tuparrü y tacane ito au poca.

Tacümanauncunuma bama siete na aserebimia

6 ¹Au manio naneneca tücañe manrrü nubiquirrimia bama icocoromati Jesús. Arrübama manitana griegorrü tüboricomu ümo bama manitana hebreorrü nura bama israelitarrrü, itopiqui arrüba biuraca panitana griegorrü chimiantai torrio ñome umutuburibo naneneca. ²Auqui bama doce apostolerrü oberabarama uimia bama icocoromati Jesús. Namatü ümoma:

—Champürrtü urria arrtü uiñocota numanunecaca nurarrti Tuparrü nauqui basapa ümo bama maquiataca. ³Sane nauquiche bama masaruquitaqui, apapache sietema mañoñünca abuturuqui arrübama puerrurrü amoncatü ümoma, bama ipiaca aserebimia y anatito Espíritu Santo auma. Tari tonema yasuriurama arrüna trabacorrü, nauqui aserebimia. ⁴Tapü arrüsomü chüsopiñocotapü sopeanca ümoti Tuparrü y supanunecaca nurarrti.

⁵Namanaiña urria ümoma arrüna sane. Auqui itacümanauncunumatü Esteban, naqui bien urria ñacoconaucurrti ümoti Jesús, tusio ito nicusüurrti Espíritu Santo auti. Itacümanauncunumatü Felipe, arrti Prócoro, arrti Nicanor, arrti Timón, arrti Parmenas, arrti Nicolás auqui Antioquia, naqui yasutiuti manu religión nesa bama israelitarrrü. ⁶Arrübama siete caüma

süromatü esa bama apostolerrü atüraimía esama. Arrüma caüma manquioma pünanaquiti Tuparrü itacuma, iñatama neherrüma itama, nauqui acurusüma.

⁷Arrüna nurarrti Tuparrü caüma tütusio tanu. Manrrü nubiquirrimia bama icocotama au Jerusalén. Aboma ito sürümanama bama sacerdoterrü yasutiuma.

Iñenomati Esteban

⁸Artri Esteban bien tusio nicüsürrti Espíritu Santo auti, y artri Tuparrü yarusürürrü ñacunusüancacarrti ümoti. Masamunuti milagrorrrü eana macrirrtianuca. ⁹Auqui aboma bama auqui manu porrrü sinagoga nürirri uimía “bama taesüburu”. Aboma ito ichepema bama auqui manio provinciarrü Cilicia y Asia. Süromatü esati Esteban, na uratoquimía ümoti. ¹⁰Pero chümacanamapüma ümoti ui nurarrüma, itopiqui tarucu ñapanauncurrti y anati Espíritu Santo auti. ¹¹Auqui caüma bapacarama ümo maquiataca mañoñünca, nauqui uraboimía arrüna sane, namatü:

—Somoncoi que artri Esteban manitanati churriampü ümoti Moisés y ümotito Tuparrü.

¹²Ui arrüna sane tüboricoma macrirrtianuca. Aboma ito mamayoreca y bama manunecana nüriacarrü. Iñenomati Esteban. Sürotitü uimía ümo bacurrtacarrü. ¹³Acananu bapacheroma ümo bama terrticurrrü mañapanca. Arrüma namatü sane:

—Artri naqui ñoñünrrü champürrtü oncono uiti arrüna nurarrti churriampü ümo na niporrti Tuparrü y ümo arrüna nüriacarrü.

¹⁴Somoncoi arrüna nurarrti sane: Artri maniqui Jesús auqui Nazaret tiene que añarri uiti arrüna niporrti Tuparrü, y uitito uiñocota arrüba noesa costumbre, arrüba botorrio oemo uiti Moisés.

¹⁵Arrümanuma mayüriabuca amoncoma acamanu tümonsoma ichepe namanaiña manuma maquiataca. Asaramatü ümoti Esteban. Arrüna nisurrti caüma tacanapae nisurrti ángel.

Nisermorrri Esteban

7 ¹Auqui artri maniqui üriatü bama sacerdoterrü ñanquitioti pünanaquiti Esteban:

—¿Ñemanauncurratöe arrüna nurarrüma aemo?

²Auqui iñumutati Esteban:

—Masaruquitaqui y bama uyaütaiqui, amonsoi arrüna nisura: Artri Tuparrü tarucu nüriacarrti. Itusiancanatiyü tücañe isucarüti uyaü Abraham nauquiche anancati au manu cürrü nürirri Mesopotamia, numo chüsürotitüquipü aviviti au Harán. ³Nanti Tuparrü ümoti: “Aiñoco arrüna nacü, y namanaiña bama aparente. Acosi au manu cürrü arrümanu tiene que itorrimia aemo”. ⁴Auqui sürotitü Abraham auqui manu cürrü nürirri Caldea, aürotitü aviviti au manu cürrü nürirri Harán. Nauquiche tücoiñoti yayütoti, cuatitü uiti Tuparrü au na cürrü cauta caüma baviviquia. ⁵Pero champürrtü torrio ümoti manu cürrü, ni

peasorrrtaipü. Pero ta urapoiti isucarüti sane: “Itorrimiata ñana na cürri ümo bama aübositaiqui. Au manu tiemporrü tücañe champüti aübosirrti”. ⁶Arrti Bae Tuparrü nanti: “Arrübama eanaqui nesarrti familiarrü Abraham süromatü avivimia tacana extranjerurrü au manu quiatarrü cürri. Pero mosorrüma caüma ümo bama pohoso acamanu. Taquisürüma uimia ñome cuatrocientos añoa. ⁷Arrti Tuparrü nantito: “Yeca tanuiq i yacurrta aübu bama pohoso, arrübama uiche taquisürüma bama aütorrti Abraham. Y auqui caüma iquiaüburumaci auquimanu, nauqui ayematü aserebimia ñemo auna cürri Canaán”. ⁸Arrti Bae Tuparrü masamunuti tratorrü aübuti Abraham. Manunecanati ümoti nauqui circuncidaboma uiti bama aütorrti, tacana señarrü ümo manu tratorrü. Sane nauquiche anati icu cürri maniqui aütorrti Abraham, nürirrti Isaac. Circuncidaboti uiti Abraham numo tabe ocho naneneca nacarrti icu cürri. Sane ito uiti Isaac ümoti aütorrti, nürirrti Jacob. Y arrti Jacob sane ito uiti ümo bama doce aütorrti. Ui bama doce ane caüma noesa nación, nürirri Israel.

⁹Eanaqui manuma doce anati taman nürirrti José. Arrübama yaruquitorrti José tüboricomantai ümoti. Ipiabentecanamati. Sane ñataiti au manu cürri Egipto. Pero arrti Tuparrü bayurarati ümoti. ¹⁰Taquisürüti José acamanu, pero arrti Tuparrü itaesümunutiti pünanaqui nanaiña nitaquisürücürri. Bacheboti ñapanauncubuti. Sane nauquiche arrti yüriaburrü au Egipto, yasuriurutiti José. Arrti maniqui yüriaburrü nürirrti Faraón. Itorrimiatati üriacaboti José ümo nanaiña cürri Egipto. Üriabucatito caüma José au niporrti Faraón.

¹¹Auqui ane carerrtiya y taquisürücürri au manu cürri Egipto y au cürri Canaán. Y arrübama uyaütaiqui champü isane utuburiboma. ¹²Pero nauquiche tütusio ümoti Jacob, ane tubarrirri trigo au Egipto, bacüpuruti ümo bama aütorrti. Süromatü acomporama. Tone arrümanu primer namenrrüma. ¹³Au manu quiatarrü namenrrüma caüma isuputaramati José, ta tonenti yaruquitorrüma. Auqui caüma arrti Faraón isuputarati bama yaruquitorrti José. ¹⁴Auqui arrti José bacüpuruti iyoti yaütoti, y iyo ito namanaiña bama nesarrti familiarrü, setenta y cinco nubiquirrima. ¹⁵Sane nauquiche sürotitü Jacob aviviti au manu quiatarrü cürri Egipto. Acamanu coiñoti, y namanaiña nesarrti familiarrü coiñoma ito acamanu. ¹⁶Iquiatama tato nicunturrti Jacob ichepe nicuntu bama aütorrti au Siquem auna cürri, nauqui aiñanama cütu au manu lote comprabo uiti Abraham tücañe pünanaquiti aütorrti Hamor.

¹⁷Tüsaimia caüma manu tiemporrü anche cocono arrümanu nurarrti Tuparrü, nauquiche itusiancatati curusürri isucarüti Abraham, na atorri manu cürri Canaán ümoma. Arrüna genterrü Israel au Egipto chauqui tüsürümanama. ¹⁸Auqui anati quiatarrü yüriaburrü au Egipto. Champürtrü aquionotiyü iyoti José. ¹⁹Arrti maniqui yüriaburrü encañaoti ümo noesa genterrü, y taquisürüma uiti. Bacüpuruti nauqui oncoma uimia bma aütorrüma aübo aboma icu cürri, nauqui acoma. ²⁰Au manio naneneca tücañe anati icu cürri Moisés, coñorrtiatat manqui ñaüma. Arrti yaütoti y nipiäütoti isunauncunumati trerrü panca au niporrüma. ²¹Nauquiche tiñoconomati, tabücoti ui manu nitaquiumucuturrti

yüriaburrü au Egipto. Iquianati nauqui aisunauncunuti tacana aübosirri. ²²Sane nauquiche ununecanati ümo nanaiña arrüna ipiacama, yacheatarrüma bama egipciorrü. Tusio nüriacarri ui na ñanitacarri y ui na nisamutenti.

²³'Nauquiche tütabe cuarenta añorrü ümoti Moisés, sürotitü apaseati esa bama israelitarri, bama ipiarientetorri. ²⁴Acamanu asaratitü ümoti taman egipciorrü bacübayoti ümoti taman israelitarri. Auqui aürotitü Moisés ocümati itacuti. Coiñoti maniqui egipciorrü uiti. ²⁵Arri Moisés ñaquioncorri tusio ümo bama ipiarientetorri, que uiti caüma tiene que ataesübuma auqui Egipto, tone caüma yayuracarri Tuparrü ümoma. Pero arrübama israelitarri champürrtü tusio ümoma. ²⁶Au quiatarri nanenese asaratitü Moisés ümo torrüma israelitarri bahiyoma aübumantoe. Arri Moisés rranrri nauqui tapü asioma ahimiainqui, nanti ümoma: “¿Causane abasiquia apahi aumeampatoe? Arraño ta aubarquiapatoe?”. ²⁷Auqui arri maniqui iñapachenuche ünanti ümoti arrüna nanti Moisés. Nanti ümoti: “iÑacutipü naqui uiche aicüpurü, nauquipü yüriaburrücü suiñemo!” ²⁸¿Taqui arrianca ito aitabairoñü, tacanati maniqui egipciorrü aitabaiquiati tümüca?” ²⁹Nauquiche oncoiti Moisés arrüna sane, besüburuti. Sürotitü au manu cürrü nürirri Madián. Acamanu bavivicoti tacana extranjerurri. Acamanu ito posoti y aboma torrüma aütorri.

³⁰“Tübupasao cuarenta añoca, nacarri Moisés au manu cürrü. Taman nanenese anati au manu rroense pururü cüosorrü y canca saimia manu yiriturü nürirri Sinaí. Acamanu itusiancanatiyü taman ángel isucarüti eana nonco pese apü taman suema. ³¹Arri Moisés cütobüsoti ui arrümanu sane. Auqui sürotitü saimia ümo, nauqui asarati nurria. Acamanu oncoiti ñanitacarri Señor, nanti sane: ³²“Arrüñü Tuparrüñü ümo bama aubaütaiqui tücañe, ümoti Abraham, ümoti Isaac, ümoti Jacob”. Auqui arri Moisés paichocononoti ui nirrururri, anati mataconoconoti, ni asaratitüpario. ³³Auqui nanti Señor ümoti: “Aiquiaübusio nasapatu apopequicü, itopiqui arrüna cürrü auna cauta aicümote samamecana iñemoantoe. ³⁴Arrüñü yarrai nitaquisürücü niyesa genterrü au Egipto y ñoncoi ito nareorrüma. Isecatü auqui napese nauqui itaesümununuma. Sane nauquiche caüma icüpurü au Egipto”.

³⁵“Arrüma tücañe chücuasürütipü Moisés ümoma y namati: “iÑacutipü naqui uiche aicüpurü nauqui yüriaburrücü suiñemo!” Pero caüma uiti Tuparrü icüpurutiti aübu nüriacarri, nauqui ataesübuma uiti. Manitanati Tuparrü ümoti turuquiti ángel, naqui itusiancanatiyü eana nonco pese apü suema. ³⁶Y arri Moisés masamunuti milagrorrü au manu cürrü. Uiti tücañe taesüburuma bama israelitarri auqui Egipto (aübu yayuracarri Tuparrü). Masamunutito milagrorrü abeu manu narubaitu turü nürirri “Cüturiqui” y eana rroense ñome cuarenta añoca. ³⁷Urapoiti nurria isucarü bama israelitarri arrüna sane: “Arri Tuparrü tiene que acüputi tamanti profetarri aume, naqui tacümanauncunu ameanauqui tacana arrüna icüpurutiñü. Apacoconaun nurria ümoti, arrtü cuatati”. ³⁸Arrito Moisés anacati ichepe macrirrtianuca eana rroense, tacane ichepeti ángel naqui

manitanati ñimoti esa manu yiriturru Sinaí. Torrio ñimoti uiti Tuparrü ñanitacaboti, nauqui uraboiti isucarü genterrü, y usucartü ito, nauqui atorri oemo osüboriquibo.

³⁹Pero arrüma tücañe champürrtü macoconaurrüma ñimoti Mosés, chücuasürütüpü ñimoma. Rranrrümapü asücübüma tato au Egipto. ⁴⁰Auqui namatü bama israelitarrü ñimoti Aarón: “Suirranca nauqui asamu suiñemo matupaca, nauqui acusürüma subaübu. Itopiqui chütusiopü isane pasabo ñimoti maniqui Moisés, naqui uiche aiquiaüburuti somü auqui Egipto”. (Namatü sane, itopiqui abaiturru nacarrti Moisés onü manu yiriturru, ñanitacarrti aübuti Tuparrü.) ⁴¹Auqui masamunuma taman tororru oro itupaboma. Batabayoma numuquianca nauqui acumanama ñimo. Pucünüñama ui arrüna urriante uimia. ⁴²Auqui arrti Bae Tuparrü sürotitü pünanaquimia. Chebatai uiti anauma ñome nostoñeca, surrü y panrrü arrüba abe icu napese. Sane ane corobo icu manu liburrü corobo uiti maniqui pofetarrü Amós:

Arraño bama genterrü auqui Israel, ¿acasopü ññemo apacumanaca numuquianca ubau manio cuarenta añoca nabaca eana rroense?

⁴³No, champürrtü ññemo.

Ta apiquiata nesarrti imágen maniqui tuparrü nürirrti Moloc, y apanaunca ñimo manu nostoñese nürirrti Refán.

Apasamuca autupabo, nauqui apanaun ñimo.

Sane nauquiche caüma icüpucaño auqui manu naucü cürrü, nauqui amenotü manrrü taha pürücü Babilonia.

Sane nurarrti Amós tücañe.

⁴⁴Arrübama uyaütaiqui amoncoma eana manu rroense. Acamanu ane uimia tücañe manu porrü nürirrti santuario, auna cauta anati Tuparrü. Auqui na porrü manitanati Tuparrü ñimoti Moisés. Tari isamunenati isiu nurria tacana arrümanu itusiancatati Tuparrü isucarüiti. ⁴⁵Arrübama uyaütaiqui tücañe yasutiuma manu niporrti Tuparrü. Auqui caüma yüriaburrti Josué. Uiti caüma cuamatü auna cürrü. Macananama ñimo cütüpürrü genterrü tücañe auna. Iquiatama ito arrümanu porrü santuario. Süromatü aübu au na cürrü torrio ñimoma uiti Tuparrü. Sane ananca auna numo yüriaburrti David. ⁴⁶Arrti urria nisüboriquirrti au narrtarri Tuparrü. Rranrrti atünaiñacati porrü auna cauta aviviti Tuparrü, naqui ñimoche manaunuti tücañe Jacob, pero chüpuerurrütüpü. ⁴⁷Aüboqui uiti Salomón, naqui aütorrti David urriane manu niporrti Tuparrü. ⁴⁸Pero arrti yarusürürrü Tuparrü champürrtü bavivicoti au manio poca omirriante ui bama mañoñuncatai. Nanti Señor tücañe turuquiti taman profetarri:

⁴⁹Enterurru napese tacana niyesa tronorru, y arrüna cürrü tacana cauta apacansa nipope.

¿Isanempü naca na porrü arrüna urriante aboi ññemo nauqui ññacansa iquiana.

⁵⁰Isamute nanaiña arrüba abe.

Sane nurarrti Tuparrü.

⁵¹—Pero arraño —nanti Esteban—, siemprerrü chaurriancaipü apasuriuruti Tuparrü au nabausasü, ni amoncoipü nurarrti. Chapacoconauncapü ümoti Espíritu Santo. Abaca tacana bama aubaütaiqui tücañe. ⁵²Namanaiña bama profetarrü taquisürüma tücañe ui bama aubaütaiqui. Arrüma batabaiyoma ümo bama urapويمia tücañe niyequirrti Jesucristo, naqui urria nacarrti au ñaquiuncorrti Tuparrü. Chauqui tiñataiti. Pero arraño aburacati y apitabaiquiati. (Abu champü causane uiti.) ⁵³Torrio tücañe nüriacarrü ui bama angelerrü, pero arraño champürrtü apacoconaunca ümo.

Sane nurarrti Esteban ümoma.

Niconcorrti Esteban

⁵⁴Nauquiche oncoimiam bama mayüriabuca arrüna nurarrti, tarucu nitüborirrimia ümoti. ⁵⁵Pero arrti Esteban anati Espíritu Santo auti. Asaratitü ape, besüro narrtarrrti ümo nanentacarrrti Tuparrü au napese y ümotito Jesús, anati atüraiýoti au nepanauncurrti Tuparrü. ⁵⁶Auqui nanti Esteban:

—Ani, besüro niyasata au napese yasacati Ñemanauncurratoe Ñoñünrrü, anati au nepanaucurrti Tuparrü.

⁵⁷Pero arrüma itamurriancatama numasurrüma nauqui tapü oncoimiam, tosibicoma fuerte y süromatü yarucurrüma aiñenomatü Esteban.

⁵⁸Penecoti uimiam auqui pueblurrü. Acamanu yarurumatü oboi canca, na aconti uimiam. Arrübama urabomatü tücañe, tonema bama cusürüboma aruma canca ümoti. Iñocotama nicüburirrimiam esati taman yaürrü nürirrti Saulo, nauqui acuirati yutacu. ⁵⁹Nauquiche amoncoma barusuma canca ümoti Esteban, meaboti ümoti Tuparrü nanti sane:

—Señor Jesús, asusiu niyausüpi.

⁶⁰Auqui bachesoiyoti oboi canca, tosibicoti fuerte, nanti:

—Señor, tapü ane causane obi ümoma itacu arrüna nünantü uimiam. Nauquiche tünanti sane, coiñoti.

Nitüborirrti Saulo

8 ¹Maniqui Saulo urria ümoti arrüna itabairomati Esteban. Arrümanu nanenese süromatüqui isiu bama icocoromati Jesús au Jerusalén, nauqui aiñenoma. Arrüma besüburuma au manio ciuca Judea y Samaria. Tapü arrübama apostolerrü süsioma au Jerusalén. ²Acamanu amoncoma mañoñünca pucürusuma itacuti Esteban. Iñanamati cütü y areoroma itacuti. ³Tapü arrti Saulo bapacheroti iyo bama icocoromati Jesús ui nitüborirrti ümoma. Sürotitü au poca, nauqui acaübuma türüpo uiti y nauqui ehama uiti bama mañoñünca y paüca. Süromatü uiti au preso.

Urapويمiam nurarrti Tuparrü au Samaria

⁴Pero arrübama besüburu auqui Jerusalén süromatü uraboimiam nurarrti Tuparrü auna cauta niyücürrüma. ⁵Tamanti eanaquimiam, nürirrti Felipe,

sürotitü au manu pueblurrü Samaria. Acamanu urapoiti isucarü genterrü nürirrti Jesucristo. ⁶Iyoberabaramacü macrirrtianuca, nauqui onsaperioma arrüna nurapoiti isucarüma. Urria ümoma. Asarioma ito arrüba milagrorrü omirriante uiti. ⁷Sürümanama bama amoncoma machoboreca auma, urriancama tato. Arrübama machoboreca tosibicoma nurria niyücürüma auquimia. Aboma ito sürümanama bama chüpuerrürüpü amema, y bama renco. Arrüma ito urriancama tato. ⁸Ui arrüna sane pucünüamantai namanaiña bama pohoso au manu pueblurrü Samaria.

⁹Acamanu anati taman ñoñünrrü nürirrti Simón. Arrti ane nipiaccati au manu pueblurrü. Encañaoti ümo macrirrtianuca. Cütobüsoma uiti, ñaquioncorrüma champüti naqui manrrü ipiaca püñanaquiti. ¹⁰Namanaiña onsapecoma nurarrti, arrübama masiomanca hasta bama mayarusürüca, namatü:

—Arrti naqui ñoñünrrü ane arrüna tarucu nicusüurrti uiti Tuparrüi.

¹¹Icocomati, itopiqui tucoboi nencañacarrti ümoma ui manu nipiaccati. ¹²Pero caüma ticocotama arrüna nurarrti Tuparrü uiti Felipe, naqui urapoiti isucarüma que arrti Tuparrü ane nüriacarrti. Urapoitito nürirrti Jesucristo. Sürümanama mañöñünca y paüca ürioma uiti. ¹³Arrti maniqui Simón icocotatito y üriotito. Auqui sürotitü ichepeti Felipe. Cütobüsoti ui arrüba milagrorrü omirriante uiti Felipe. ¹⁴Arrübama apostolerrü amoncomainqui au Jerusalén. Ipiatema ta arrübama au Samaria icocotama nurarrti Tuparrü. Sane nauquiche icüpurumati Pedro ichepeti Juan, na aüromatü tanu. ¹⁵Nauquiche tiñataimia au Samaria, meaboma itacu bama icocomati Jesús, nauqui ayeti Espiritu Santo au nausasürüma. ¹⁶Itopiqui champürrtü tiyasuriurumati Espiritu Santo. Üriomantai au nürirrti Señor Jesús. ¹⁷Auqui arrti Pedro y arrti Juan iñatama neherrüma itama. Sane nauquiche cuati Espiritu Santo au nausasürüma.

¹⁸Nauquiche tarritaiti Simón arrüna niyequirrti Espiritu Santo auma, arrtü iñatama bama apostolerrü neherrüma itama, rranrrtipü acheti monirri itobo arrüna sane üriacaboti. ¹⁹Nanti sane ümo bama apostolerrü:

—Apache ito iñemo nauqui aüroti Espiritu Santo sobi auti naqui iñata niñe itati.

²⁰Auqui nanti Pedro ümoti:

—Tari aensora aübu nanaiña namoni, itopiqui churriampü arrüna napensaca. Champürrtü nauqui macomporario ñacumanatarti Tuparrü. ²¹Champü isane nümoche asiquia suichepe, itopiqui arrücü churriampü napensaca. ²²Aiñocoso nomünantü obi. Anqui pünanaquiti Tuparrü arrtü puerurrü airrimiacati tato aemo arrüna churriampatai napensaca au natusi. ²³Itopiqui yasacatü pesabatai aemo suisüriaca, y tarucapae nomünantü ane obi, tacanarrtü apresoca uirri.

²⁴Auqui aiñumuti Simón:

—Apanqui ichacuñü pünanaquiti Señor, tapü pasabo iñemo arrüna amucanaño iñemo.

²⁵Nauquiche tüchauqui ñanitacarrüma y ñanunecacarrüma nurarrti Tuparrü, süroma tato au Jerusalén arrübama apostolerrü. Urapoimia

arrüba omirriantai manitacaca isiu cutubiurrü au manio sürümana poca au manu cürrü Samaria. Auqui iñataimia tato au Jerusalén.

Arrti Felipe ichepeti maniqui ñoñünrrü auqui Etiopía

²⁶Nauquiche tüpasao arrüna sane, tamanti ángel cuatitü esaquiti Señor, iñataiti esati Felipe, nanti ümoti:

—Atüsaí, acosi isiu manu cutubiurrü sürotü auqui Jerusalén ümo mancarrü niyücürrü au Gaza. Arrüna cutubiurrü pasao auqui manu rroense pururrü cüosorrü y canca.

²⁷Auqui arrti Felipe acomoraboti, sürotitü. Aiñanainti isiu manu cutubiurrü. Icuñunutiti taman ñoñünrrü auqui manu cürrü Etiopía. Ministroti acamanu esa manu paürrü nuriaburrü, nürirri Candace. Bacuirarati itacu nanaiña nimonirri. Yebotitü au Jerusalén nauqui anaunti ümoti Tuparrü. ²⁸Basücübücoti tato, niyücürrti tato au nicürrti. Tümonsoti au nesarrti carro. Anati lehoboti manu liburrü corobo tücañe uiti profetarrü Isaías. ²⁹Auqui nanti Espíritu Santo ümoti Felipe:

—Acosi esa nanta carro.

Arrti Felipe sürotitü.

³⁰Nauquiche iñataiti esa, oncoiti manu leheboti maniqui ministro Nicororrü uiti Isaías. Ñanquitioti pünanaquiti:

—¿Iyebo obi arrüna lehebocü? ¿Arrianca iñununecañu?

³¹Auqui nanti maniqui ñoñünrrü ümoti Felipe:



(Hch. 8.28)

—Chüpuerurrüpi aye sobi, champüti naqui uiche aiñununecanañü.
 Mejor ariacu au na carro, atümo rrupetacuñü.
 Auqui sürotitü ape Felipe, atümoti ipetacuti.
³²Arrümanu Nicorurrü leheboti nantü sane:
 Sürotitü uimia nauqui aconti tacana arrone nobirrama.
 Chütosibicotipü, ichübotiyüatai ümoma tacana arrone nobirrama,
 arrtü sürotü atapaqui
³³Itaquisünüancanamati, y champüti naqui ocümana itacuti.
 Pero sürümanama bama icocoromati, chüpuerurrüpi uipiacümuncunuma,
 itopiqui taborioti icu na cürrü y sürotitü au napese uiti Tuparrü.
 Sane nurapoi manu Nicororrü.
³⁴Auqui arrti maniqui ñoñünrrü ñanquitioti pünanaquiti Felipe:
 —Asamu nurria iñemo, urasoi isucarüñü arrüna sane: ¿Artri profetarri
 manitanati ümotiatöe o ümoti quiatarri?
³⁵Auqui artri Felipe urapoiti isucarüti isane nurapoi manu Nicororrü. Nanti
 sane: Arrüna Nicororrü urapoi arrüna urriampae manitacarrü icütüpüti Jesús.
 Sane ñanitacarri Felipe, niyücürümmainqui isiu cutubiurrü. ³⁶Auqui
 iñataimia esa turrü, nanti maniqui ñoñünrrü ümoti Felipe:
 —Auna ane turrü. ¡Causane chisüriquiapü caüma auna obi!
³⁷Auqui nanti Felipe ümoti:
 —Artrü aicococati Jesús aübu nanaiña nausasü, puerurrü üriquia sobi.
 Auqui aiñumuti maniqui ñoñünrrü:
 —Chauqui te ticococati nurria Jesús, ta tonenti Aütorrti Tuparrü.
³⁸Au manu rratörri itochenacatati manu carro. Süroma acü. Aüromatü
 eana manu turrü. Acamanu ürioti maniqui ñoñünrrü uiti Felipe.
³⁹Nauquiche cauma tato taiyiritu, artri Espíritu Santo iquianatiti Felipe.
 Artri maniqui ñoñünrrü champürrtü asariquiarütitiqui. Auqui sürotitito,
 niyücürri au nicürri aübu tarucu nipucünuncurri isiu manu cutubiurrü.
⁴⁰Na artri Felipe tanati uiti Espíritu Santo au manu pueblurrü nürirri Azoto.
 Auqui taha sürotitü auqui puebluca, nauqui uraboiti arrüna urriampae
 manitacarrü, hasta qui iñataiti au manu pueblurrü nürirri Cesarea.

Iñorronconotiyü Saulo

9 ¹Tapü artri Saulo tüboricotiatati ümo bama icocoromati Señor, rranrti
 nauqui acoma. Sane nauquiche sürotitü esati maniqui yarusürürrü
 sacerdoterrü au Jerusalén. ²Ñanquitioti quichonimiacarrü pünanaquiti,
 nauqui puerurrü aürotitü au ba poca sinagoga au manu pueblurrü
 nürirri Damasco, nauqui apacheti bama aboma aübu arrüna nuevurrü
 manunecatarri. Rranrti nauqui aüroma au preso uiti au Jerusalén,
 mañoñünca y paüca. Auqui torrio ümoti uiti yarusürürrü sacerdote. Sürotitü.
³Pero nauquiche tanati taha saimia manu pueblurrü nürirri Damasco,

rrepenteatai cuara itupecuti auqui napese. ⁴Auqui paquioti acü chachuqui niyaburrü cabayurrü. Auqui oncoiti manitacarrü, nantü ümoti sane:

—Saulo, Saulo, ¿causane atüboriquiatái inëmo?

⁵Auqui arrti Saulo ñanquitioti:

—¿Ñacucü, Señor?

Aiñumu manu manitacarrü:

—Arrüñü Jesús, naqui ümoche atüboriquiatái. Churriampü nachücoi aemoantoe. Tacana arrone buyese bapateara icutacu suese mapirrumuturrü.

⁶Auqui arrti Saulo paichocononoti ui nirrururti, nanti:

—Señor, ¿causane caüma sobi?

Auqui nanti Señor ümoti:

—Atüsai, acosi au pueblurrü Damasco. Taha torrio aemo achücoboibocü.

⁷Arrübama mañoñunca amoncoma ichepeti Saulo tarucu nicütobürrüma, itopiqui oncoimia manu manitacarrü, pero champürrtü asaramatü ümoti naqui manitana. ⁸Auqui arrti Saulo atüraití, rranrrtipü asaratitü, pero chauqui chüpuerurrüquipü. Auqui ipiasurumati, süromatü aübuti au Damasco. ⁹Terri naneneca nacarrü acamanu. Champürrtü puerurrü asaratitü. Chübasotipü, ni achatipito.

¹⁰Au manu pueblurrü Damasco anancati taman ñoñünrrü icocorotiti Jesús, nürirrti Ananías. Artti Señor itusiancanatüyü isucarüti, nanti ümoti:

—iAnanías!

Artti aiñumuti:

—Auna niyaca, Señor.

¹¹Auqui nanti Señor ümoti:

—Atüsai. Acosi isiu manu cayarrü nürirri “Besüro”. Acosi au niporrti Judas, anquisioti taman ñoñünrrü, nürirrti Saulo, naqui auqui Tarso, anati meaboti. ¹²Artti te au quiatarrü narrrarri asaratitü ümoti taman ñoñünrrü, nürirrti Ananías. Sürotipo esati nauqui aiñaniontiño neherrti itati, nauqui puerurrü asarati tato.

¹³Aiñumuti Ananías:

—Señor, sürümanama urapoimia isucarüñü sobreti maniqui ñoñünrrü, y nanaiña arrüna nomünantü isamutenti au Jerusalén ümo bama icocoromacü. ¹⁴Y tücuati tauna aübu nüriacarrü ui bama üriatu sacerdoterrü, nauqui aüromatü au preso uiti bama manitana au nürü.

¹⁵Pero artti Señor nanti ümoti:

—Acosi, itopiqui titacümanauncucati maniqui ñoñünrrü, nauqui anitatu nisiüri ümo bama macrirrtianuca chütüpü israelitarrü, y ümo bama mayüriabuca y ümo bama ito israelitarrü. ¹⁶Torrio ñana ümoti itaquisürücüiboti ichopiquiñü.

¹⁷Auqui sürotitü Ananías au niporrti Judas auna cauta anati Saulo. Nauquiche tiñataiti acamanu, sürotipo esati. Inñatati neherrti itati. Nanti ümoti:

—Saruqui Saulo, artti Señor Jesús, naqui itusiancanatüyü asucarücü isiu cutubiurrü, icüpurutiñü nauqui aerotitü Espiritu Santo au nausasü.

¹⁸Au manu rratorrű bupaquio auqui nirrtorrű tacana nitaqui nopiocorrű. Auqui caüma puerurrű asarati tato. Atüraiti tato. Ürioti. ¹⁹Auqui basoti, cusüuruti tato. Auqui anancati ichepe bama icocoromati Jesús au Damasco.

Manunecanati Saulo au Damasco

²⁰Auqui caüma urapoiti nürirrű Jesús au ba poca sinagoga, cauta nantarrű meaboma bama israelitarrű. Nanti que arrti Jesús tonenti Aüitorrű Tuparrű. ²¹Namanaiña bama amoncoma acamanu cütobüsoma ui arrűna nurarrű. Namati: —Abu tonenti maniqui ñoñünrrű anati isiu bama urapoimia nürirrű Jesús au Jerusalén aübu tarucu nitüborirrű ümoma. ¡Acaso chütonentipü naqui cuatü tauna nauqui aüromatü uiti au Jerusalén, nauqui atomoema uiti, y atorrímia ümo bama üriatu sacerdoterrű!

²²Pero arrti Saulo manitanati aübu tarucu nüriacarrű. Urapoiti isucarüma, que arrti Jesús tonenti Cristo. Hasta que chütusioquipü isane urapoboiboma bama israelitarrű, bama pohoso au Damasco.

Besüburuti Saulo ñünana bama israelitarrű

²³Tomenotü sürümana naneneca, arrübama israelitarrű chépatái ñapensacarrüma nauqui aítabajomati Saulo. ²⁴Pero arrti ipiatenti. Arrüma naneneca y tobiquia barrüperarama ubabeu turuca au manu narriporrű itupecu pueblurrű, nauqui aítabajomati. ²⁵Pero arrübama icocoromati Jesús iñanamati au taman noconorrű sürümanarrű. Sürotitü acü au tobirri cütüpüqui narripo manu pueblurrű. Sane nauquiche besüburuti.

Anati Saulo au Jerusalén

²⁶Nauquiche iñataiti Saulo au Jerusalén, rranrrtipü aürotitü ichepe bama icocoromati Jesús. Pero arrüma birrubuma ñünanati, itopiqui chicocotapümainquipü arrtü titorrimiatati nisüboriquirrű ümoti Jesús. ²⁷Tapü arrti Bernabé bayurarati ümoti. Sürotitü aübuti nauqui aitusiancanatiti isucarü bama apostolerrű. Urapoiti isucarüma nauquiche itusiancanatiyü Señor isucarüti Saulo isiu cutubiurrű. Sane ito urapoiti nauquiche anitati Señor ümoti, y manitanati au nürirrű Jesús aübu nanaiña narucurrű ümoti au Damasco. ²⁸Auqui arrti Saulo anati au Jerusalén ichepe bama apostolerrű. ²⁹Manitanati au nürirrű Señor Jesús aübu tarucu narucurrű ümoti. Baparioti y uratoquioti aübu bama israelitarrű, arrübama manitanama griegorrű. Pero arrüma caüma rranrrüma aítabajomati. ³⁰Nauquiche ipiatema bama icocoromati Jesús, iquianamati Saulo au Cesarea. Auquimanu masamunuma nariorrű ümoti, y arrti sürotitü au nesarrű pueblurrű, nürirri Tarso.

³¹Sane nauquiche caüma arrübama icocoromati Jesús au manio cüca Judea, Galilea, y Samaria, urriampae nacarrüma. Chauqui tüpasao nitaquisürücüirrüma. Manrrű iyebo uimia nurarrű Tuparrű. Bavivicoma aübu ñaquioncorrüma iyoti Señor Jesús. Arrti Espíritu Santo bayurarati ümoma. Y manrrű nubiquirrimia.

Urriancati tato Eneas

³²Artri Pedro anancati bapasearati au nanaiñantai ümo bama yaruquitorrti au nürirrti Jesús. Sürotitito apaseati ümo bama icocoromati Jesús, bama pohoso au manu pueblurrü nürirri Lida. ³³Acamanu icuñunutiti taman ñoñünrrü, nürirrti Eneas. Tütabe ocho añoca ñaunrococorrti, chüpuerurrüpü amenti, ni atüraitipü. ³⁴Auqui nanti Pedro ümoti:

—Eneas, artri Jesucristo bacurarati aemo. ¡Atüsai, aicomora nacüru! Au manu rratörri atüraiti Eneas. ³⁵Namanaiña bama pohoso au Lida y arrübama ito auqui manu cürrü Sarón asaramati. Acamanu iñoconiomata arrüba antiburrü chomirriampü ñacoconauncurrüma y icocoromati caüma Señor.

Süborico tato Dorcas

³⁶Aumanu tücañe tiemporrü ananca taman paürrü nürirri Tabita au manu pueblurrü Jope. Auqui griego nürirri “Dorcas”. Arrüna paürrü nisüboriquirri bien urria, bayurara ümo bama champü isane ümoma. ³⁷Au manio naneneca maunrocono, y auqui coiño. Nauquiche titopiancatama, iñatama au taman cuarto ape au segundo piso. ³⁸Arrümanu pueblurrü Jope ane saimía Lida, auna cauta anancati Pedro. Arrübama icocoromati Jesús tusio ümoma, taha nacarrti. Bacüpuruma ümo torrü mañoñünca nauqui uraboimia isucarüti. Iñataimia esati, namatü ümoti:

—Ariacu au Jope, apuraurrücü.

³⁹Auqui sürotitü Pedro ichepema. Nauquiche iñataiti taha, iquianamati au manu cuarto auna cauta ananca nicunturrü. Y arrüba biuraca abe itupecuti Pedro ubareoro, opitusiancata isucarüti arrüba tepoyaca y camisaca omirriante ñome ui Dorcas, nauquiche süboricoiqui. ⁴⁰Auqui artri Pedro bacüpuruti ümo namanaiña ariorrüma türüpo. Artri caüma bachesoiyoti y meaboti, narrtartri ümo manu paürrü coiño. Nanti ümo:

—¡Tabita, atüsai!

Auqui iyaüburio nirrtorrü, asaratü ümoti Pedro. Auqui tümonso. ⁴¹Artri Pedro iñentati nehese, iñatünaiñacatati. Auqui tasuruma uiti bama icocoromati Jesús y arrümanio biuraca. Itusiancatati isucarüma, süborico tato. ⁴²Arrüna sane isamutenti Pedro, ipiatema au nanaiña pueblurrü Jope. Sane nauquiche caüma süürümanama bama icocoromati Señor. ⁴³Artri Pedro süsioti au Jope ümo manio naneneca au niporrti Simón, naqui masamunu sueraca.

Artri Pedro ichepeti Cornelio

10 ¹Au manu pueblurrü nürirri Cesarea anati taman ñoñünrrü nürirrti Cornelio. Artri capitanti ümo manu batallón nürirri Italiano. Rromanorrti. ²Artri maniqui ñoñünrrü iñanaunutiti Tuparrü aübu nanaiña nesartri familiarrü. Nantarrai aquionotiyü iyoti Tuparrü. Macumananati

monirri nauqui ayurati ümo bama israelitarri. Champü isane ümoma. Naneneca meaboti ümoti Tuparrü. (Abu champürrti israelitarri.)

³Taman nanenese, taqui a las trerrü isiu nímüürü, asaratitü au quiatarrü narrrarti ümoti taman ángel esaquiti Tuparrü. Arrti maniqui ángel sürotipo esati auna cauta anancati. Nanti ümoti:

—¡Cornelio!

⁴Besüro narrrarti Cornelio ümoti ángel, tarucu nirrurrti. Auqui ñanquitioti pünanaquiti:

—¿Isane, Señor?

Auqui nanti ángel ümoti:

—Arrti Tuparrü yasutiuti arrüba neanca, y arrüba nayuraca ümo bama champü isane ümoma. ⁵Acüpu ümo bama mañoñünca nauqui aüromatü au pueblurrü Jope, nauqui aitasurumati Simón, naqui nürirtito Pedro. ⁶Arrti anati alojaboti au niporrti quiatarrü Simón, naqui ipiaca asamu sueraca. Arrüna niporrti ane abeu narubaitu turrtü. Uiti caüma urapoiti asucarücü isane arrüna tiene que aisamune.

⁷Auqui sürotitü maniqui ángel. Arrti Cornelio batasuruti ümo torrü mañoñünca imostoti, y ümotito taman sortaborrü, naqui bien aquionotiyü iyoti Tuparrü. ⁸Urapoiti isucarüma nanaiña arrüna pasabo ümoti. Auqui bacüpuruti ümoma au manu pueblurrü Jope.

⁹Au manu quiatarrü nanenese, nauquiche tütaboma saimia Jope, arrti Pedro sürotitü ape onü porrü, tose, na eanti. (Como taha planurrü nichacu niporrüma.) ¹⁰Acamanu ape cürüpioti, rranrti aati. Manquioti pemacarrü. Mientras barrüperarati acamanu ape ümo pemacarrü, asaratitü auqui quiatarrü narrrarti: ¹¹Asaratitü ümo napese aurübo. Cuatü auqui ape acü tacana arrone tusiana. ¹²Au manu tusiana abe aruqui nanaiña numuquianca, arrüba abe cuatro niyopopese, abe ito noirroboca y nutaumanca. ¹³Auqui oncoiti taman manitacarrü, nantü ümoti sane:

—¡Atüisai Pedro. Atabai manio numuquianca, y aha!

¹⁴Auqui aiñumuti Pedro:

—No, chirrancapü, Señor. Itopiqui enterurrü nisüboriqui champü tirraca arrümanio omünantatai suiñemo bama israelitarri. ¹⁵Auqui rabotü tatito manu manitacarrü, nantü ümoti:

—Arrti Tuparrü nanti, arrüba numuquianca omirria, tapü aquirrtoca ñomünana.

¹⁶Pasao sane trerrü veserrü. Auqui süro tato au napese manu tusiana. ¹⁷⁻¹⁹Arrti Pedro anati ñapensatioti:

—Isanempü ümoche arrüna yarrtai?

Au manu rratorrü iñataimia au pueblurrü arrümanuma mañoñünca esaquiti Cornelio, ñanquiquirrimia iyo niporrti Simón. Aiñanaimia abeu tururrü. Ñanquitioma acamanu, arrtü anati maniqui nürirrti Simón Pedro. Tapü arrti Pedro mapensaratiqui ümo manu arrtai. Auqui nanti Espíritu Santo ümoti:

—Taha acü aboma trerrüma mañoñünca, yapacheriurumacü. ²⁰Acosi tato acü. Acosi ichepema. Tapü airruca, itopiqui ta sobi icüpuruma.

²¹ Auqui süroti tato Pedro acü auna cauta aboma manuma mañoñünca yacüpuurrti Cornelio. Nanti ümoma:

—Arrüñü Simón Pedro. ¿Apapachequiucañü?

²² Auqui aiñumuma:

—Sobecatü ui yacüpuurrti capitán Cornelio. Arrti maniqui ñoñünrrü bien aquionotiyü iyoti Tuparrü. Y arrübama israelitarrü ane ñanauncurrüma ümoti. Tamanti ángel esaquiti Tuparrü nanti ümoti que tiene que acüputi mañoñünca, nauqui aitasurumacü, au niporrti, na onsapeti nura.

²³ Auqui tasurumapo uiti Pedro. Arrümanu tobirri aboma acamanu ichepeti. Nauquiche tütaneneca, sürotitü ichepema. Süromatito ichepema bama mümanama icocoromati Jesús auqui Jope.

²⁴ Au quiatarrü nanenese iñataimia au manu pueblurrü nürirri Cesarea, auna cauta pohosoti Cornelio. Acamanu anancati barrüperarati icümenuma aübu bama ipiarientetorrti. Aboma ito bama nesarrti amigorrü, bama manrrü cuasürüma ümoti. ²⁵ Nauquiche iñataiti Pedro au niporrti Cornelio, sürotitü cümenuti nauqui asuriurutiti. Bachesoiyoti esati, nauqui anaunti ümoti. ²⁶ Pero arrti Pedro iñatünaiñacanatiti, nanti ümoti:

—Atüsaí, arrüñü ñoñünrrüñüatai, tacana naca.

²⁷ Baparioma niyücürümampo. Acamanupo asaratitü Pedro ümo bama sürümanama macirrtianuca, iyoberabaramacü. ²⁸ Auqui nanti ümoma:

—Tusio nurria aume churriampü sopiyoberabara somü aübuti taman extranjerurrü, ni puerurrüpü supapasea au niporrti. Pero arrti Bae Tuparrü iñunecanatiñü, tapü ünantü iñemo nacarrüma bama chütüpü israelitarrüma. (Tone ümoche arrümanu quiatarrü narrtarrti.) ²⁹ Sane nauquiche isecatatai ümo na napatasucu. Irranca caüma atusi iñemo ümoche apitasuruñü.

³⁰ Auqui aiñumuti Cornelio:

—Tütabe cuatro naneneca arrüna horarrü isiu nimümürrü yaca auna nipo, rreanca, tacana arrüna isamute isiu nimümüca. Rrepenteatai anancati yesañü taman ñoñünrrü cuaratai naibirrti. ³¹ Nanti iñemo: “Cornelio, arrti Tuparrü oncoiti arrüba neanca. Aquionotiyü ümo arrüna nayuraca ümo bama champü isane ümoma. ³² Acüpu au manu pueblurrü Jope, nauqui ayeti Simón Pedro. Anati alojaboti au niporrti quiatarrü Simón, naqui ipiaca asamu sueraca. Ane niporrti abeu narubaitu turrü. Arrtü tanati Simón Pedro auna achepecü, baparioti aübucü”. ³³ Auqui caüma rracüpuca ácü au manu rratörri. Asamuca nurria suiñemo, ayecatü tauna. Caüma subaca auna chépe somü isucarüti Tuparrü, nauqui uraboi suisucarü nanaiña arrüna yacüpuurrti Señor aemo.

Nisermorrri Pedro au niporrti Cornelio

³⁴ Auqui caüma manitanati Pedro ümoma, nanti sane:

—Caüma chauqui tütusio iñemo que chepatai nacarrüma mañoñünca ümoti Tuparrü, bama israelitarrü y bama maquiataca. ³⁵ Au cualquierarrü nación yasuriurutiti naqui aquionotiyü iyoti, naqui isamutenti arrüba omirria.

³⁶Arrti Tuparrü manitanati ümo bama auqui Israel. Urapoiti arrüna urriampae manitacarrü, nauqui urria suisüboriqui uiti Jesucristo. Tonenti Señor ümo nanaiña genterü icu na cürri. ³⁷Tusio nurria aume arrüna pasabo au nicü bama israelitarrü. Comensabo auqui Galilea, nauquiche anancati Juan Bautista. Urapoiti maunimiacarrü. ³⁸Tusio aume, torrioti Espíritu Santo icusiubuti Jesús naqui auqui Nazaret. Arrti masamunuti arrüba omirria auqui namenrri au nanaiñantai. Urriancama tato uiti bama taquisürü uiti choborese. Arrüna sane isamutenti, itopiqui arrti Tuparrü anati ichepeti. ³⁹Arrüsomü sumarrtai nanaiña arrüna isamutenti au camporrü y au Jerusalén. Ìñotorrimianamati apü curusürü, y sane coiñoti uimía. ⁴⁰Pero uiti Tuparrü süboricoti tato pürücü manio trerrü naneneca. Uitito itusiancanatüyü suisucari. ⁴¹Pero sí, champürtrü itusiancanatüyü isucari namanaiña macirrtianuca, ta suisucariatai, arrüsomü suichacümanauncuca uiti Tuparrü ümo arrüna sane. Arrüsomü suichaca y subaca ichepeti, nauquiche tüsüboricoti tato eanaqui macoiñoca. ⁴²Bacüpurutito suiñemo nauqui suburaboi isucari genterü, ta arrti Jesús naqui tacümanauncunuti uiti Tuparrü, nauqui acurrati ñana aübu bama süborico y aübu bama tücoiño. ⁴³Tücoboi tücañe urapoimía bama profetarrü niyequirrti Jesús. Namatü que arrti naqui icocorotiti, morrimiacana tato arrüba nomünantü uiti.

Yasuriurumati Espíritu Santo bama chütüpü israelitarrü

⁴⁴Nauquiche anancatiqui manitanati Pedro, rrepenteatai cuati Espíritu Santo au nausasürüma manuma amoncoma onsapecoma. ⁴⁵Tapü arrübama icocoromati Jesús, bama israelitarrü, ichepeti Pedro, cütobüsoma, itopiqui arrti Espíritu Santo cuati au bama chütüpü israelitarrü. ⁴⁶Itopiqui oncoimía arrüna ñanitacarrüma au quiatarrü manitacarrü uiti Espíritu Santo, ñanauncurrüma ümoti Tuparrü. ⁴⁷Auqui nanti Pedro ümo bama icumpañeruturrti:

—Champüti puerurrü ocütünaun itacu arrüna nauqui ürimía bama macirrtianuca. Ta cuati Espíritu Santo auma, tacana arrüna niyequirrti usau tücañe.

⁴⁸Auqui bacüpuruti nauqui ürimía au nürirrti Jesucristo. Arrüma ñanquitioma pünanaquiti, nauqui asiotti acamanu ichepema ñome manio naneneca.

Arrti Pedro urapoiti ümo bama icocoromati Tuparrü au Jerusalén

11 ¹Arrübama apostolerrü y arrübama yaruquitorrüma Jesús au Judea ipiatema arrüna icocoromati Jesús bama chütüpü israelitarrü y yasutiuma nurarrti Tuparrü. ²Nauquiche ññataiti tato Pedro au Jerusalén, uratoquioma ümoti manuma israelitarrü bama icocoromati Jesús. ³Ñanquitioma pünanaquiti:
—¿Causane aürotü apasea ümo bama chütüpü israelitarrü, y toabiarrü aca pemacarrü ichepema?

⁴Auqui arrti Pedro urapoiti isucarüma nanaiña arrüna pasabo auqui maübo. Nanti sane:

⁵—Arrüñü anacañü au pueblurrü Jope, anancañü rreanca. Acamanu yasacatü au quiatarrü niyasata ümo taman tusiana sürümanarrü. Cuatü auqui napese yesañü. ⁶Auqui yasaboriquia isane ane ahu. Auqui yasaquio aruqui nanaiñantai numuquianca, noirroca, y nutaumanca. ⁷Y auqui ñoncoi taman manitacarrü, nantü sane inemo: “Atüisai Pedro, atabai manio numuquianca, y aha”. ⁸Auqui sucanañü: “No, chirrancapü Señor, itopiqui champü tirraquio arrüba omünantatai”. ⁹Auqui nantü tatito inemo manu manitacarrü auqui napese: “Arrti Tuparrü nanti: Omirria arrümanio numuquianca, tapü aquirrtoca ñomünana”. ¹⁰Trerrü veserrü pasabo arrüna sane, auqui süro tato au napese manu tusiana. ¹¹Au manu rratorrü inataimia trerrü mañoñünca au manu porrü auna cauta anancañü. Cuamatü iyoñü auqui manu pueblurrü nürirri Cesarea. ¹²Auqui arrti Espiritu Santo icüpurutiñü nauqui yerotü isiuma y tapü ane penarrü sobi. Auqui icocotatai. Süromatü suisu bama seirrü masaruquитайqui. Numo sopiñatai au Cesarea, nanaiña somü somecatüpo au niporrti maniqui ñoñünrrü. ¹³Arrti caüma urapoiti suisucarü arrüna pasabo ümoti au niporrti. Asaratiti taman ángel, atüraiti esati. Nanti ümoti: “Acüpu ümo bama mañoñünca na aüromatü au pueblurrü Jope, aitasurumati Simón Pedro. ¹⁴Arrti caüma urapoiti asucaricü causane nauqui ataesübu eanaqui nomünantü, arrücü ichepe nanaiña naesa familiarrü”. Sane nurarrti ángel ümoti. ¹⁵Nauquiche anancañü rranitaca ümoma, arrti Espiritu Santo cuati auma, tacana arrone cuatito usahu tücañe. ¹⁶Auqui rraquioncañü ümo arrüna nurarrti tücañe Señor suiñemo, nauquiche nanti: “Ñemanauncurraote arrti Juan Bautista maunimianati aübu turrü. Pero caüma arraño abüriquia uiti Espiritu Santo”. ¹⁷Arrti Tuparrü macunusüancanati ümo bama chütüpü israelitarrü, isiatai tacana arrüna ñacunusüancacarrti oemo, bama uicococati Jesucristo. Así que chiüpuerürüpü te suratoqui ümoti Tuparrü.

¹⁸Nauquiche oncoimia arrüna sane bama masaruquитайqui au nürirrti Jesús au Jerusalén, urria ümoma. Inanaunumati Tuparrü, namatü:

—iSane ito arrti Tuparrü torrio uiti ümo bama chütüpü israelitarrü, nauqui puerurrü aiñorronconomacü, y sane ito aye uima isüboriquiboma, arrüna chütacürusupü!

Bama icocoromati Tuparrü au Antioquía

¹⁹Nauquiche titabairomati Esteban tücañe, tüboricoma ito ümo nanaiña bama icocoromati Jesús. Aboma bama besüburu au manio cüca Fenicia y au Chipre. Aboma ito bama inataimia au manu pueblurrü Antioquía. Urapoimia arrüna nurarrti Tuparrü ümo bama israealitarrü, bama pohoso acamanu. Pero churapoipüma isucarü bama chütüpü israelitarrü. ²⁰Pero au manu pueblurrü Antioquía aboma bama auqui Chipre y auqui Cirene, bama icocoromati Jesús. Arrüma caüma manitanama ümo bama chütüpü israelitarrü. Urapoimia isucarüma arrüna urriampae manitacarrü icütüpüti Señor Jesús. ²¹Torrio

ümoma üriacaboma uiti Señor. Sane nauquiche iñocotama arrüna churriampi ñacoconauncurrüma tücañe y icocoromati Señor Jesús.

²²Arrübama icocoromati Jesús au Jerusalén ipiatema arrüna sane. Arrüma caüma icüpurumati Bernabé au Antioquía. ²³Nauquiche tiñataiti taha, arrtaiti arrüna ñacunusüancacarrti Tuparrü acamanu ümoma, tarucu nipucünuncurrti. Macuansomoconoti ümoma tapü iñocotama ñacoconauncurrüma ümoti Señor. ²⁴Artri Bernabé bien buenorrti y tusio nicusüurrti Espíritu Santo auti. Oncotitü ümoti Tuparrü. Sane nauquiche sürümanama icocoromati Señor uiti au Antioquía.

²⁵Tomenotü naneneca. Auqui artri Bernabé sürotitü au manu pueblurrü nürirri Tarso apacheriuruti Saulo. ²⁶Nauquiche tabücoti uiti, sürotitü ichepeti au Antioquía. Acamanu aboma ümo taman añorrü ichepe bama maquiataca icocoromati Jesús. Manunecanama ümo sürümanama macrirrtianuca. Au manu pueblurrü Antioquía arrübama pohoso aübo iñatama üribo “crrirtianurrü” bama icocoromati Cristo.

²⁷Au manio naneneca aboma bama cuamatü auqui Jerusalén au Antioquía, arrübama ipiacama anitama au nürirrti Tuparrü. ²⁸Anati taman eanaquimia nürirrti Agabo, atüraiti eanaqui manuma icocoromati Jesús. Uiti Espíritu Santo nanti sane:

—Cuatü ñana carerrtiya au nanaiñantai icu na cürrü.

Arrümanu carerrtiya tütanen te tücañe, numo yüriaburruiqui Claudio. ²⁹Auqui caüma arrübama icocoromati Jesús au Antioquía namatü:

—Bayurara ümo bama maquiataca usaruquитайqui au nürirrti Jesús arrübama pohoso au manu cürrü Judea. Macumanana ümoma isiu arrüna ane osoi.

³⁰Icüputama manu ñacumanatarrüma aübuti Bernabé y aübuti Saulo. Arrüma süromatü aübu, nauqui aitorrimia ümo bama bacuirara itacu bama icocoromati Jesús au Jerusalén.

Niconcorrti Jacobo, anati Pedro au preso

12 ¹Au manion naneneca artri yüriaburrü Herodes bacheboti taquisürücürri ümo bama icocoromati Jesús. Tarucu nitüborirrti ümoma. ²Bacüpuruti nauqui ataboriti Jacobo ui espadarrü. Artri yaruquitorrti Juan. ³Numo asaratitü que urria yachücoiti ümo bama israelitarri bacüpuruti nauqui enti Pedro. Arrüna sane pasao au manu pierrta parrcua auche basoma pan champü levadura eana. ⁴Numo tenoti Pedro, artri Herodes bacüpuruti nauqui aüroti au preso, auna cauta abe cuatro gruporrü masortaboca bacuirarama. Au cada gruporrü aboma cuatro masortaboca. Artri Herodes rranrti acurrati aübuti Pedro, artü tüpasao manu pierrta parrcua. (Arrümanu pierrta ururau siete naneneca.) ⁵Artri Pedro anatiqui au preso. Bien bacuirarama itacuti manuma masortaboca. Pero arrübama icocoromati Jesús chüttisüropü neancarrüma ümoti Tuparrü itacuti.

Arrti Tuparrü itaesümunutiti Pedro auqui preso

⁶Numo tübupasao manio naneneca nesa pierrra, arrti Herodes rranrrtipü acurrtati au manu quiatarrü nanenese. Au manu tobirri, antes que anene, arrti Pedro anancati manumuti cümüinta torrü masortaboca, bien tomoenoti oboi torrü cadenaca apü manuma masortaboca. Arrübama maquiataca masortaboca aboma abeu tururrü, bien bacuirarama.

⁷Rrepenteatai iñataiti taman ángel esaquiti Tuparrü aumanu cauta anancati presoti. Arrümanu cuarto anentarrüpo uiti maniqui ángel. Auqui ipoconoconotiti Pedro, narrtopünacarrti ümoti y nanti ümoti:

—iAtüisai apuraucü!

Auqui caüma manio cadenaca botopüro, bupaquio cütüpüqui neherrti Pedro. ⁸Auqui nanti tatito ángel:

—iApoñoe nurria, y aiñasio nasapatu!

Nauquiche tisamutenti Pedro nanaiña, nanti ángel ümoti:

—iAiña nacüburri acütüpücu! iAriacu isiuñü!

⁹Auqui caüma sürotitü Pedro isiuti ángel. Chütusiopü ümoti arrtü ñemanauntu arrüna pasabo uiti ángel, ñaquioncorrti au niposiquirrti. ¹⁰Auqui ipiasarama manuma primer bacuirara y despues pasaoma into uimia manuma maquiataca. Auqui iñataimia esa manu tururrü fierro, ane ümo cayarrü. Aurübo uirratoe. Auqui süromatü türüpo, y amencoma isiu manu taman cayerrü. Auqui onconoti Pedro uiti ángel. ¹¹Auqui caüma tusio ümoti Pedro que arrüna sane ñemanauncurratoe, champürrtü niposiquirrti. Nanti ümotiatoe:

—Caüma tusio nurria iñemo, que arrti Señor icüpurutiti taman ángel nauqui aitaesümunutiñü ñünanati Herodes, ñünana bama israelitarrü y ñünana arrüna nitüborirrimia iñemo.

¹²Artri Pedro mapensaratiqui ümo arrüna sane. Auqui sürotitü au nipo Mariarrü, arrüna nipiäütoti Juan Marcos. Acamanu amoncoma sürtümanama macristianuca iyoberabaramacü nauqui eama. ¹³Nauquiche tiñataiti acamanu, iyotobaitati tururrü. Auqui sürotü taman cupiquirri nürirri Rode nauqui asabori quiti maniqui iyotobaita. ¹⁴Pero nauquiche tisuputacai manu ñanitacarrti Pedro, ui nipucünuncurrü champürrtü iyaübuta tururrü. Aüro tato yarucurrü uraboi tahapo, que artri Pedro anati abeu tururrü. ¹⁵Auqui namatü ümo manu cupiquirri:

—iArrücü ta aposiquia!

Pero tone urapoi que ta ñemanauncurratoe. Pero arrüma champürrtü icocotama. Namatü:

—iAensapü tonenti! iUncapü nausüpürrti!

¹⁶Tapü arrti Pedro anatiqui iyotobaitati tururrü. Nauquiche iyaübutama asaramatü ümoti, cütobüsoma. ¹⁷Pero arrti masamunuti señarrü ümoma, nauqui etayoimia. Auqui urapoiti nanaiña arrüna yachücoiti Señor aübuti, nauqui aiquiaüburutiti auqui preso. Nanti:

—Aburasoi arrüna ümoti Jacobo yaruquitorrti Juan y ümo bama maquiataca masaruquitaquí. Auquí sürotitü Pedro auquí manu.

¹⁸Numo tütaneneca, arrübama masortaboca chütusiopü ümoma isane pasabo ümoti Pedro. Tarucu penarrü uimia. ¹⁹Auquí bacüpuruti Herodes nauquí ayeti Pedro uimia. Como champütiquí acamanu, bacurrtarati aübu bama masortaboca nauquí ataborimia. Auquí sürotitü Herodes auquí Judea abiviti au Cesarea.

Niconcorrti Herodes

²⁰Au manio naneneca arrti Herodes tüboricotiatai ümo bama genterrü auquí Tiro y Sidón. Pero arrüma ichepe ma nauquí aüromatü aparimia aübuti. Itopiqui ane penarrü uimia genterrü auquí tapü chicheboiquipü uiti Herodes, apasa comirarrü uimia aquí nicürri, utuburiboma. İñataimia au Cesarea. Acamanu baprioma aübuti maniqui oficial yüriaburrü au niporrti Herodes, nürirrti Blasto. Arrti caüma bayurarati ümoma. Anquioti pünanaquiti Herodes nauquí tapü tüboricotiqui ümoma. ²¹İñatai caüma arrümanu nanenese ensümunu nauquí apariti Herodes aübuma. Au manu nanenese İñatati naibirrti omirria. Sürotitü atümoti au nesarrti tronorrü isucarü genterrü, nauquí anitati ümoma. ²²Auquí caüma bama macirrtianuca toсібicoma, namatü:

—İArrti nauquí yüriaburrü manitana tacanarrtü Tuparrti, champürrtü isiu tacana ñoñünrrtiatai!

²³Au manu rratorrü cuati taman ángel auquí napese, nauquí carrtigaboti Herodes uiti. Itopiqui isamunutiüyü tacanati Tuparrü. Maunroconoti oboi nicümüca, tacürusu oboi nañeturrti y coiñoti oboi.

²⁴Tapü arrüna nurarrti Tuparrü tusio au nanaiñantai, y sürümanama bama icocotama.

²⁵Nauquiche tacürusu yatrabacarrüma au Jerusalén, arrti Bernabé y arrti Saulo, süroma tato au Antioquía. Sürotitü isiuma arrti Juan nauquí nürirrtito uimia Marcos.

Arrti Saulo ichepeti Bernabé

13 ¹Au Antioquía amoncoma arrti Bernabé, arrti Simón, nauquí nürirrtito “Cübüsi”, arrti Lucio auquí Cirene, arrti Manaén, nauquí sunaunti ichepeti maniqui quiatarrü Herodes nauquí yüriaburrü au Galilea, y arrti Saulo. Arrüma amoncoma eana bama icocoromati Jesús. Manunecanama y manitanama uiti Espíritu Santo. ²Taman nanenese aboma manaunuma ümoti Señor. Champürrtü basoma ui ñanauncurrüma ümoti. Auquí nanti Espíritu Santo ümoma:

—Apitacümanauncusuma bama torrü mañoñünca, arrti Saulo ichepeti Bernabé, itopiqui tasuruma sobi ümo niyesa trabacorrü.

³Nauquiche chauqui neancarrüma ümoti Tuparrü, İñatama neherrüma ita manuma torrü. Auquí masamunuma nariorrü ümoma.

**Arrti Saulo ichepeti Bernabé
manunecanama au Chipre**

⁴Sane nauquiche artti Saulo ichepeti Bernabé süromatü uiti Espíritu Santo. Ìñataimia au manu pueblurrü nürirri Seleucia abeu narubaitu turrü. Auquimanu süromatü isuqui. Ìñataimia au manu cürrü cümüinta turrü, nürirri Chipre. ⁵Süromatü au manu pueblurrü nürirri Salamina. Acamanu urapويمia nurarrti Tuparrü au manu porrü sinagoga, auna cauta nantarrü meaboma bama israelitarri. Artti Juan Marcos anancatito ichepema, bayurati ümoma. ⁶Amencoma au nanaiña manu cürrü Chipre. Auqui ìñataimia au manu pueblurrü nürirri Pafos. Acamanu anancati taman cheserurrü israelitarri, nürirrti Barjesús, naqui tarucu nipiacarri. Auqui manitacarrü griego nürirrti Elimas. Artti nanti que manitanati au nürirrti Tuparrü, abu ñapanturrti. ⁷Ñantarrtai anati ichepeti yüriaburrü Sergio Paulo. Pero artti naqui yüriaburrü tarucu ñapanauncurrti. Bacüpuruti iyoti Bernabé y iyoti Saulo, itopiqui rranrti onsapeti nurarrti Tuparrü. ⁸Ìñataimia esati. Pero caüma artti maniqui cheserurrü Barjesús, anatito acamanu. Ünantü ümoti arttü icocotati nurarrti Tuparrü maniqui yüriaburrü. Manitanati churriampü ümoti Bernabé y ümoti Saulo isucarüti yüriaburrü Sergio Paulo. ⁹Auqui artti Saulo, naqui nürirrtito Pablo, ui nicüsürti Espíritu Santo asaratitü nurria ümoti maniqui cheserurrü, ¹⁰nanti ümoti:

—¡Arrücü tarucu naencaña, churriampü nasüboriqui, arrücü aütorrti choborese, ünantü aemo nanaiña arrüba omirria! ¡Arrücü ucanü que mapancarrü arrüna ñemanauncurraoe nurarrti Tuparrü! ¹¹Caüma carrticabocü uiti Señor. Asupuca caüma auba naneneca, chüpuerurrüpi asaratü ümo nanentarrü.

Au manu rratorrü chauqui chasaratitüquipi, tacanarrtü anati au tomiquianene. Bapacheroti quiti naqui uiche aipiasurutiti. ¹²Artti yüriaburrü Sergio Paulo arrtaiti nurria nanaiña arrüna pasabo. Tarucu nicütobürri ui arrüna manunecatarrü icütüpüti Señor. Auqui icocorotitito Tuparrü.

**Artti Pablo ichepeti Bernabé au Antioquia
au manu cürrü Pisidia**

¹³Artti Pablo y arrübama icumpaüneruturrti süromatito isuqui turrü auqui Pafos. Ìñataimia au manu pueblurrü Perge, ane au manu cürrü Panfilia. Tapü artti Juan Marcos auqui manu basücübücoti tato au Jerusalén. ¹⁴Auqui artti Bernabé ichepeti Pablo pasaoma ito auqui Perge, süromatü au manu pueblurrü nürirri Antioquia au manu cürrü Pisidia. Au manu nanenese nesa macansacarrü süromatü au manu porrü sinagoga auna cauta meaboma bama israelitarri. Ìñataiamiampo, tümonsoma. ¹⁵Acamanu bolehebo manio libruca nesa nüriacarrü y nesa bama profetarri. Auqui caüma arrümanuma ane nüriacarrüma au manu sinagoga bacüpuruma ümoti taman ariorrti esati Bernabé y artti Pablo, uraboiti ümoma:

—Masaruquитайqui, arrtü ane aburapoboibo isucarü genterrü, puerurrü apanitaca isucarüma.

¹⁶Auqui atüiraiti Pablo, masamunuti señarrü ui neherrti, nauqui etayoimia macirrtianuca. Auqui nanti ümoma:

—Amonsoi arraño mañoñunca auqui Israel ichepe bama aquionomaciü iyoti Tuparrü. ¹⁷Noesa genterrü israelitarrü iñanaunumati Tuparrü.

Tacümanauncunuma tücañe uiti bama uyaüitaqui. Uiti caüma chiyaupü nubiquirrimia, nauquiche amoncomainqui pohosoma tacana extranjerurrüma au manu cürri Egipto. Auqui taesüburuma ui tarucu nicüsürrti Tuparrü.

¹⁸Abantaboti ümo arrüba nisüboriquirrimia churriampatai, nacarrüma au manu rroense pururrü cüosorrü y canca, ñome cuarenta añoca. ¹⁹Naharrübama auqui manio siete manitacaca, arrübama pohoso tücañe au manu cürri Canaán, tacürusuma, itopiqui arrti Tuparrü rranrti aitorrimati nicürrüma ümo bama antiburrü uyaüitaqui. ²⁰Auqui bacheboti üriacabo bama mañoñunca eanaquimia nauqui acurrtama. Sane niyücürri ñome cuatrocientos cincuenta añoca, chepe numo anati Samuel, naqui manitanati au nürirrti Tuparrü. ²¹Auqui caüma manquioma pünanaquiti Tuparrü nauqui anati tamanti yüriaburrü ümoma.

Auqui arrti Tuparrü bacheboti üriacaboti Saúl, naqui aütorrti Cis, eanaqui nesarrti familiarrü Benjamín. Yüriaburrti ñome cuarenta añoca. ²²Auqui arrti Tuparrü iquiaübutati nüriacarrti pünanaquiti. Iñanatiti David tacana yüriaburrü ümoma. Nanti Tuparrü sane: “Itacümanauncucati David, aütorrti Isaí. Arrti naqui ñoñünrrü urria nacarrti au niyasata. Isamutenti caüma nanaiña isiu niranca”.

²³Sane nauquiche eanaqui nesarrti familiarrü David anati Jesús, naqui icüpurutiti Tuparrü, nauqui ataesübu arrüna genterrü israelitarrü eanaqui nomünantü, tacana nurarrti Tuparrü tücañe. ²⁴Nauquiche chiñataitiquipü, arrti Juan Bautista urapoiti nurarrti Tuparrü ümo nanaiña genterrü auqui Israel. Nanti ümoma, tiene que aiñorronconomaciü, nauqui ürimia. ²⁵Nauquiche tüsaimia nitacüru nisüboriquirrti Juan, nanti: “Arraño napaquionco arrüñü Cristo, abu charrüpüñü, cuatiqui isiuñü. Arrüñü champü isane niyaca ni yaserebipü pario nauqui isoquisünapü nehe nisapaturrti. Arrti ane manrrü nüriacarrti rropünanaquiñü.

²⁶Masaruquитайqui, arraño aütorrüma bama auqui nesarrti familiarrü Abraham. Y arraño ito bama aquionomaciü iyoti Tuparrü, amonsoi nurria nisura: Aume te arrüna nurarrti Tuparrü nauqui puerurrü autaesübu eanaqui nomünatü.

²⁷Arrübama pohoso au Jerusalén ichepe bama üriaturrüma champürrtü tusio ümoma isane nacarrti Jesús, ni ayepü uimia arrüba manitacaca ui bama profetarrrü, panaca nantarrtai leheboma au ba sinagoga au nanenese nesa macansacarrrü. Pero uimia te cocono arrüba nurarrüma bama profetarrrü tücañe, sane nauquiche aconti Jesús uimia. ²⁸Arrti champü nipünatenti. Pero arrüma ñanquitioma pünanaquiti Pilato nauqui ataboriti uiti. ²⁹Nauquiche tisamutema nanaiña arrüna sane icuqui Nicororrrü, iquiaüburumati apüqui curusürri y iñanamati cütü. ³⁰Pero arrti Tuparrü isümoniancanatiti tato eanaqui macoiñoca.

³¹Numo tüsüboricoti tato, itusiancanatiyü isucarü bama auqui Galilea. Arrüma

tücañe iñataimia au Jerusalén ichepeti, numo chücoiñotiquipü. Tonema bama caüma urapoimia nürirrti isucarü bama macrirrtianuca.

³²Caüma arrüsomü suburapoi ausucarü arrüna urriampae manitacarrü. Arrti Tuparrü urapoiti arrüna sane isucarü bama antiburrü tücañe. ³³Pero caüma chauqui tücocono, itopiqui chauqui tüssüboricoti tato Jesús eanaqui macoiñoca uiti Tuparrü. Arroñü te eanaqui nesarrüma familiarrü bama antiburrü. Sane ito ane corobo icu librurrü Salmo, capítulo dos. Acamanu nanti Tuparrü sane: “Arrücü isaücü, yacheca asüboriquibocü caüma”. ³⁴Sane nauquiche arrti Tuparrü isümoniancanatiti tato eanaqui macoiñoca, nauqui tapü coiñotiqui. Sane nantü icu Nicororrti: “Itorrimiana aume niñacunusüancaca tacana ümoti David tücañe”. ³⁵Sane nantito au quiatarrü Salmo: “Arrücü Tuparrücü, obi chüporeopü nañeturrti naqui baserebio aemo, naqui tarucu nicuarrti aemo”. ³⁶Arrti David tücañe baserebioti ümoti Tuparrü numo süboricotiqui. Isamutenti tacana arrüna yacüpucurrti Tuparrü ümoti. Auqui coiñoti, süroti cütü petacu bama yaütoti, y auqui caüma nicunturrti poreo. ³⁷Pero nicunturrti Jesús chüporeopü, itopiqui süboricoti tato uiti Tuparrü. ³⁸Masaruquitaquí, suraboira ausucarü arrüna sane: Uiti Jesús morrimiacana tato arrüba nomünantü osoi. ³⁹Arrüna sane champürtrü urriante ui nüriacarrti Moisés tücañe. Pero caüma arrtü amoncatü nurria ümoti Jesús, urria nabaca au narrtarrti Tuparrü. ⁴⁰Amasasai nurria masaruquitaquí, tapü apisamute tacana bama antiburrü tücañe. Tamanti profetarrrü tücañe nanti sane ümoma:

⁴¹Arraño mañentonaunca, aucütobü y amecosi auquina yesaquiñü, tapü yasiquia yarrtaiquiatü aume, itopiqui Arrüñü Tuparrüñü, ñasamuca arrüba omirriantai au ba naneneca, pero arraño chapicocoquionapü, y champü nümochio aboi arrtü anati naqui urapoi ausucarü.

⁴²Chauqui ñanitacarrti Pablo ümoma, sürotitü türüpo ichepeti Bernabé auqui manu sinagoga. Arrübama macrirrtianuca ñanquitioma pünanaquiti Pablo nauqui anitati tatito arrüna sane au quiatarrü nanenese nesa macansacarrü.

⁴³Chauqui tütacürusu arrüna nesarrüma reunión au sinagoga. Arrübama israelitarrü y arrübama maquiataca aquionomacü iyoti Tuparrü süromatü ichepeti Pablo y ichepeti Bernabé. Arrüma macuansomoconoma ümoma, tari oncomatüqui nurria ümoti Tuparrü, itopiqui tarucu nicuarrüma ümoti.

⁴⁴Quiatarrü semana au manu nanenese nesa macansacarrü iyoberabaramacü tüsaipü nanaiña macrirrtianuca auqui pueblurrü, nauqui onsaperioma nurarrrti Tuparrü. ⁴⁵Numo tarrtaimia arrüna sane bama israelitarrü, ünantü ümoma. Uratoquioma ümoti Pablo. Unumatito. ⁴⁶Auqui arrti Bernabé ichepeti Pablo manitanama aübu tarucu nüriacarrüma, namatü:

—Tiene que suisusürü suburaboi primero ausucarü bama israelitarrü arrüna urriampae manitacarrü. Pero arraño canapae chaurrianapü apasurio arrüna süboriquirri champü nitacürurrü. Caüma suburapoi ümo bama chütüpü israelitarrü, ⁴⁷itopiqui sane yacüpucurrti Señor suiñemo. Nanti sane:

Iñacü tacana basarurrü ümo bama chütüpü israelitarrü.
Urasoi arrüna mataesümunucuturrü eanaqui omünantü au
nanaiñantai icu na cürrü.

⁴⁸Arrübama chütüpü Israelitarrü oncoimia arrüna manitacarrü, y
pucünuñama nurria uirri. Namatü que urria arrüna nurarri Señor.
Namanaiña bama tacümanauncunu ulti Tuparrü na acheti isüboriquiboma
icocotama. ⁴⁹Sane nauquiche tusio arrüna nurarri Tuparrü au nanaiña
manu cürrü itupecu manu pueblurrü. ⁵⁰Pero caüma bama israelitarrü
baparioma yupu ba paüca urria ñupapanauncurrü, arrüba pasutio
ñaacoconauncurrüma bama israelitarrü. Baparioma ito aübu bama
mayarusürüca au manu pueblurrü. Rranrürüma nauqui atüborimia ümoti
Pablo y ümoti Bernabé, nauqui tapü asioma au manu cürrü. ⁵¹Sane
nauquiche aüromatito auqui manu pueblurrü. Icütobitama cütorrü apüqui
nipoperrüma, na atusi, ta ane nomünantü ui manuma pohoso.

Auqui süromatü au manu pueblurrü Iconio. ⁵²Arrümanuma pohoso
au Antioquí arrübama icocoromati Jesús, tarucu nipucünuncurrüma,
itopiqui tanati Espñritu Santo au nausasürüma.

Arri Pablo ichepeti Bernabé aboma au Iconio

14 ¹Iñataimia au manu pueblurrü nürirri Iconio. Acamanu süromatü
au manu porrü sinagoga uraboimia nurarri Tuparrü. Sürümanama
israelitarrü y sürümanama ito bama chütüpü israelitarrü icocotama. ²Pero
aboma ito bama israelitarrü chicocotapüma. Arrüma caüma manitanama
aübu bama pohoso au Iconio, nauqui atüborimia ümo bama icocoromati
Jesús. ³Pero arrübama apostolerrü süsioma acamanu ümo manio
nanenenca. Urapoimia nurarri Tuparrü aübu tarucu narucurrü ümoma y
ñaquioncorrüma ümoti Señor. Arri Señor caüma bacheboti üriacaboma
nauqui asamuma milagrorrü. ⁴Naharrübama pohoso au manu pueblurrü
chichepepü ñapensacarrüma. Aboma bama urria ümoma arrüna namatü
bama israelitarrü, y maquiataca urria ümoma arrüna namatü bama
apostolerrü. ⁵Arrübama israelitarrü, y arrübama üriaturrüma ichepe
bama chütüpü israelitarrü, tarucu nitüborirrimia ümo bama apostolerrü.
Ichepatai ñapensacarrüma nauqui anitama churriampü ümoma y
nauquito aruma canca ümoma. ⁶Pero nauquiche tütusio ümoti Pablo y
ümoti Bernabé, besüburuma au manio puebluca nobürirri Listra y Derbe,
au manu cürrü Licaonia. Aboma acamanu yutupecu manio puebluca.
⁷Acamanu urapoimia ito arrüna urria manitacarrü.

Yarurumati Pablo oboi canca au Listra

⁸Au manu pueblurrü Listra anati maniqui taman ñoñünrrü naqui
chübucusüurupü itü nipoperri auqui maübo anati icu cürrü. ⁹Arri
maniqui ñoñünrrü anancati onsapecoti nurarri Pablo. Arri Pablo

asaratitü nurria ümoti. Tütusiatai ümoti chauqui ticocotati nurarrti, sane nauqui puerurrü urrianati tato. ¹⁰Auqui nanti fuerte Pablo ümoti:

—¡Atüsay y ame!

Auqui arrti maniqui ñoñünrrü tobüsoti, amencoti tato nurria.

¹¹Nauquiche arrtaimía bama macirrtianuca arrüna isamutenti Pablo, namatü sane auqui manitacarrü Licaonia:

—Inñataimía auna uyarrüpecu arrübama matupaca, isamunumacü mañoñünca.

¹²Nürirrti Bernabé uimía Júpiter, y arrti Pablo nürirrti uimía Mercurio, itopiqui arrti manrrü manitanati. (Artri maniqui Júpiter y arrti manqui Mercurio tonema nitupa bama pohoso au Listra.) ¹³Saimía pueblurrü ane arrümanu porrü ümoti maniqui Júpiter. Artri maniqui sacerdoterrü ümoti Júpiter iquianatiño toroca y püsioa ñocoñoopobo. Artri ichepe bama macirrtianuca rranrrüma na autabori uimía manio toroca, ñacumanataboma ümo bama apostolerrü, nauqui anauma ümoma. ¹⁴Numo tütusio arrüna sane ümo bama apostolerrü iquiompünatama naibirrimía, itopiqui ünantü ümoma niyachücoimía bama pohoso. Süromatü eana bama macirrtianuca aübu nitosibirrimía, namatü:

¹⁵—¡Arraño mañoñünca! ¿Causane abasiquía apisamune arrüna sane?

Arrüsomü mañoñüncatai tacana arraño. Sobecatü suburaboi ausucarü arrüna urriampae manitacarrü, nauqui apiñoco napanauncu ñome ba piquiataca tupaca, arrüba tacana muñecaca chübosüboricopü. Mejor apasusiusurrti Tuparrü naqui süborico. Uiti urriane cürrü y napese, narubaitu turrü ichepe nanaiña arrüba basaquo icu na cürrü y eana turrü, icu ito napese. ¹⁶Chebo uiti Tuparrü tücañe ümo macristianuca nauqui aisamunema isiu nirrancarrüma. ¹⁷Pero artri itusiancanatiyü ausucarü nauqui apisuputarati. Uiti iyebo arrüna süro cütü aboi. Naneneca bacheboti amutuburibo, uitito urria nausüboriqui y uitito aupucünunca.

¹⁸Sane nurarrti Pablo ümoma. Apenarrü aicocoma. Sane nauquiche champürrtü butaborio uimía manio toroca, y chümanaunupüma ümoma.

¹⁹Auqui inñataimía manuma israelitarrü auqui Antioquía y auqui Iconio. Manitanama ümo macirrtianuca. Batacheboma uimía. Barusuma canca ümoti Pablo. Taübücoti acü oboi niyaruturrüma. Arrüma caüma ñaquiönorrüma tücoiñoti uimía. Itononomati pürücü pueblurrü. ²⁰Pero arrübama icocoromati Jesús iyoberabaramacü esati. Auqui atüraití y süroti tato au pueblurrü. Au quiatarrü nanenese sürotitü au manu quiatarrü pueblurrü nürirri Derbe ichepeti Bernabé.

²¹Acamanu manunecanama nurarrti Tuparrü. Sürümanama macirrtianuca icocotama nurarrti Tuparrü. Auquimanu süroma tato au Listra, auqui taha au Iconio, y auqui taha süromatito au Antioquía, au manu cürrü Pisidia. ²²Au manio puebluca macuansomoconoma ümo bama icocoromati Jesús, nauqui tapü batacheboma ñacoconauncurrüma ümoti Tuparrü. Namatü ümoma:

—Tiene que utaquisürü nurria, cheperrtü iyebo osoi esati Tuparrü auna cauta üriaburuti.

²³Acamanu arrübama apostolerrü tacümanauncunuma uimía bama mamayoreca na acuirama itacu bama icocoromati Jesús. Chübasopüma au manio naneneca itopiqui neancarrüma ichepema. Manquioma pünanaquiti Tuparrü, nauqui ayurati ümo bama icocoromati au manio puebluca.

Basücübücoma tato bama apostolerrü

²⁴Numo tübasücübücoma tato, pasaoma auqui manu región nürirri Pisidia, ññataimía au manu cürri nürirri Panfilia. ²⁵Acamanu urapoimía nurarrti Tuparrü au manu pueblurrü nürirri Perge. Auqui süromatito au pueblurrü Atalia. ²⁶Auquimanu süromatü au taman barco, tompücana uimía narubaitu turri. Ññataimía tato au Antioquí, auna cauta tücañe meaboma bama yaruqitorrüma itacuma na ayurati Tuparrü ümoma ümo arrüna niyatrabacacarrüma. Chauqui tisamutema. ²⁷Batasuruma ümo bama icocoromati Jesús. Iyoberabaramacü. Urapoimía isucarüma nanaiña arrüna isamutenti Tuparrü aübuma, que ta puerurrü ito aicocoromati Jesús bama chütüpü israelitarrü. ²⁸Arri Pablo y arri Bernabé süsioma arrüpecu bama icocoromati Jesús ñome sürümana naneneca.

Iyoberabaramacü au Jerusalén

15 ¹Au manio naneneca tücañe, arri Pablo ichepeti Bernabé amoncoma au Antioquí. Auqui ññataimía manuma mañöñünca auqui Judea. Arrüma manunecanama ümo bama icocoromati Jesús, namatü:

—Nauqui utaesübu eanaqui nomünantü tiene que basuriu arrümanu nisoni bama israelitarrü nürirri circuncisión arrüna torrio tücañe uiti Moisés.

²Arri Pablo ichepeti Bernabé fuerte nurria nuratoquiquirrimia ümo manuma auqui Judea. Auqui caüma arrübama icocoromati Jesús bacüpuruma ümoti Bernabé y ümoti Pablo y ümo maquiataca na aüromatü au Jerusalén, nauqui aparimía nurria ümo arrüna sane aübu bama apostolerrü y aübu bama mamayoreca acamanu.

³Auqui masamunuma nariorrü ümoma. Süromatü. Au manu nesarrüma viajerrü pasaoma auqui manio cüca nobürirri Fenicia y Samaria. Urapoimía isucarü bama icocoromati Jesús arrüna sane:

—Arrübama chütüpü israelitarrü chauqui tiñocotama arrüba ññacoconauncurrüma tücañe. Caüma ticocoromati Tuparrü.

Ui arrüna nurapoimía pucünüñama.

Auqui arri Pablo ichepeti Bernabé y arrübama icumpañeruturrüma süromatito.

⁴Ññataimía au Jerusalén. Arrübama icocoromati Jesús acamanu y arrübama apostolerrü y bama mamayoreca yasuriurumati Pablo ichepeti Bernabé y bama maquiataca. Acamanu urapoimía arrüna yachücoiti Tuparrü aübuma eana bama chütüpü israelitarrü. ⁵Acamanu aboma ito bama fariseorrü, arrübama icocoromati Jesús. Atüraimía nauqui anitama. Namatü:

—Arrübama chütütpü israelitarrü bama icocoromati Jesús, tiene que circuncidaboma. Bacüpura ito ümoma nauqui aicocoma nanaiña nüriacarri Moisés.

⁶Auqui caüma iyoberabaramacü bama apostolerrü y bama mamayoreca nauqui aicoñocama arrüna sane. ⁷Nauquiche tücoboi arrüna nuratoquiquirrimia, atüraiti Pedro, nanti:

—Bueno, bama masaruquитай, bien tusio nurria aume, que tücoboi arri Tuparrü itacümanauncunutiñü ameanauqui nauqui suraboi arrüna urriampae manitacarrü isucarü bama chütütpü israelitarrü, nauqui ataesübuma eanaqui nomünantü. ⁸Arri Tuparrü bien isuputacaiti ñapensacarrüma. Tusio oemo uiti arrüna sane, itopiqui itorrimianatiti Espiritu Santo ümoma, tacana arrüna itorrimianatitito oemo aucutanu. ⁹Arri Tuparrü chepatai ümoti nacarrüma tacana nusaca, itopiqui chauqui turria ñapensacarrüma ui na icocoromati. ¹⁰¿Causane caüma arraño chapicocotapü arrüna isamutenti? ¿Causanempü aurrianca caüma nauqui macoconaurrüma ümo nanaiña nüriacarri? Ni arrübamapü antiburrü puerurrüma aicocoma, ni arroñümpü. Itopiqui chüpuerurrüpü oñü ümo. Arrüna nüriacarri tacana taman yuburrü umianene oemo. ¹¹Arroñü utaesübuca eanaqui nomünantü ui nucua ümoti Señor Jesús. Isiuma ito cuasürüma ümoti. Sane nurarri Pedro ümoma.

¹²Auqui namanaiña etayoimia. Tapü arri Bernabé y arri Pablo urapoimia arrüba milagrorrü omirriante uimia aübu yayuracarri Tuparrü eana bama chütütpü israelitarrü. ¹³Nauquiche tocheno ñanitacarrüma, arri Jacobo nanti sane:

—Bueno, bama masaruquитай amonsapesio nisura aume: ¹⁴Arri Simón Pedro turapoiti usucarü arrüna causane uiti Tuparrü eana bama chütütpü israelitarrü. Tasuruma ito nauqui aicocoromati, y nauqui aserebimia ümoti. ¹⁵Arrübama profetarrü tücañe iconomotama ito arrüna sane. Tacana arrüna ane corobo tücañe uiti profetarrü Amos. Nantü sane:

¹⁶Arrtü tüpasao arrüna sane, iseca tato,

—nanti Señor—, nauqui urrianen tato sobi arrüna nesarri tratorrü David tücañe saübuñü.

Tiene que urrianen tato sobi aübu bama abomainqui eanaqui nesarri familiarrü.

¹⁷Auqui caüma namanaiña bama chütütpü israelitarrü yapacheriurumañü. Tonema ito caüma niyesa genterrü.

¹⁸Tisurapoicaü arrüna sane auqui ñemonca —nanti Señor.

Sane ane corobo uiti Amós.

¹⁹Sane nauquiche sucanañü aume, tapü abasiquia icuata bama chütütpü israelitarrü, bama tiñocotama arrüna antiburrü ñacoconauncurrüma, itopiqui chauqui ticocoromati Tuparrü. ²⁰Maconomona ümoma, tapü basoma nañese arrüba macumanataca ümo matupaca y tapü bavivicomainqui tacana numuquianca y tapü basomainqui numañetu

arrüba numuquianca mocoññatai chübotüsoquiopü y tapü chaboma notorrü. ²¹Itopiqui auquiapae tücañe anati au cada pueblurrü naqui urapoiti arrüna nüriacarrti Moisés. Nantarrü leheboma au nanenese nesa macansacarrü.

²²Auqui caüma chepatai ñapensacarrüma bama apostolerrü, bama mamayoreca y namanaiña bama icocoromati Jesús. Matacumanauncunuma mañonünca eanaquimia nauqui aüromatü ichepeti Bernabé ichepeti Pablo au Antioquía. Icüpurumati Judas Barsabás, y arrti Silas, arrübama ümoche oncomatü. ²³Icüputama ito arrümanu quichonimiacarrü, corobo icu sane:

“Arrüsomü apostolerrü y arrübama mamayoreca, ichepe bama icocoromati Jesús au Jerusalén, apasüsü supaquionco tanu aume bama suisaruquитай, bama chütüpü israelitarrü, arraño pohoso año au Antioquía y au manio cüca Siria y au Cilicia. ²⁴Sopipiate auna, que auquina süromatü tanu arrübama mañonünca, pero ta champürrtü supacüpuca ümoma. Asioma aucuata. Arrüchopüratai au nautanu ui nurarrüma. Y namatito aume, tiene que circuncidabo año y nauqui apicoco ito nanaiña arrüna nüriacarrti Moisés. ²⁵Sane nauquiche chepatai supapensaca nauqui supacüpu tanu ümo bama mañonünca auquina someanaqui, na aüromatü asaborimia aume, ichepe bama usaruquитай, arrti Bernabé ichepeti Pablo tonema bama tarucu nicuarrüma suiñemo. ²⁶Arrüma itorrimiatama nisüboriquirrimia ümoti Señor Jesús. Taquisürüma auqui nacarrti. ²⁷Supacüpuca ito tanu ümoti Judas y ümoti Silas. Arrüma urapoimia ausucarü nanaiña arrüna sane. ²⁸Canapae urria ümoti Espíritu Santo y urria ito suiñemo, arrtü apicocota arrüba mümanantai supacüpucu: ²⁹Tapü aubaca numañetu arrüba numuquianca mucamanana ümo maquiataca tupaca. Tacane ito tapü auchaca notorrü y tapü aubaca numañetu arrüba numuquianca mocoññatai, chübotüsoquiopü. Arrtü apicocota nanaiña arrüna sane, urria nausüboriqui. Taiquiana urria nabaca. Supaquionco tanu aume”. Sane ñaconomosorüma bama apostolerrü.

³⁰Sane nauquiche caüma masamunuma nariorrü ümoma y arrüma auquimanu besüro uimia au Antioquía. Acamanu oberabarama uimia arrübama icocoromati Jesús. Itorrimiatama ümoma manu quichonimiacarrü. ³¹Arrüma iyaübutama manu quichonimiacarrü, leheboma. Nauquiche tütusio ümoma, pucünuñama nurria ui arrüna urriampae nurarrüma ümoma. ³²Artri Judas y arrti Silas ipiacama anitama uiti Espíritu Santo. Manitanama nurria ümo bama icocoromati Jesús, tapü iñocotama ñacoconauncurrüma ümoti Tuparrü. Sane nauquiche arucu tato ümo bama masaruquитай au nürirrti Jesús. ³³Acamanu amoncoma ichepema ñome manio naneneca. Tücooi nacarrüma acamanu, arrübama au Antioquía masamunuma nariorrü ümoma na aüroma tato au Jerusalén esa bama uiche tücañe aicüpuruma. ³⁴Pero arrti Silas champürrtü rranrrti aüroto tato, süsioti au Antioquía. ³⁵Artri Pablo ichepeti Bernabé süsioma ito. Manunecanama nurarrti Señor ichepe bama aboma acamanu.

Segundo viajerrü uiti Pablo

³⁶Tomenotü naneneca. Auqui arrti Pablo nanti ümoti Bernabé:

—Curi tato bapasea ümo bama usaruquitaquí au nanaiña manio puebluca, auna cauta tücañe usurapoi nurarrti Señor, basabori ümoma causane nacarrüma.

³⁷Artri Bernabé rranrrtipü nauqui aürotitü Juan Marcos isiuma. ³⁸Pero artri Pablo chirranrrtipü nauqui aürotitü ichepema, itopiqui artri basücübücoti tato aucutanu au Panfilia, champürrtü sürotitüqui manrrü taha atrabacati ichepema. ³⁹Acamanu süroma peese. Artri Bernabé itasurutiti Marcos isiuti, süromatü au taman barco au Chipre. ⁴⁰Tapü artri Pablo itasurutiti Silas isiuti. Arrübama icocoromati Jesús au Antioquía manquioma pünanaquiti Tuparrü na aicunusüancanatiti Pablo y artri Silas nauqui urria namenrrüma tanu. Auqui süromatü acü ⁴¹auqui manio cüca Siria y Cilicia. Acamanu macuansomoconomia ümo bama yaruquitorrüma tapü inöcotama arrüna ñacoconauncurrüma ümoti Señor.

Sürotitito Timoteo isiuti Pablo

16 ¹Auqui inñataimia au manio puebluca nobürirri Derbe y Listra. Acamanu icuñunumati taman yaürrü, naqui icocorotiti Jesús, nürirri Timoteo, aüto taman paürrü israelitarrrü. Tone ito icocoroti Jesús. Artri naqui yaütoti griegorrüti. ²Arrübama pohosoma au Listra y au Iconio, bama icocoromati Jesús manitanama aübuti Pablo, namatü:

—Artri naqui Timoteo bien buenorrüti.

³Artri Pablo rranrrti nauqui aürotitü Timoteo isiuti. Auqui circuncidaboti Timoteo uiti Pablo nauqui israelitarrrüti, itopiqui namanaiña bama pohoso acamanu tusio ümoma que artri yaütoti Timoteo griegorrüti. Y sane ito tapü ünantü ümo bama israelitarrrü acamanu. ⁴Au nanaiña manio puebluca, auquiche pasaoma, urapöimía isucarü bama icocoromati Jesús arrüba yacüpucu bama apostolerrü y arrübama mamayoreca auqui Jerusalén. ⁵Sane nauquiche arrübama icocoromati Jesús manrrü narucurrü ümoma. Naneneca aboma sürümanama bama icocotama nurarrti Señor. Auqui artri Pablo ichepe bama icumpañeruturrti süromatito, niyücürüma auna sane ümo nimümürü.

Asaratitü Pablo auqui quiatarrrü narrtarrrü

⁶Pero artri Espiritu Santo chichebopü uiti nauqui aüromatü au manu cürü Asia na uraboimia nurarrti Tuparrü. Sane nauquiche pasaoma auqui manio cüca Frigia y Galacia. ⁷Auqui inñataimia isiu nabeu manu quiatarrrü cürü nürirri Misia. Auquimanu rranrrüma aüromatü au manu cürü nürirri Bitinia, pero artri Espiritu Santo chichebopü uiti nauqui aüromatü au na cauta nrrancarrüma. ⁸Pasaomantai auqui manu cürü nürirri Misia. Auqui inñataimia au manu pueblurrü nürirri Troas, ane abeu narubaitu turrrü. ⁹Acamanu artri Pablo asaratitü auqui quiatarrrü narrtarrrü au tobirri. Asaratitü ümoti taman ñöñünrrü auqui manu cürü nürirri Macedonia, topü narubaitu turrrü. Anancati atüraitü esati Pablo, nanti sane ümoti:

—Asamu nurria suiñemo, ariacu au na cürü Macedonia nauqui ayura suiñemo.

¹⁰(Arrüñü Lucas aüboqui caüma yaca ichepeti Pablo y bama maquiataca.)

Au quiatarrü nanenese tansürü acomorabo somü nauqui somenotü au Macedonia. Canapae artti Tuparrü icüpuruti somü taha, itopiqui urapoiti isucarüti Pablo au quiatarrü narrtarrti, nauqui somenotü suburaboi arrüna urriampae manitacarrü.

Artti Pablo ichepeti Silas aboma au Filipo

¹¹Sane nauquiche somenotü au barco isuqui turrü. Sopiñatai au manu currü ane cümünta türü nürirri Samotracia. Au quiatarrü nanenese sopiñatai topü narubaitu turrü au manu pueblurrü nürirri Neópolis. ¹²Auquimanu somenotito au manu pueblurrü Filipos auna cauta tucoboi yaviviquirrimia bama rromanorrü. Arrümanu pueblurrü tane manrrü sürümanarrü au manu cürü Macedonia. Acamanu subaca ñome manio naneneca. ¹³Iñatai manu nanenese nesa macansacarrü. Subacatü auqui pueblurrü taha esa manu sapoco auna cauta nantarrü meaboma bama israelitarrü. Acamanu suichümoca nauqui suburaboi arrüna urriampae manitacarrü ñome ba paüca israelitarrü, ba amonqio opiyoberabaraño acamanu. ¹⁴Ane ito taman pärrü omeana nürirri Lidia auqui manu pueblurrü nürirri Tiatira. Arrümanu pärrü mapaventecana corteca bocüturiqui, arrüba bien omirria. Iñanaunutito Tuparrü. Tone ananca onsapetio arrüna nurarrti Pablo. Auqui artti Señor manitanati ümo au nausasürü, nauqui aicoco arrüna nurarrti Pablo. ¹⁵Auqui caüma manu pärrü ürio aübu nanaiña nesarrü familiarrü. Auqui nantü suiñemo:

—Arrtü urria aume nirraconoancu ümo Nupu Tuparrü, ausiapata apacansa iquiana nipo.

Itasuru comü au niporrü, así que acamanu subasiquia.

¹⁶Taman nanenese subacatü sopean auna cauta nantarrü meaboma. Isiu cutubiurrü supisuñutui taman cupiquirri arubinurrü. Tone cumanacarrü ümoti patrón. Bien macananati maniqui patrón ui nipiaca manu nicumanacatarrti. ¹⁷Arrüna cupiquirri cuatü suisiu, tosienco, y nantü:

—Arrüba noñünca paserebio ümo yarusürürrü Tuparrü. Uburapoi arrüna causane nauqui puerurrü utaesübu eanaqui nomünantü.

¹⁸Naneneca nitosibirri sane suisiu. Auqui artti Pablo tubata ümoti arrüna sane, pebücoto tato, nanti ümoti maniqui choborese anati ahu:

—Au nürirrti Jesucristo icüpucü nauqui ariorrücü auqui na cupiquirri. Au manu rratorrü sürotitü choborese auqui.

¹⁹Auqui caüma bama macananama plata uirri chauqui champürrü macananamainqui, itopiqui tüssürotitü choborese auqui, chauqui tensoro pünanaqui manu nipiaccarrü. Iñenomati Pablo y artti Silas, süromatü aübuma esa bama mayüriabuca au plaza. ²⁰Itusiancanama isucarü bama mayüriabuca nauqui acurrtama aübuma, namatü:

—Arrübama mañoñünca israelitarrü aboma itümoniancatama na genterü. ²¹Manunecanama arrüna nesarrüma costumbrerrü bama israelitarrü, arrüna churriampü uisamune, itopiqui arroñü rromanorroñü.

²²Auquinanaiña genterrü tüborico ümoti Pablo y ümoti Silas. Y arrübama mayacurrta bacüpuruma nauqui acaübu naibirrimia, nauqui acüborimia. ²³Nauquiche bien tücüborioma, süroma au preso uimia y bacüpuruma ito ümoti maniqui bacuirara, nauqui acuirati nurria itacuma. ²⁴Artri maniqui cuiranterrü, nauquiche yasutiuti arrüna bacüpucurrü, süromatü uiti auna presomanrrü cütü. Tomoenon nurria nipoperrüma uiti au niyosüto torrü tauraca barutabaesa.

²⁵Tiñatai cümüinta tobirri. Artri Pablo ichepeti Silas amoncoma meaboma y macantarama, ñanauncurrüma ümoti Tuparrü. Tapü arrübama maquiataca preso amoncoma onsapecoma. ²⁶Rrepenteatai paichoconono cürrü fuerte nurria, paichoconono ito acamanupo auna cauta amoncoma. Au manu rratorrü nanaiña turuca baurübo y carenaca botopüro, bupaquio cütüpüqui bama preso. ²⁷Auqui artri maniqui bacuirara sütopücoti, asaratitü ümo nanaiña turuca baurübo, aiquiaübuti nicüserrti nauqui aitabairotiyü, ñaquioncorrti namanaiña bama preso chauqui tübesüburuma. ²⁸Pero artri Pablo tosibicoti ümoti, nanti: —iTapü aitabaicü! iNanaiña somü subacaiqui!

²⁹Auqui artri maniqui bacuirara manquioti basarurrü, sürotitüpo yarucurrti. Paichoconoti ui nirrucurrti. Aürotitü esati Pablo y esati Silas, achesoiti. ³⁰Auqui süromatü türüpo uiti, nanti ümoma:



(Hch. 16.23)

—Mañoñünca, ¿causane sobi nauqui ichaesübu eanaqui nomünantü?

³¹ Auqui iñumutama:

—Aicocorrü Señor Jesucristo, auqui caüma ataesübuca eanaqui nomünantü, arrücü ichepe nanaiña naesa familiarrü.

³² Auquito urapoimia nurarrü Tuparrü isucarüti y isucarü ito nanaiña nesarrü familiarrü. ³³ Arrümanu tobirri arrüti maniqui bacuirara iyarrübitati arrüna obürío ümoma. Auquito ürioti aübu nanaiña nesarrü familiarrü. ³⁴ Auqui tasuruma uiti au niporrüti nauqui aama. Arrüti ichepe nanaiña nesarrü familiarrü pucünuñama, itopiqui icocoromati Tuparrü.

³⁵ Nauquiche tütaneneca bacüpuruma bama mayacurrüta ümo bama imostorrüma ariorrüma esati maniqui cuiranterrü nauqui aitaesümununutiti Pablo ichepeti Silas. Namatü ümoti:

—Aitaesümunusuma manuma torrü mañoñünca.

³⁶ Auqui arrüti maniqui cuiranterrü nanti ümoti Pablo:

—Bacüpuruma iñemo nauqui itaesümununaño. Puerurrü amenotü, taiquiana urria namamen tanu.

³⁷ Pero arrüti Pablo nanti ümo manuma mamosoca:

—Arrüsomü rromanorrü somü. Nauquiche apiñaca somü au preso tümüca, primero suipoboriquia isucarü namanaiña macirrtianuca, y champürrü bacurrüta primero subaübu, na atusi arrtü ane suipüna o champü. Rranrürüma caüma anecanatai arrüna suichaesübu uimia. Canapae chüsuirrancapü. Tari yebamatü tauna nauquiaiñemecanama somü.

³⁸ Auquisüroma tato manuma mamosoca uraboimia isucarü bama mayacurrüta. Arrüma caüma birrubuma nauquiche oncoimia, que arrüti Pablo y arrüti Silas rromanorrüma. ³⁹ Auqui süromatü esama nauqui arrimiaca tato nipünatema aübuma. Auqui caüma taesüburuma uimia. Pero namatü ümoma:

—Apasamu nurria suiñemo, amecosi auqui na pueblurrü.

⁴⁰ Nauquiche tütaesüburuma auqui preso, süromatü au nipo Lidia. Iñataimia acamanu. Iyoberabaramacü tatito ichepe bama yaruquitorrüma au nürirrti Jesús. Manitanama isucarüma, nauqui urria narucurrü ümoma. Auqui süromatito.

Arrüchopüratai ui macirrtianuca au Tesalónica

17 ¹ Nauquiche tüsüromatü auqui Filipo, pasaoma auqui manio puebluca, nobürirri Anfípolis y Apolonia. Auqui iñataimia au manu pueblurrü nürirri Tesalónica. Acamanu ane taman porrü sinagoga sürümanarrü, auna cauta meaboma bama israelitarrü. ² Sürotitü Pablo taha tacana arrüna nantarrai isamutenti. Anunecati ümo bama israelitarrü ñome ba trerrü semana cada nanenese nesa macansacarrü. ³ Itusiancatati isucarüma Nicororrü, auna cauta ane corobo, arrüti Cristo tiene que ataquisürüti, y arrtü coñoti, tiene que asüboriti tato. Nantito Pablo ümoma:

—Arrüti naqui Jesús, naqui surapoi ausucarü, tonentito Cristo, naqui tacümanauncunuti uiti Tuparrü.

⁴Auqui caüma aboma bama israelitarrü icocotama, y süromatü ichepeti Pablo y arrti Silas. Aboma ito bama griegorrü icocotama ito. Y abe ito paüca arrüba tarucu ñupapanauncurri. ⁵Pero arrübama maquiataca israelitarrü pesabatai ümoma arrüna icocotama. Tüboricoma y oberabarama uimia bama mañöñunca malorrüma, arrümanuma champü niyachücoimia. Amencomantai yusiu cayaca, itümoniancatama genterrü. Auqui süromatü au niporrti Jasón apacheriurumati Pablo y arrti Silas, nauqui acurrtama aübuma isucarü genterrü. ⁶Pero champürrtü tabücoma uimia. Sane nauquiche iñenomati Jasón y arrübama mümanamantai icocoromati Jesús. Süromatü uimia esa bama mayüriabuca. Namatü aübu nitosibirrimia:

—Arrübama mañöñunca itümoniancatama genterrü au nanaiña cürrü y caüma aboma ito auna. ⁷Artri Jasón batasuruti ümoma au niporrti. Arrüma isamutema arrüna churriampü, chicocotapüma nüriacarri yarusürürü yüriaburrüCésar, itopiqui namatü que anati quiatarrü yüriaburrü, maniqui nürirrti Jesús.

⁸Nauquiche toncoimia arrüna sane manitacarrü arrüna genterrü y arrübama mayüriabuca, tüboricoma nurria. ⁹Bacobürarama monirri pünanaquiti Jasón y pünanaqui bama icumpañeruturrti, nauqui ataesübuma uimia. Numo tübapacarama, emecanama.

Artri Pablo ichepeti Silas aboma au Berea

¹⁰Auqui caüma bama icocoromati Jesús bacüpuruma ümoti Pablo ichepeti Silas nauqui aüromatü auqui manu. Süromatü au tobirri auqui pueblurrü, besüro uimia au manu quiatarrü pueblurrü nürirri Berea. Inataimia taha. Süromatü au porrü sinagoga. ¹¹Arrübama israelitarrü acamanu manrrü buenurrüma pünanaqui bama pohoso au Tesalónica, itopiqui yasutiuma nurria arrüna nurarrti Tuparrü. Naneneca leheboma Nicororrü uiti Tuparrü, na atusi ümoma arrtü ñemanauntu nurria arrüna urapoimia bama apostolerrü isucarüma. ¹²Sane nauquiche sürümanama bama israelitarrü icocoromati Jesús au manu pueblurrü. Aboma ito bama griegorrü icocotama, paüca ito, arrüba urria ñupapanauncurri. ¹³Pero arrübama israelitarrü auqui Tesalónica ipiatema arrüna urapoiti Pablo nurarrti Tuparrü au Berea. Cuamatü isiuma au Berea nauqui aitümoniancanama ito bama pohoso acamanu, nauqui atüborimia ümo bama apostolerrü. ¹⁴Pero arrübama icocoromati Jesús iciüpurumati Pablo abeu narubaitu turri. Tapü artri Silas ichepeti Timoteo süsioma au Berea. ¹⁵Arrübama icumpañeruturrti Pablo auqui Berea süromatü ichepeti isuqui turri au manu pueblurrü nürirri Atenas. Acamanu süsioti Pablo. Tapü arrüma süroma tato au Berea, nauqui uraboimia isucarüti Silas isucarütito Timoteo tari yeracamatü conto esati Pablo au Atenas.

Anati Pablo au Atenas

¹⁶Tapü artri Pablo anati barrüperarati icümenuma au Atenas. Acamanu sucheboti nurria, itopiqui arrtaiti au manu pueblurrü sürümanama nituparrüma, nisanturrüma. ¹⁷Manitanati aübu bama israelitarrü au na

porrû sinagoga. Manitanatito aïbu bama griegorrû ñanaunumati Tuparrû. Naneneca manitanati aïbu bama aboma au plaza. ¹⁸Eanaqui manuma mañoñunca aboma bama estudiaboma ñanunecacarrûma bama epicúreos. Aboma ito bama maquiataca estudianterrûma ümo ñanunecacarrûma bama estoicos. Baparioma aïbuti Pablo. Auqui namatû ümomantoe:

—İsanempî arrûna urapoiti usucarû naqui ñoñünrrû! Canapae manitanatiatai. Maquiataca namatû:

—Canapae manitanati ümo bama maquiataca matupaca, arrübama chusuputacapûma. Namatû sane itopiqui artti Pablo chauqui turapoiti isucarûma arrûna urriampae manitacarrû cütüpüti Jesús, y arrûna nisüboriquirrti tato eanaqui macoiñoca. ¹⁹Auqui manu iquianamati Pablo onû taman yiriturrû nürirri Areópago, auna cauta nantarrû iyoberabaramacü. Acamanu ñanquitioma pünanaquiti:

—Suirranca atusi suiñemo arrûna nuevurrû nanunecaca. ²⁰Urasoi suisucarû arrûna champû tûsomoncoi. Caïma suirranca atusi suiñemo isane arrûna sane.

²¹Itopiqui arrübama pohoso au Atenas y arrübama extranjerurrû pohoso ito acamanu, toneantai yachücoimia, nauqui onsaperioma arrüba nuevurrû manunecataca y tacane ñapanitema ito.

²²Auqui artti Pablo atüraitî acamanu eanama onû manu yiriturrû nürirri Areópago. Nanti sane ümoma:

—Arraño mañoñunca auqui Atenas, yasacatû aume tarucapae napanauncu ümo matupaca, masantuca. ²³Itopiqui yacatû auna cauta nantarrû apeanca. Isuñutui taman altar canrrû ane nicororrû cütüpüti, nantû sane: “Arrûna altar ümoti maniqui Tuparrû chusuputacatipü”. Arraño apiñanauncati Tuparrû, pero ta chapisuputacatipü. Tonenti te naqui ümoche arrûna nırranitaca ausücarü.

²⁴Uiti urriane cürrû y nanaiña arrüba abe icu. Ane nüriacarrti au napese y icu ito cürrû. Sane nauquiche champürrtû bavivicoti ñoquiana ba poca omirriante ui bama mañoñuncatai. ²⁵Champürrtû neselitaboti nisamucu bama mañoñunca icuqui nantai cürrû, itopiqui artti te bacheboti osüboriquibo, uiti manasaca y uitito torrio oemo nanaiña arrûna ane icu na cürrû.

²⁶İsamunutiti tûcañe maniqui taman ñoñünrrû (naqui Adán). Auquiti caïma aboma bama sürümanama macrirrtianuca icu na cürrû. Süboricoma uiti ñome mantucubo añorrû según arrûna nırrancarrti. Bachebotito cürrû ümoma cauta avivimia. ²⁷Rranrti nauqui bapacheriuruti, averrtû puerurrû usuputarati. Ñemanauncurratoe, bama masaruquitaquí, artti Tuparrû anati auna uyarrüpecu, pero chüpuerurrüpü basarati. ²⁸Itopiqui uiti te osüboriquia. Uiti uñamenca, uiti usaca. Tacana arrûna namatû tûcañe bama antiburrû aupariente bama ipiacama nicororrû: “Arroñü aütörri Tuparrû”. ²⁹Ñemanauntu te aütörri Tuparrû oñü. Sane nauquiche tapü mapensaca que artti Tuparrû urriancati ui oro, plata, canrrû, ni aisamunumatipü macrirrtianuca ui neherrûma, isiu arrûna ñapensacarrûma. ³⁰Tûcañe champürrtû carrtigaboma macrirrtianuca uiti Tuparrû, itopiqui chütusiopü ümoma. Pero caïma bacipuruti ümo bama apostolerrû, nauqui

aiüromatü au nanaiñantai auna icu na cürriü, nauqui uraboimia nürirrti Tuparrü, isucarü genterrü na aiñorronconomacü. ³¹Itopiqui cuatüqui ñana manu nanenese ensümunu uiti Tuparrü anche acüputi ümoti taman ñoñünrrü, naqui tacümanauncunu uiti, nauqui acurratati ñëmanauncurratöe ümo nanaiña genterrü icu na cürriü. Sane nauquiche tusio ümo namanaiña macrirrtianuca arrüna sane, itopiqui arrti naqui ñoñünrrü süboricoti tato uiti Tuparrü eanaqui macoñoca.

Sane nurarrti Pablo.

³²Auqui caüma arrübama amoncoma acamanu oncoimia nurarrti Pablo icütüpü arrüna nisüboriquirrimia tato bama coiño. Aboma eanama bama unumati Pablo, maquiataca namatü:

—Anitase tatito suisucarü au quiatarrü nanenese arrüna sane.

³³Auqui sürotitü Pablo auqui manu eanaquimia. ³⁴Pero aboma bama icocotama y süromatü isiuti. Eanama anancati taman ñoñünrrü nürirrti Dionisio, naqui tamanti eanaqui bama mayüriabuca au Atenas. Ane ito taman päirrü nürirri Damaris arrüna icocota, y aboma ito maquiataca acamanu bama icocotama.

Anati Pablo au Corinto

18 ¹Nauquiche tüpasao arrüna sane, arrti Pablo sürotitito auqui Atenas au manu pueblurrü nürirri Corinto. ²Acamanu icuñunutiti taman israelitarrü, nürirrti Aquila auqui manu cürri nürirri Ponto. Arrti Aquila ichepe nicüpostoti nürirri Priscila aüboqui iñataimia acamanu auqui Italia, itopiqui arrti yarusürürü yüriaburrü nürirrti Claudio, penecoma uiti namanaiña bama israelitarrü auqui manu capital Roma. Sane nauquiche arrti Pablo sürotitü apaseati ümoma. ³Arrüma batrabacarama tacana arrüna yatrabacarri Pablo, masamunuma poca taquiquia. Acamanu süsioti nauqui atrabacati ichepema. ⁴Cada nanenese nesa macansacarrü sürotitü Pablo au na porrü sinagoga. Baparioti aübu bama israelitarrü y aübu bama ito chütüpü israelitarrü, averrtü aboma bama rranrrüma aicocoromati Jesús.

⁵Auqui arrti Silas ichepeti Timoteo iñataimia auqui Macedonia. Arrti Pablo caüma toneantai niyachücoiti, uraboiti nurarrti Tuparrü. Urapoiti nurria isucarü bama israelitarrü, que arrti Jesús tonenti Cristo, naqui ümoche tücoboï yarrüperacarrüma. ⁶Pero arrübama israelitarrü chirranrrüpüma asuriuma arrüna nurarrti Tuparrü. Manitanama churriampü ümoti. Auqui caüma arrti Pablo icütobitati naibirrti, nanti ümoma:

—Aboiyapatöe caüma ane napipünate. Arrüñü chauqui tüsurapoi ausucarü arrüna uiche puerurrü autaesübu eanaqui nomünantü. Auquina caüma yecatü suraboi isucarü bama chütüpü israelitarrü.

⁷Sürotitü türüpo Pablo auqui manu sinagoga. Sürotitü au niporrti taman ñoñünrrü nürirrti Tito Justo, naquito iñanaunutiti Tuparrü. Niporrti ane saimia ümo manu sinagoga. ⁸Anatito maniqui ñoñünrrü nürirrti Crispo, yüriaburrüti au manu porrü sinagoga. Icocorotiti Señor Jesús, ichepe nanaiña nesarri familiarrü. Aboma ito macrirrtianuca sürümanama au

Corinto icocotama nurarrti Tuparrü y ürioma. ⁹Au manu taman tobirri arrti Pablo asaratitü ümoti Señor auqui quiatarrü narrtartri. Nanti Señor ümoti:

—Tapü airruca. Anitase nisüri y tapü etaiquei, ¹⁰itopiqui arrüñü yaca achepecü, rracuiraca atacucü, tapü ane causane uimia aemo. Süriümanama bama icocoromañüqui au na pueblurrü.

¹¹Auqui caüma süsioti Pablo acamanu ümo taman añorrü y medio, ñanunecacartri nurartri Tuparrü.

¹²Pero au manio naneneca nauquiche yüriaburtri Galiön ümo Grecia, arrübama israelitarrü iyoberabaramacü ui nitüborirrimia ümoti Pablo. Iquianamati esati maniqui yüriaburtri Galiön. ¹³Auqui namatü ümoti:

—Artri naqui ñöñünrrü matachemacanati ümo genterrü, nauqui aiñanaunumati Tuparrü. Pero chirranrrtipü aicocoti arrüna nüriacarrü.

¹⁴Nauquiche artri Pablo tirranrrti anitati, artri yüriaburtri Galiön nanti ümo bama israelitarrü:

—Artrü ane nipünatenti o arrtü batabayoti, yasutiüpü caüma arrüna nautübori ümoti, arraño bama israelitarrü. ¹⁵Pero canapae naburatoquiquitai ümo manu nüriacarrü aboi. Chirrancapü rracurra aupu. ¹⁶Amecosi auquina yesaquiñü.

¹⁷Auqui namanaiña bama griegorrü iñenomati Sóstenes maniqui quiatarrü yüriaburtri au na porrü sinagoga. Ocüsioma ümoti acamanu isucarüti maniqui Galiön. Pero artri Galiön champü nümoche uiti.

Basücübücoti tato Pablo au Antioquía

¹⁸Artri Pablo anaticui acamanu ümo manio naneneca. Auqui masamunuti nariorrü ümo bama yaruquitorrti au nürirrti Jesús, nauqui aürotitü au manu cürrü Siria. Artri Aquila ichepe Priscila süromatü ichepeti. Acü süromatü au Cencrea. Acamanu tapaquioti Pablo itopiqui turapoiti isucarüti Tuparrü, que rranrrti acumanati ümoti au Jerusalén, tacana nesarrüma costumberrü bama israelitarrü. ¹⁹Aiñanaimia au manu pueblurrü Efeso. Artri Aquila ichepe Priscila süsioma acamanu. Artri Pablo aürotitü au na porrü sinagoga apariti aübuma. ²⁰Arrüma caüma namatü ümoti nauqui asioti baeta acamanu ichepema, pero artri chirrantipü. ²¹Nanti:

—Irranca te iñanai au Jerusalén ümo cuatü pierrta. Pero arrtü rranrrti Tuparrü, iseca tato ñana tauna aubesa, nauqui yasaraño tatito.

Auqui masamunuti nariorrü ümoma. Sürotitü auqui Efeso au barco isuqui narubaitu turrü. ²²Iñataiti au manu pueblurrü Cesarea. Auqui taha sürotitü au Jerusalén apaseati ümo bama icocoromati Jesús. Auquita süroti tato au Antioquía. ²³Anancati acamanu ñome manio naneneca. Auqui acomoraboti tatito ümo quiatarrü viajerrü. Sürotitü. Pasaoti auqui manio puebluca auqui manio cüca Galatia y Frigia. Bapasearati ümo bama yaruquitorrti au nürirti Jesús, nanti ümoma:

—Apiña nurria, tapü apiñocota napacoconauncu ümoti Jesús.

Manunecanati Apolos au Efeso

²⁴Au manio naneneca tamanti ñoñünrrü nürirrti Apolo iñataiti au manu pueblurrü Efeso. Arrti cuati auqui manu pueblurrü Alejandría. Israelitarrti. Bien ipiacati anunecati. Tusio nurria ümoti arrüna Nicororrü uiti Tuparrü.

²⁵Chauqui toncoiti nürirrti Señor y arrüna manunecatarrü icütüpüti Jesús. Manunecanati aübu tarucu narucurrü ümoti, pero champürrtü tusio ümoti nanaiña nisüboriquirrti Jesús. Cunauntañatai tusio ümoti arrüna maunimiacarrü uiti Juan Bautista tücañe. ²⁶Manitanati aübu narucurrü ümoti au Efeso au manu sinagoga. Arrti Aquila ichepe Priscila amoncoma acamanu, y oncoimia nurarrti Apolo. Auqui baparioma aübuti, y iñununecanamati arrüna chütusioquipü ümoti, causane tücañe nisüboriquirrti Jesús. ²⁷Auqui arrti Apolo rranrrti aerotitü au manu cürrti Grecia, ane topü narubaitu turrtü. Auqui arrübama icocoromati Jesús au Efeso bayurarama ichepeti. Iconomotama taman quichonimiacarrü ümo bama yaruquitorrüma taha au Corinto nauqui asuriurumati.

Auqui sürotitü. Iñataiti au Corinto. Acamanu urriampae yayuracarrti ümo bama ticocoromati Jesús ui nibuenucurrti Tuparrü ümoma. ²⁸Arrti Apolo bien ipiacati anitai aübu bama israelitarrrü bama chirranrrüpüma aicocoromati Jesús. Manunecanati ümoma auqui Nicororrü uiti Tuparrü, na atusi ümoma, ta arrti Jesús tonenti naqui Cristo, naqui ümoche tücobo yarrüperacarrüma.

Anati Pablo au Efeso

19 ¹Nauquiche anatiqui Apolos au Corintio, arrti Pablo pasaoti auqui manu proviciarrü nürirri Asia. Auqui iñataiti au Efeso. Acamanu tabücoma uiti bama mümanamantai icocoromati Jesús. ²Ñanquitioti pünanaquimia:

—¿Apasuquiuacati Espíritu Santo au nabausasi, nauquiche apicococati Jesús? Arrüma iñumutama:

—No, champü, ni tüsomoncoipü nürirrti Espíritu Santo.

³Ñanquitioti Pablo:

—¿Isane ümoche abüriquia?

Namatü:

—Sobüriquia isiu ñanunecacarrti Juan Bautista.

⁴Auqui manunecanati Pablo ümoma, nanti:

—Arrti Juan Bautista maunimianati ümo macrirrtianuca, nauqui aiñorronconomacü. Nantito ümoma, tiene que acoconauma ümoti naqui cuatiqui. Tonenti naqui Jesús.

⁵Numo toncoimia arrüna sane, auqui ürioma au nürirrti Señor Jesús. ⁶Arrti Pablo iñatati neherrti itama, meaboti itacuma. Auqui cuati Espíritu Santo au nausasiürrüma. Uiti caüma manitanama auqui quiatarrrü manitacarrü y chauqui tiptiacama anitama uiti Tuparrü. ⁷Arrüna nubiqui bama mañoñünca taqui docema.

⁸Artri Pablo nantarrai sürotitü au na porrü sinagoga au Efeso. Manitanati acamanu aübu narucurrü ümoti. Rranrrti nauqui aicocoma ñanunecartri cütüpiü arrüna artri üriabucati Tuparrü uyarrüpecu. ⁹Pero aboma bama chirranrrüpiüma oncoimia, chiümacoconaurrüpiüma. Chauqui tümanitanama churriampiü ümo na nuevurrü manitacarrü isucarü nanaiña genterri. Sane nauquiche artri Pablo, aübu bama icocoromati Jesús, süroma peese pünanaquimia. Manunecanati caüma au manu taman cuarto süümanarrü au nürücuera nesartri maniqui taman ñoñünrrü nürirtri Tirano. ¹⁰Sane isamutenti ñome torrü añorrü. Sane nauquiche namanaiña bama pohoso au manu provinciarrü Asia, bama israelitarrü y bama ito griegorrü, oncoimia nurartri Tuparrü. ¹¹Artri Bae Tuparrü bacheboti asamuti arrüba omirriantai milagorrü. ¹²Sane nauquiche arrübama macrirrtianuca ñanquitioma nipiñuerartri Pablo y naibirtri. Omeno uimia onü bama maunrocono, y arrüma urriancama tato oboi, y arrübama machoboreca besüburuma auquimia.

¹³Pero aboma ito au manu cürrü bama israelitarrü amencoma au nanaiñantai y bacüpuruma ümo bama machoboreca auqui macrirrtianuca. Rranrrüma caüma aicüpiüma machoboreca au nürirtri Jesús isiu nipiaccarrüma. Namatü:
—Amecosi auqui macrirrtianuca au nürirtri Jesús, naqui icütüpiüche nantarrai nurartri Pablo.

¹⁴Anatitücaü maniqui taman ñoñünrrü israelitarrü, nürirtri Esceva. Artri auqui nesarrüma familiarrü bama üriatu sacerdoterrü. Abomatücaü sietema aütortri. Arrüma manitanama ümoti taman choborese, anati auti tamanti ñoñünrrü, na ariortri auquiti. ¹⁵Auqui iñumutati maniqui choborese naqui anati auti maniqui ñoñünrrü:

—Isuputacati Jesús. Ñoncoi ito nürirtri Pablo. Tapü arrañö çisane nabaca?

¹⁶Au manu rratörri icüaborotiyü ümoma maniqui ñoñünrrü anati choborese auti. Bahiyoti ümo manuma siete. Bacheboti nurria ümoma, y macananati ümoma. Auqui besüburuma ñünanati auqui manu porrü, obürio nurria ümoma uiti, y cüsuasama. ¹⁷Contoatai tusio arrüna sane au nanaiña manu pueblurrü Efeso. Tusio ümo namanaiña bama griegorrü y ümo bama ito israelitarrü. Birrubuma. Uirri caüma urria ñanitaccarrüma ümoti Señor Jesús.

¹⁸Süümanama eana bama icocoromati Jesús urapoimia isucarü genterri nanaiña arrüba churriampiü nisüboriquirrimia tücañe. Chiñanecatapümainqui. ¹⁹Aboma ito bama ane tücañe nipiaccarrüma. Mucana uimia nesarrüma libruca nesa echiseriarrü. Amontonabo uimia au plaza, iñonocotama isucarü namanaiña macrirrtianuca. Nauquiche tücalculabo nicua manio libruca, iñatai cincuenta mil monedas. (Taqi tres mil naneneca trabacorrü yobitobo.) ²⁰Sane nauquiche manrrü tusio tanu nurartri Señor. Tusio ito nurria nicüsürrti.

²¹Nauquiche tüpasao arrüna sane, artri Pablo mapensarati au nitüsürrti, aürotitü au manio cüca Macedonia y Grecia, y auqui taha rranrrti aüroti tato au Jerusalén. Nanti sane:

—Auqui Jerusalén caüma irranca yerotü au manu pueblurrü Roma.

²²Auqui bacüpuruti ümo bama torrü icumpañeruturtri, artri Timoteo

ichepeti Erasto, nauqui acusürüma aeromatü au Macedonia. Pero arrti süsioti baeta au manu provinciarrü Asia.

Arrüchopüratai ui macrirrtianuca au Efeso

²³Au manio naneneca tarucu nitüborirrimia bama macrirrtianuca au Efeso auqui naca arrüna manunecacarrü icütüpüti Jesús. ²⁴Anati acamanu maniqui nürirrti Demetrio, naqui ipiacati asamuti aruqui nanaiñantai ui plata. (Arrüna plata nacarrü tacana oro, pero purusubi.) Masamunuti arrüba poca mochiomancatai pururrü plata ümo manu nituparrüma, nürirri Diana. Arrti maniqui Demetrio ichepe bama icumpañeruturrti bien macananama itobo na yatrabacacarrüma.

²⁵Bacüpuruti iyo bama icumpañeruturrti, bama batrabacarama ito aübu plata, nauqui aiyoberabaramacü esati. Aiñanaimia esati. Nanti ümoma:

—Bueno bama cumpañerurrü, tusio aume, que rricurrü ofüi ui arrüna nubatrabacaca. ²⁶Pero chauqui tamoncoi nurarrti Pablo. Arrti matachemacanati ui ñanitacarri ümo nanaiña genterrü au na pueblurrü, y túsai atusi au nanaiña na provinciarrü Asia. Urapoiti isucarüma que arrübama masantuca urriancama ui mañoñünca champü yaserebiquirrimia, chüvaleopüma. ²⁷Chauqui chüvaleoquipü nurria arrüna nubatrabacaca uiche rricurrü ofüi, y toaviarrü tirranrrü chücuasürüquipü nipo arrüna yarusürürrü tuparrü Diana auna uyarrüpecu. Ane penarrü sobi, arrtü tacürusu ñanauncurrüma macrirrtianuca ümo na tuparrü Diana, itopiqui hasta auritarrü iñanauntama nurria nanaiña genterrü auqui na provinciarrü Asia, y toaviarrü auqui nanaiñantai icuqui na cürrü.

²⁸Numo oncoimia arrüna sane bama icumpañeruturrti Demetrio, tarucu nitüborirrimia. Tosibocoma, namatü:

—¡Yarusürürrü te arrüna nutupa Diana auna Efeso!

²⁹Uimia caüma namanaiña macrirrtianuca au manu pueblurrü tüboricoma, tosibicomantai. Süromatü yarucurrüma auna cauta ito nantarrü iyoberabaramacü, nürirri “teatro”. (Tacana cancha aübu tümoca itupecu.) Enoma uimia bama torrü icumpañeruturrti Pablo, bama amencoma ichepeti. Arrüma cuamatü auqui Macedonia. Nürirrimia Gayo y Aristarco. Süromatü uimia au teatro. ³⁰Arrti Pablo rranrrtito aürotitü isiuma au teatro, nauqui anitati ümo genterrü, pero chichebopü ümoti ui bama icocoromati Jesús. ³¹Aboma ito bama mayüriabuca ümo manu provinciarrü, amigorüma ümoti Pablo. Bacüpuruma mensajerrü ümoti, tapü sürotitü au teatro. ³²Au manu teatro caüma namanaiña macrirrtianuca tosibicoma, chütusiopatai isane nuraboimia. Aboma süürümana bama ni atusipü ümoma isane ümoche iyoberabaramacü. ³³Auqui arrti Alejandro sürotitü auna cümüinta ui bama israelitarrü nauqui anitati au nürirrimia bama israelitarrü. Masamunuti señarrü ui neherrti, nauqui etayoimia macrirrtianuca. ³⁴Pero numo tütusio ümoma, que arrti israelitarri, tosibicoma fuerte chépe nurria, namatü:

—¡Yarusürürrü arrüna nutupa Diana auna Efeso! Arrüna nitosibirrimia ururao torrü horarrü.



(Hch. 19.29)

³⁵ Au nitacürurrü etayoimia uiti alcalde. Nanti sane ümoma:

—Mañoñünca auqui Efeso, tusiatai icu nanaiña cürürü, que arroñü auna Efeso bacuiraca itacu nipo Diana, arrüna yarusürürü tuparrü paürü oemo. Acamanupo ane te nicütüpürü canrrü, arrüna cuatü acü tücañe auqui napese.

³⁶ Tusiatai aume, bien ñemanauntu arrüna sane. Sane nauquiche ametaiquei. Tapiü ane causane aboi, apapensasio nurria primero. ³⁷ Apiquiacama tauna bama mañoñünca, pero arrüma champürütü cusüpioma auqui nipo bama autupa, ni anitapüma churriampü ümoma. ³⁸ Canapae arri Demetrio ichepe

bama batrabacara ümo plata ane nünantü uimía aübuma. Pero abe te manio naneneca nesa bacurrtacarrü ui bama mayüriabuca au na pueblurrü. Tari yeracamatü esama, nauqui arrimiaca tato nomünantü uimía. ³⁹Artrü ane quiatarrü churriampü aume, tiene que aburaboi au ba reuniónca nantarrü abe au pueblurrü. ⁴⁰Rrepente caüma anati naqui uraboti oñü isucarütü yarusürürrü yüriaburrü au Roma, itopiqui arrüna nautübori sane. Ñanquitioma rropünanaquiñü caüma, y arrüñü caüma champü surapoboiboñü.

⁴¹Tacürusu ñanitacarrti, masamunuti nariorrü ümo genterrü. Auqui süroma tato au niporrüma.

Niyücürtri Pablo au Macedonia y au Grecia

20 ¹Nauquiche tüpasao arrüna sane, arrti Pablo batasuruti ümo bama yaruquitortti au nürirrti Jesús. Manitanati nurria ümoma. Auqui masamunuti nariorrü ümoma. Sürotitü auqui manu. Pasaoti au manu cürri Macedonia. ²Isiu nipiasacarrti manitanati nurria ümo bama icocoromati Jesús au manu cürri. Auqui iñataiti au manu cürri Grecia. ³Anancati acamanu ñome terrü panca. Auqui rranrrti aüroti tato au Siria au barco isuqui narubaitu turrü. Pero arrübama israelitarrü ane ñapensacarrüma aübuti, rranrrüma aítabajromati. Numo tiptienti Pablo, basücübücoti tato auqui acü au Macedonia. ⁴Aboma bama süromatü ichepeti: Arrti Sópater auqui Berea, arrti Aristarco ichepeti Segundo auqui Tesalónica, arrti Gayo auqui Derbe, y arrti Timoteo ichepeti Tíquico, y arrti Trófimo auqui manu provinciarrü Asia. (Arrüñü, Lucas, viajaboñü ito ichepeti Pablo.) ⁵Arrübama mañoñünca cusürüboma aüromatü au manu pueblurrü Troas. Acamanu barrüperarama suisümenu. ⁶Nauquiche tüpasao manu pierreta parrcuca, arrüsomü somecatito auqui Filipos au barco isuqui turrü. Pürüciü manio cinco naneneca sopiñatai au Troas esa manuma maquiataca. Acamanu supaparaca siete naneneca.

Yapaseacarrti Pablo au Troas

⁷Au manu nanenese tominco iyoberabaramacü esati Pablo arrübama icocoromati Jesús, nauqui chépe suba pan. Baparioti Pablo aübuma, itopiqui rranrrti aürotitito au quiatarrü nanenese. Abaiturrü yapariquirrti aübuma, hasta cümünta tobirri. ⁸Amonco somü au manu sürümanarrü cuarto, arrüna ane au tercer piso. Acamanu abe sürümana basaruca omomo. ⁹Tamanti yaurrü, nürirrti Eutico, anancati tümonsoti abeu metanarrü. Como yabaeturrü ñanitacarrti Pablo, cuatü ümoti ñanucurrti maniqui yaurrü. Auqui paquioti acü abeuqui metanarrü türüpo auqui manu tercer piso. Aboma bama süromatü türüpo, rranrrüpüma aiñatünaiñacanamati, pero chauqui tücoiñoti. ¹⁰Auqui arrti Pablo sürotitü acü, mataconoconoti onüti maniqui yaurrü, itañumenotiti. Auqui nanti ümo maquiataca:

—Tapü ane penarrü aboi, chauqui tüsüboricoti tato.

¹¹Auqui süroti tato Pablo ape, nauqui aati pan ichepema, aübu ñaquioncorrúma iyo niconcorrti Jesús. Auqui seguiboiqui ñanitacarrti ümoma chepe nanenese. Auqui sürotitito. ¹²Tapü arrti maniqui yaürrü iquianamati au niporrti, chauqui tüsüboricoti tato.

Niyücürri Pablo au Mileto

¹³Arrüsomü caüma chauqui tüsupasürüca pünanaquiti Pablo, somenottü au taman barco. Sopiñantai au manu pueblurrü nürirri Asón. Acamanu suparrüperaca cümenuti Pablo. Itopiqui sane nurarrti suiñemo, rranrti aürotiti auqui acü hasta Asón. ¹⁴Numo tiñataiti sobesa au Asón, auquimanu somecatito ichepeti au taman barco. Sopiñatai au Mitilene. ¹⁵Auqui taha somecatito isuqui turrü. Au quiatarrü nanenese sopiñatai saimia manu pueblurrü nürirri Quío. Au quiatarrü nanenese supapasaca auqui manu pueblurrü Samos. Au quiatarrü nanenese somecatito, sopiñatai au manu pueblurrü Mileto. ¹⁶Sane somequi, itopiqui arrti Pablo chirranrrtipü aürotiti au Efeso, itopiqui chirranrrtipü asiote au manu provinciarrü Asia ñome sürümana naneneca. Apuraurrti, itopiqui rranrti aiñanainti au Jerusalén ümo pierrta Pentecostés, arrtü puerurrü.

Nurarrti Pablo isucarü bama mamayoreca auqui Efeso

¹⁷Nauquiche tüsubaca au Mileto bacüpuruti Pablo iyo bama mamayoreca eanaqui bama icocoromati Jesús au Efeso. ¹⁸Nauquiche iñataimia esati au Mileto, manitanati ümoma, nanti:

—Tusio nurria aume causane nisüboriqui auna abarrüpecu au na provinciarrü Asia, nauquiche numo aübo iñatai. ¹⁹Yaserebiquia ümoti Tuparrü, champürrtü ñentonaurrüñü, itaquisünüancacañü ausucarü. Ichaquisürüca ito y isareoca, itopiqui arrübama israelitarrü asioma isuatañü. ²⁰Surapoi ausucarü nanaiña arrüna urria aume. Rranunecaca aume au plaza y au naupo ito. ²¹Ñacuansomococa ümo bama israelitarrü y ümo bama griegorrü, nauqui aiñorronconomacü, nauqui aicocoromati Señor Jesucristo. ²²Arrüñü caüma yecatü uiti Espíritu Santo au Jerusalén. Chütusiopü iñemo isane pasabobo iñemo taha. ²³Pero tusio iñemo uiti Espíritu Santo, ta au cada taman pueblurrü, auna cauta yecatü, ichaquisürüca, y iñanamañü au preso. ²⁴Pero champü nümoche sobi arrtü isonca. Tarucu nirranca itacünucu arrüna trabacorrtü torrio iñemo uiti Señor Jesús. Iciüpurutiñü nauqui suraboi tanu arrüna urriampae manitacarrtü, arrüna ñacunusüancacarrti Tuparrü ümo macrirrtianuca.

²⁵Suraboira caüma ausucarü arrüna sane: Anancañü tücañe abarrüpecu, surapoi ausucarü arrüna nüriacarrti Tuparrü ane usaübu, pero tusio iñemo que namanaiña arraña chüpuerurrüpü amasarañü tato. ²⁶Sane nauquiche sucanañü aume: Arrtü aboma bama abarrüpecuqui, süromatü au infierno, champürrtü auqui niyaca. ²⁷Itopiqui surapoi ausucarü nanaiña arrüna nirrancarrti Tuparrü aupu, na autaesübu eanaqui nomünantü. ²⁸Sane nauquiche caüma,

apacuirá nurria autacuapatoe y itacu bama icocoromati Jesús, ta tone arrüna trabacorrü torrio aume uiti Espíritu Santo. Arrüma caüma genterrü nesarrti Tuparrü, itopiqui coiñoti Cristo itopiquimia, arapara notorrü. Arrüma tacana nobirramanca, arraño tacana bama bacuirara yutacu, tiene que apasapario.

²⁹Tusio iñemo, arrtü tiyecatito aubesaqui, cuamatü caüma bama mañöñunca malorrüma aubesa, tacana nuitümüca omeana nobirracá. Obürío ñome oboi.

³⁰Aboma ito ñana bama abarrüpecuqui tarucu ñapanturrüma, manunecanama arrüna churriampü, nauqui aüromatü bama icocoromati Jesús isiu ñanunecacarrüma. ³¹Sane nauquiche, amasasai nurria. Anancañü abarrüpecu trerrü añoca. Tapü tacürusu napaquionco iyo arrüna surapoi ausucari, ümo cadati taman. Isareoca nurria nrracuansomococo aume.

³²Caüma itorrimiacaño ümoti Tuparrü, nauqui acuirati autacu. Ui arrüna amoncoi nurarrti arucu nurria aume, nauqui apicocoroti, y nauquito atusi aume, ta aucuasürüca ümoti, y nauqui atusito aume que ñana iyebo aboi nanaiña manio macumanataca abe au napese ümo bama pertenecebo ümoti Tuparrü. ³³Champürrtü rracobraça oro ni monirripü ni rroparrüpü amopünanaqui. ³⁴Tusiatai aume, nantarrtai rratrabacaca itobo rrutuburibo, y itobo na ito utuburibo bama isumpañeru. ³⁵Nantarrtai surapoi ausucari, urria nubatrabacaca sane, nauqui puerurrü bayura ümo bama champü nane ümoma. Tapü tacürusu numaquionco iyo manu nurarrti Señor Jesús, nauquiche nanti: “Manrrü urria arrtü macumanaca ümo maquiataca, pünanaquirrtü basutiatai ñacumanatarrüma”.

³⁶Chauqui arrüna ñanitacarri Pablo ümoma, bachesoiyoti aübu namanaiña, na eama. ³⁷Auqui areoroma itañumenomati nurria, ñasamucurrüma nariorrü ümoti. ³⁸Manrrü tarucapae nisuchequirrimia ui arrüna nurarrti ümoma, nauquiche nanti: “Chüpuerurrüpü amasarañü tato”. Auqui süromatü ichepeti abeu narubaitu turrü, auna cauta ane manu barco.

Niyücürri Pablo au Jerusalén

21 ¹Auqui manu supasamuca nariorrü ümo bama suisaruquitaiqui. Somecatü au barco. Besüro soboi isuqui turrü au manu cürri ane cümünta turrü, nürirri Cos. Au quiatarrü nanenese sopiñatai au Rodas, y auqui taha sopiñatai au manu pueblurrü nürirri Pátara. ²Acamanu tabüco soboi taman barco niyücürri aürotü au Fenicia. Somenompo, auqui somenotito auqui manu. ³Supapasaca saimia manu cürri ane cümünta turrü nürirri Chipre. Tusio auqui barco au nepaurrü. Somenotito, somequi ümo manu cürri Siria. Auqui sopiñatai au manu pueblurrü Tiro au manu cürri Siria, itopiqui taha tiene que onco niquiaca barco. ⁴Supapachequiucama bama icocoromati Jesús acamanu. Tabücoma soboi. Siete naneneca subaca acamanu esama. Arrüma manitanama ümoti Pablo uiti Espíritu Santo, namatü:

—Tapü aücatü au Jerusalén.

⁵Numo tübupasao manio naneneca, acomorabo somü, somecatito. Namanaiña bama suisaruquитайqui au nürirrti Jesús ichepe nanaiña paüca y masiomanca süromatü suichepe auqui pueblurrü abeu narubaitu turrü. Acamanu supachesoiquia y sopeanca. ⁶Auqui supasamuca nariorrü ümoma. Somenotüpo au barco. Tapü arrüma süroma tato au niporrüma.

⁷Arrüsomü caüma tacürurrü sobesa viajerrü isuqui turrü auqui Tiro au manu pueblurrü nürirri Tolemaida. Sopiñatai taha, supanquiquia nurria ümo bama suisaruquитайqui au nürirrti Jesús. Tamantai nanenese subaca ichepema. ⁸Quiatarrü nanenese tansürü somecatito. Sopiñatai au manu pueblurrü nürirri Cesarea. Acamanu somecatü au niporrü Felipe, naqui nantarrü urapoiti arrüna urriampae manitacarrü. Arrti tücañe tamanti eanaqui bama siete mañonünca tacümanauncunuma, nauqui ayurama ümo bama pobrerrü au Jerusalén. Amonco somü esati. ⁹Arrti Felipe abe cuatro nitaquiumucuturrti chüboposoiquipiü. Arrion profetarrüion, opiipiaca apanita uiti Espiritu Santo. ¹⁰Subaca acamanu ñome manio naneneca. Auqui ññataiti maniqui taman profetarrü auqui Jerusalén, nürirrti Agabo. Arrti ipiacati anitai uiti Espiritu Santo. ¹¹Bapasearati suiñemo. Ññentati nipoñoentorrü Pablo. Itomoenotiyü uirri, motomoeno nipoperrti y neherrti. Auqui nanti: —Sane nurarrti Espiritu Santo: Arrti naqui esache na poñoentorrü tomoenoti ñana sane au Jerusalén ui bama israelitarrü, y torrioti uimia mecu bama rromanorrü.

¹²Numo somoncoi arrüna sane, arrüsomü ichepe namanaiña bama maquiataca acamanu sopitochenacacati Pablo, tapü sürotitü au Jerusalén. ¹³Pero arrti iñumutati, nanti sane:

—¿Causane tarucapae nabareo? Chauqui tirranrrü ito isuche aboi. Urriantai iñemo arrtü itomoenomañü au Jerusalén, urria ito iñemo arrtü isonca auqui nacarrti Señor Jesús.

¹⁴Como chichübotiyüpü nauqui asioti, sane nauquiche tacürusu subaca icuatati. Sumucana somü:

—Tari isamunenati Tuparrü isiu nirrancarrti.

¹⁵Nauquiche tübupasao manio naneneca, acomorabo somü. Somecatü au Jerusalén. ¹⁶Süromatito suichepe bama mümanamantai suisaruquитайqui auqui Cesarea. Sopiñatai au Jerusalén. Iquianama somü au niporrü maniqui taman ñoñünrrü, nürirrti Mnasón. Arrti tücañe auqui Chipre. Tücoboï icocorotiti Jesús. Amonco somü au niporrü.

Arrti Pablo yapasearatiti Jacobo

¹⁷Arrübama suisaruquитайqui au Jerusalén bien yasuriuruma somü aübu nipucünuncurrüma. ¹⁸Au quiatarrü nanenese arrti Pablo iquianati somü esati Jacobo. Acamanu iyoberabaramacü ito namanaiña bama ane nüriacarrüma eana bama icocoromati Jesús. ¹⁹Arrti Pablo manquioti nurria ümoma. Auqui urapoiti isucarüma nanaiña arrüna urriante uiti

Tuparrü aübuti eana bama chütüpü israelitarrü. ²⁰Numo toncoimia nurarrti, iñanaunumati Tuparrü. Auqui namatü ümoti:

—Tusio aemo, aboma sürümanama bama israelitarrü icocoromati Jesús. Pero namanaiña arrüma icocotama ito nüriacarrü uiti Moisés. ²¹Pero oncoimia que arrücü anunecaca ümo bama israelitarrü pohosoma au piquiataca cüca, tapü icocotamainqui nüriacarrü uiti Moisés, ni circunsidabopümainqui bama aütorrüma, tacana arrüna nubacheata, y tapü icocotamainqui nanaiña arrüba bacüpucuca antiburrü. ²²¿Causane caüma osoi? Contoatai caüma tütusio ümo macirrtianuca, ta taiñatai auna Jerusalén. ²³Ane arrüna supapensaca sane: Aboma auna bama cuatro mañoñünca urapoomia nirrancarrüma acumanama ümoti Tuparrü. ²⁴Acosi aübuma, nauqui apisamune isiu arrüna nüriacarrü. Tiene que apaca itobo nitapaquiquirrimia. Ui arrüna sane caüma tusiatai ümo namanaiña macirrtianuca, ta arrücü ito aicocota nüriacarrü uiti Moisés. Y tusio ito caüma, ta chiñemanauntupü arrümanio manitacaca aemo. ²⁵Tapü arrübama icocoromati Jesús, bama chütüpü israelitarrü, chauqui tucoboi supacüpuca quichonimiacarrü ümoma, ane corobo icu arrüna bacüpucurrü soboi ümoma, tapü basoma numañetu ba numuquianca mucumanana ümo maquiatata matupaca, y numañetu ba numuquianca mocoññatai chübotüsoquiopü. Tapü chaboma ito notorrü, y tapü bavivicoma tacana numuquianca.

Sane nurarrüma ümoti Pablo.

Enoti Pablo au niporrti Tuparrü

²⁶Urria nurarrüma ümoti. Au quiatarrü nanenese sürotitü aübu bama cuatro mañoñünca au niporrti Tuparrü nauqui aisamunema isiu nüriacarrü. Uraboimia que pürücü ba siete naneneca chauqui bien ticocotama isiu arrüna nüriacarrü uiti Moisés, nauqui acumanama ümoti Tuparrü.

²⁷Tüsaipü autacüru manio siete naneneca. Aboma ito au niporrti Tuparrü bama israelitarrü auqui manu provinciarrü Asia. Asaramati Pablo acamanu. Auqui matümoniancanama ümo bama macirrtianuca au niporrti Tuparrü. Iñenomati Pablo. ²⁸Tosibicoma, namatü:

—Mañoñünca auqui Israel, apayura suiñemo, tonenti naqui ñoñünrrü urapoiti isucarü nanaiña genterrü arrüna churriampü ñanunecacarrti ümo noesa genterrü israelitarrü y ümo ito nüriacarrü y ümo arrüna niporrti Tuparrü. Y toaviarrü cuamatü uiti bama griegorrü auna porrü samamecana ümoti Tuparrü. Sane nauquiche caüma ane nomünantü auna nocü uiti.

²⁹Itopiqui arrüma tasaramati Pablo au pueblurrü ichepeti Trófimo auqui Efeso, naqui griegorrü, champürrtü israelitarrti. Naquioncorrümapü caüma, arrti Pablo iquianatiti Trófimo au niporrti Tuparrü.

³⁰Sane nauquiche namanaiña macirrtianuca auqui pueblurrü tüboricoma. Iyoberabaramacü. Enoti Pablo uimia. Itononomati türüpo auqui niporrti Tuparrü. Au manu rratorrü mamana uimia nituru niporrti Tuparrü. ³¹Rranrrüma caüma aitabairomati Pablo. Auqui arrti maniqui

comandanterrü ümo bama masortaboca rromanorrü ipiatenti que enterürri genterrü au Jerusalén tüboricoma. ³²Auqui batasuruti ümo bama yacüpusurrti y ümo bama masortaboca. Süromatü yarucurrüma esa na genterrü. Arrübama macirrtianuca asaramatü ümoti comandanterrü ichepe masortaboca. Auqui tocheno nocüsirrimia ümoti Pablo. ³³Aiñanainti comandanterrü esati Pablo. Enoti ui bama masortaboca. Itomoenomati ui torrü carenaca. Auqui arrti comandanterrü ñanquitioti pünanaqui genterrü:
—¿Ñacuti naqui ñoñünrrü, isane nipünatenti?

³⁴Auqui tosicicomantai bama macirrtianuca. Aboma bama urapoimia sane, tapü bama maquiataca urapoimia quiatarrü. Asi que chüpuerurrüpi atusi ümoti comandanterrü isane pasabo. Sane nauquiche bacüpuruti nauqui aiquianamati Pablo au cuartel. Manu cuartel ane saimiantai ümo niporrti Tuparrü. Süromatü aübuti. ³⁵Numo tiñataimia esa manio gradarrü canrrü ümo cuartel, camperoti Pablo ui masortaboca ompacüma na aürotipo uimia, itopiqui simianatiatai ui bama macirrtianuca nitüborirrimia ümoti. ³⁶Cuamatü isiuma, nitosibirrimia, namatü sane:
—¡Apitabaisorrti maniqui ñoñünrrü!

Artri Pablo manitanati itacutiatoe isucarü genterrü

³⁷Tiñataimia masortaboca abeu nituru cuartel aübuti Pablo. Auqui ñanquitioti Pablo pünanaquiti comandanterrü, nanti:

—Irranca baeta rrapari aübücü.

(Manitanati Pablo auqui griegorrü.) Aiñumuti comandanterrü:

—¡Así que aipiaca anita griegorrü!

³⁸Tapü arrüna nirraquionco ta arrücü maniqui egipciorrü naqui bahiyoti subaübu aucutanu, maniqui yüriaburrü ümo bama cuatro mil mañoñünca mayatabayoca, bama süromatü iche eana rroense uiti.

³⁹Aiñumuti Pablo:

—No, champürrtü arrüñü. Arrüñü israelitarrüñü. Yaca icu cürrü au manu pueblurrü sürümanarrü nürirri Tarso au manu cürrü Cilicia. Asamu nurria iñemo, irranca rranita ümo na genterrü.

⁴⁰Torrio uiti comandanterrü. Artri Pablo atürait caüma omonü manio gradarrü ape. Masamunuti señarrü ümo genterrü, nauqui etaiyoimia. Nauquiche tetayoimia nurria, manitanati ümoma auqui ñanitacarrüma hebreo, nanti:

22 ¹—Bueno bama masaruquitaqui y bama iyaütaqui, amonsoi baeta arrüna nisura ichacuñüantoe.

²Numo oncoimia arrüna manitanati auqui hebreo, manrrü etaiyoimia. Nanti Pablo:

³—Arrüñü israelitarrüñü. Yaca icu cürrü au manu pueblurrü Tarso au manu cürrü Cilicia, pero isunaunca auna pueblurrü Jerusalén. Artri maniqui maestro Gamaliel iñunecanatiñü. Icocota nurria arrüna nüriacarrü torrio oemo ui bama antiburrü. Bien arucu iñemo nirraconoancu ümo nüriacarrü,

tacana arraña caïma. ⁴Sane nauquiche tücañe ichüboriquia nurria ümo bama icocoromati Jesús, irranca itabairoma. Arrüibama mañöñunca y paica tomoenoma sobi, y süroma ito au preso sobi. ⁵Artri yarusürürü sacerdoterrü y namanaiña bama mayüriabuca tusio nurria ümoma arrüna sane. Uimia te torrio iñemo quichonimiacarrü corobo icu, nauqui puerurrü iquianama bama icocoromati Jesús auqui Damasco auna Jerusalén, nauqui carrtigaboma.

Urapoiti Pablo arrüna niquiampiaca nisüboriquirrti

⁶Auqui caïma yacatü au Damasco. Taqui toce iñatai saimia ümo pueblurrü. Rrepenteatai cuara nurria ichupecuñü auqui napese. ⁷Ipaquiquia acü chachuqui niyabu cabayurrü. Ñoncoi manu manitacarrü, nantü iñemo sane: “Saulo, Saulo, ¿causane atüboriquiatái iñemo?” ⁸Auqui iñumuta: “¿Ñacucü, Señor?” Nanti iñemo: “Arrüñü Jesús auqui Nazaret, naqui ümoche atüboriquiatái”. ⁹Arrüibama isumpañeru arrtaimia manu nanentarrü, pero champürrtü oncoimia arrümanu manitacarrü iñemo. ¹⁰Rranquiritio caïma pünanaquiti: “¿Causane caïma sobi, Señor?” Auqui nanti iñemo: “Atüsai, acosi au pueblurrü. Acamanu urapويمia asucarücü nanaiña arrüna achücoboibocü”. ¹¹Auqui manu caïma chüpuerurrüpü yasaratü ui manu tarucapae nanentacarrü. Así que arrüibama isumpañeru ipiasurumañü hasta au pueblurrü Damasco.

¹²Anancañü acamanu. Au manu pueblurrü anancati taman ñöñünrrü, nürirrti Ananías. Icocatái nurria nüriacarrü, cuasürüti ümo namanaiña bama israelitarrü au Damasco. Artri maniqui ñöñünrrü yapasearatiñü. ¹³Atüiraiti yesañü, nanti iñemo: “Saruqui Saulo, caïma asaca tato”. Au manu rratorrü yasaca tato nurria. ¹⁴Auqui nanti iñemo: “Artri naqui Tuparrü ümo bama uyaütaiqui itacümanauncunutiüyü nauqui atusi aemo nirrantiümoti aübucü. Uitito asacati Cristo, y oncoi nurartri. ¹⁵Auquina caïma aücatü uraboi isucari namanaiña macirrtianuca arrüna nurartri, y arrüna arrtai y oncoi. ¹⁶Caïma, tapü arrüperacaiqui. Acosi nauqui üri eana turri. Anqui nurria pünanaquiti Jesús nauqui arrimiaca tato arrüba nomünantü obi”. Sane nurartri Ananías iñemo.

Urapoiti Pablo causane nauquiche aürotitü esa bama chütüpü israelitarrü

¹⁷Nantito Pablo ümoma:

—Auqui manu yasücübüca tato au Jerusalén. Taman nanenese anancañü rreanca au niporrti Tuparrü. Auqui yasacati Jesús au quiatarrrü niyasata. ¹⁸Artri bacüpuruti iñemo, nanti sane: “Acosi apuraurrücü auqui na pueblurrü Jerusalén, itopiqui auna chiyasutiupüma arrüna nura isütüpüñü”. ¹⁹Auqui iñumuta nurartri: “Pero Señor, tusiatái ümoma causane sobi tücañe ubau ba poca sinagoga, numo yacatü isiu bama icocoromacü, nauquiche cüborioma sobi, y süroma sobi au preso. ²⁰Anancañü ito acamanu cauta itabairomati Esteban, naqui manitanati au nüri. Urriantái iñemo arrüna coiñoti.

Anancañü rracuiraca yutacu nicüburrimia bama uiche aconti”. ²¹ Pero arrti Señor inumutati: “Acosi, icüpuçü iche esa bama chütüpü israelitarri”.

Anati Pablo mecuti comandanterrü

²²Hasta auna oncoi nurria genterrü nurarrti Pablo. Pero numo nanti arrüna sane, tosicoma tatito nurria, namatü:

—iTari comati naqui ñoñünrrü, churriampü arrtü süboricoti!

²³Tosibicomantai, yarutaübutama ape nicüburrimia, tarucu cütorrü uimia acamanu ui nitüborrimia. ²⁴Auqui bacüpuruti maniqui comandanterrü nauqui aikuianamati Pablo au cuartel. Nanti ümo masortaboca:

—Apitomoensorrti, apicübaisorrti, nauqui uraboiti usucarü causane na tarucapae nitüborrimia ümoti.

²⁵Numo tütomoenoti Pablo, nauqui achema chacuti, nanti ümoti maniqui capitán anati atüraitu esati:

—Arrüñü rromanorrüñü. ¿Taqui puerurrü apicübaiquiañü? Y todaviarrü champürrtü apacurrtaca primero saübuñü, na atusi aume arrtü ane nipünate o champü.

²⁶Numo oncoiti maniqui capitán arrüna sane, sürotitü esati comandanterrü, nanti ümoti:

—Asasai nurria, tapü aisamute arrüna sane aübuti naqui ñoñünrrü, itopiqui rromanorrti.

²⁷Auqui arrti comandanterrü sürotitü esati Pablo, ñanquitioti pünanaquiti:

—¿Ñemanauntu arrüçü rromanorrüçü? Nanti Pablo:

—Arrüñü te.

²⁸Nanti comandanterrü:

—Arrüñü rrapacaca chama monirri nauqui isamunuñü rromanorrüñü. Nanti Pablo:

—Tapü arrüñü rromanorrüñü numo yaca icu cürrü, itopiqui arrti iyaü rromanorrti.

²⁹(Artri Pablo israelitarri y rromanorrtito.) Sane nauquiche isoquisünamamati Pablo au manu rratorrü, champürrtü cüborioti. Artri maniqui comandanterrü chauqui tübirrubuti, itopiqui churriampü atomoema bama rromanorrü.

Nacarri Pablo esa bama mayüriabuca

³⁰Pero rranrrti atusi ümoti isane na nünantü ümo bama israelitarri uiti Pablo. Sane nauquiche au manu quiatarrü nanenese bacüpuruti nauqui aiyoberabaramacü bama üriatu bama sacerdoterrü y bama mayüriabuca israelitarri. Bacüpuruti aucaübu manio carenaca cütüpüquiti Pablo. Auqui maemencoti iyoti. Iñataiti acamanu esa bama mayüriabuca.

23 ¹Artri Pablo asaratitü urria ümoma nanti:

—Masaruquитайqui, enterurrü nisüboriqui bien urria hasta auritarrü, itopiqui ñapensaca urria y yaserebiquia ümoti Tuparrü.

²Au manu rratörrü artri maniqui yarusürürrü sacerdoterrü Ananías bacüpuruti ümoti taman mosörrü, na aiturubairotiti Pablo. ³Pero artri Pablo nanti ümoti:

—¡Ui! Tuparrü caüma carrtigabocü, arrücü naqui ñapanrrü! Aca auna nauqui acurrta iñemo isiu arrüna nüriacarrü, pero arrücü chaicocotapü nüriacarrü, itopiqui acüpuca nauqui ocüsimia iñemo, abu nantü nüriacarrü, chüpuerurrüpü uisamune sane.

⁴Auqui arrübama maquiataca namatü ümoti Pablo:

—¿Causanempü anita churriampü ümoti yarusürürrü sacerdoterrü, naqui baserebio ümoti Tuparrü?

⁵Aiñumuti Pablo:

—Masaruquитайqui, chütusiopü iñemo arrtü tonenti yarusürürrü sacerdoterrü. Ñemanauntu, ane te corobo sane: “Tapü anitaca churriampü ümo bama ane nüriacarrüma ümo genterrü”.

⁶Tusiatai ümoti Pablo, que arrübama mayüriabuca aboma au torrü partidörrü. Acamanu aboma bama saduceörrü y aboma ito bama fariseörrü. Sane nauquiche manitanati fuerte nurria au manu reunión, nanti sane ümoma:

—Masaruquитайqui, arrüñü fariseörrüñü, y artri iyaü fariseörrü. Yaca auna nauqui apacurrta saübuñü, itopiqui icocota arrüna manunecatarrü, que süboricoma tato ñana bama coiño, y yarrüperaca ümo manu nanenese.

⁷Ui arrüna sane nurartri Pablo chichepequipü ñapensacarrüma bama mayüriabuca, itopiqui eanama aboma bama fariseörrü y aboma ito bama saduceörrü. ⁸Itopiqui bama saduceörrü namatü, arrtü oconca, chosüboriquiapü tato. Namatito champüma bama angelerrü, ni abomapü bama espíritu. Pero arrübama fariseörrü icocotama nanaiña arrüna sane. ⁹Así que tosibicomantai acamanu. Aboma bama fariseörrü manunecana nüriacarrü, atüraimía y uratoquioma, namatü:

—Champü nipünatenti naqui ñoñünrrü. ¿Taqui manitanati tücañe taman ángel aübuti, o si no artri taman espíritu?

¹⁰Chauqui manrrü tarucapae nuratoquiquirrimia. Artri comandanterrü birrubuti itacuti Pablo, tapü chepesüroti uimía. Bacüpuruti ümo masortaboca, na aiquiaüburumati Pablo eanaquimía, tari iquianamati tato au cuartel.

¹¹Au manu tobirri itusiancanatiyü Señor isucarüti Pablo, nanti ümoti:

—Tapü airruca, chauqui tanitaca au nisüri auna Jerusalén. Sane ito tiene que anitane ñana nisüri au Roma.

Bapacheroma niquiubuma nauqui aitabairomati Pablo

¹²⁻¹³Tansürü quiatarrü nanenese iyoerabaramacü manuma israelitarrü, taqui cuarenta nubiquirrimia. Itusiancatama curusürrü, namatü:

—Chubacapü pemacarrü ni uchapü turrü cheperrtü coiñoti Pablo osoi. Tari ipiaurramanati oñü Tuparrü, arrtü chücoconopü osoi arrüna nusura.

¹⁴Auqui süromatü esati yarusürürrü sacerdoterrü y esa bama mamayoreca israelitarü. Namatü ümoma:

—Chauqui túsopipiaurramaca somü soboiyapatoe, y túsopitusiancata ito curusürü, tapü subaca pemacarrü ni suichapü turrü, cheperrtü coiñoti soboi Pablo. ¹⁵Suirranca caüma nauqui apanquiriuruti pünanaquiti comandanterrü, na aicüpurutiti Pablo aubesa, nauqui puerurrü atusi nurria aume arrtü ane nipünatenti. Apanqui te arraño ichepe namanaiña bama mayüriabuca. Arrüsomü caüma suparrüperaca isiu cutubiurrü, nauqui sopitabairoti antes que aiñanainti aubesa.

¹⁶Pero tamanti yaürü, naübosi niquiasitorrti Pablo, ipiatenti nanaiña arrüna sane. Sürotitü au cuartel uraboiti isucarüti Pablo. ¹⁷Auqui arrti Pablo maemencoti iyoti taman capitán, nanti ümoti:

—Asamu nurria iñemo, aiquiarrrti naqui yaürü esati comandanterrü. Ane arrüna rranrrti uraboiti isucarüti.

¹⁸Arrti maniqui capitán iquianatiti maniqui yaürü esati comandanterrü. Aiñanaimia esati, nanti capitán ümoti:

—Arrti maniqui Pablo anati au preso, maemencoti iyoñü. Nanti iñemo nauqui iquianati naqui yaürü tauna aesacü. Ane arrüna rranrrti uraboiti asucarüci.

¹⁹Auqui arrti comandanterrü iquianatiti maniqui yaürü au quiatarrü narücüquirri, ñanquitioti pünanaquiti:

—¿Isane arrianca uraboi isucarüñü?

²⁰Auqui urapoiti isucarüti arrüna sane:

—Sane ñapensacarrüma bama israelitarü: Rranrrüma anquiriuma apünanaquicü nauqui aiciüpuruti Pablo taha esa bama mayüriabuca israelitarü, nauqui puerurrü atusi nurria ümoma arrtü ane nipünatenti. Sane namatü caüma aemo, ²¹abu ñapanturrüma, tapü aicocota nurarrüma. Aboma taqui cuarenta mañoñünca rranrrüma aitaibairomati Pablo. Arrüma ipiaurramanamacü uirrimiantoe, y urapoimia que chübasopüma, ni achapüma cheperrtü coiñoti Pablo uimia. Aboma barrüperarama, a verrtü urria aemo.

²²Auqui nanti comandanterrü ümoti:

—Tapü urapoi arrüna que chauqui turapoi isucarüñü.

Auqui sürotitü maniqui yaürü esauquiti.

Icüpurumati Pablo esati yüriaburrü Félix

²³Auqui tasuruma uiti comandanterrü bama torrrü macapitaneca, nanti ümoma:

—Aucobori aübu doscientos masortaboca acü setenta masortaboca yuchacu cabayuca y doscientos masortaboca aübu ransaca. Tiene que amenotü au Cesarea caüma tobita a las nueve. ²⁴Acomorabo ito aboi cabayurrü ümoti Pablo, nauqui apiquianati esati yüriaburrü Félix. Apacüira nurria itacuti, tapü ane causane ümoti.

²⁵Artri comandanterrü bacüpurutito taman quichonimiacarrü corobo icu sane:

²⁶“Arrüñü Claudio Lisias nirraquionco tanu aemo ñemanauncurratõe yüriaburrü Félix. ²⁷Artri naqui ñoñünrrü, nürirrti Pablo enoti ui bama israelitarrü. Tüsaipü ataboriti uimia. Auqui ñoncoi, que artri rromanorrti. Sane nauquiche yerotü aübu masortaboca, sopiquiaüburuti pünanaquimia. ²⁸Irrancapü atusi nurria iñemo, arrüna nünantü uiti ümoma. Iquiacati esa bama mayüriabuca israelitarrü. ²⁹Acananu ipiate que urabomati itopiqui manu nüriacarrü uimia, pero champü nipünatenti nauquipü ataboriti, ni aürotipü au preso. ³⁰Ñoncoi one, aboma bama israelitarrü rranrrüma aitabairomati. Sane nauquiche icüpucati caüma aemo auquina yesaquiñü. Sucanañü ito ümo bama urabomati, tari yeracamatü aparimia aübucü. Toneantai arrüna nisura aemo. Taiquiana urria naca”.

³¹Arrübama masortaboca isamutema isiu yacüpucurrti comandanterrü. Süromatü aübuti Pablo au tobirri. Iñataimia au manu pueblurrü Antípatris. ³²Au quiatarrü nanenese arrübama masortaboca amenco acü, basücübücoma tato au cuartel au Jerusalén, tapü arrübama chacu cabayuca süromatito aübuti Pablo. ³³Iñataimia au Cesaréa. Torrio uimia manu quichonimiacarrü ümoti maniqui yüriaburrü acamanu, nürirrti Félix. Torriotito Pablo uimia ümoti. ³⁴Artri yüriaburrü caüma leheboti manu quichonimiacarrü. Auqui ñanquitioti pünanaquiti Pablo:

—Ñacuna provinciarrü auquichecü?

Nanti Pablo:

—Arrüñü auqui Cilicia.

³⁵Auqui nanti Félix ümoti:

—Rracurrtaca aübucü arrtü cuamatü auqui Jerusalén bama uiche urabomaciü.

Bacüpuruti ümo bama masortaboca, nauqui acuirama itacuti au manu porrü coñorrtai, urriante tücañe uiti maniqui yüriaburrü Herodes.

Manitanati Pablo itacutiatõe esati yüriaburrü Félix

24 ¹Numo tübupasao cinco naneneca, iñataiti Ananías au Cesaréa, naqui yarusürürrü sacerdoterrü, aübu bama mümanamantai mamayoreca y aübuti maniqui taman ñoñünrrü, nürirrti Tértulo. Artri tusio nurria ümoti nüriacarrü nesa bama rromanorrtü. Süromatü esati Félix nauqui urabomati Pablo. ²Maemencoti Félix iyoti Pablo. Nauquiche tanati esama, manitanati maniqui Tértulo. Urabotiti Pablo, nanti sane:

—Señor yüriaburrü Félix, obi te urria naca na genterrü au na cürri. Urria ito obi nanaiña arrüba omirriantai ümo macrirrtianuca, itopiqui urria napensaca auqui maübo. ³Nantarrtai supachampienccaca aemo aübu nanaiña subausasü itobo arrüna nabuenucu. ⁴Chüsuirrancapü yabaeturri supanitaca asucarüci, tapü ünantü aemo. Pero asamu nurria suiñemo, onsapesio arrüna supanitaca aübucü, itopiqui nantarrtai bien buenurrüci subaübu. ⁵Tusio suiñemo que

artri naqui ñoñünrrü nantarrai otüboriquiatu uiti. Matümoniancanati ümo bama israelitarü au nanaiña cürü au na cauta ane nüriacarrüma bama rromanorü. Tusio ito suiñemo, artri üriatu bama auqui manu partidorrü nürri “Nazareno”. (Nanti sane, itopiqui artri Jesús auqui Nazaret.) ⁶Rranrrtito nauqui ane nomünantü au niporrti Tuparrü au Jerusalén. Sane nauquiche enoti soboi. ⁷Suirrancapü supacurta aübuti isiu na nüriacarrü soboi. Pero artri comandanterü Lisias cuati aübu masortaboca, aiquiaüburumati somopünanaqui. ⁸Artri Lisias icüpuruti somü nauqui suburaboti auna asucarücü. Arrtü anquicio caüma pünanaquiti Pablo, tusio nurria aemo arrüna nünantü ane uiti suiñemo.

⁹Arrübama maquiataca israelitarü namatito que ñemanauntu nanaiña arrüna sane. ¹⁰Artri yüriaburrü caüma masamunuti señarrü ümoti Pablo, nauqui anitatu. Auqui manitanati Pablo, nanti ümoti yüriaburrü sane:

—Señor yüriaburrü, tusio iñemo, tucoboi ane nüriaca auna ümo na genterrü. Sane nauquiche chirrucapü rranita aemo ichacuñüantoe. ¹¹Chücoboipü niyaca au Jerusalén, tütabe doceata naneneca yacatü taha rranaun. Arrücü puerurrü atusi aemo arrüna sane, arrtü anquicio pünanaqui genterrü. ¹²Champürtrü isuratoquiquia, ni rratümoniancapü ümo genterrü, ni au niporrtipü Tuparrü, ni aupü sinagoga, ni aupü quiatarü narücüqui pueblurrü. ¹³Arrüma champü isane arrüna itusiancatama asucarücü, nauqui atusi arrtü ñemanauntu arrüna nurarrüma iñemo. ¹⁴Pero irranca te suraboi asucarücü arrüna sane: Iñanauncati Tuparrü, naqui Itupa bama iyaütaiqui tücañe. Icocota ito arrüna urriampae manunecatarü, causane nauqui aye osoi esati Tuparrü. Tapü arrüma namatü que churriampü. Icocota ito nanaiña nüriacarrü uiti Moisés y nurarrüma bama profetarü tücañe, arrüba abe icu Nicororü. ¹⁵Yarrüperaca arrtü süboricoma tato bama coño, bama urria nisüboriquirrimia tücañe, y bama ito isamutema nomünantü. Arrüma ito bama israelitarü icocotama arrüna sane. ¹⁶Sane nauquiche nantarrai arucu nurria iñemo, itopiqui urria nirrapanauncu isucarüti Tuparrü y isucarü macirrtianuca.

¹⁷Tucoboi chiyacapütü au Jerusalén. Aüboqui yacatü aübu monirri ümo bama pobrerrü acamanu eana bama israelitarü. Racumanaca ito ümoti Tuparrü. ¹⁸Acamanu isamute isiu nüriacarrü, nauqui puerurrü racumana ümoti. Icuñunumañü bama israelitarü au niporrti Tuparrü. Pero champürtrü amoncoma sürümana macirrtianuca ichepeñü, ni rratümoniancapito acamanu. ¹⁹Pero aboma acamanu bama israelitarü auqui Asia. Tonema bama itümoniancatama genterrü. Arrüma tüboricomantai iñemo. Arrümampü te tiene que ayematipü tauna aesacü, nauqui urabomañü, arrtü ñemanauntu ane nipüinate. ²⁰O si no, arrübamapü auna, tari urapويمia arrtü ane nipüinate, nauquiche anancañü esa bama mayüriabuca au Jerusalén. ²¹Canapae ane nipüinate ui arrümanu nisura ümoma, numo sucanañü: “Aburacañü itopiqui icocota arrüna nosüboriqui tato eanaqui macoiñoca”. Sane nurartri Pablo ümoti yüriaburrü.

²²Auquimanu arrti Félix masamunuti nariorrü ümoma, itopiqui tusio nurria ümoti arrüna manunecatarrü cütüpüti Jesús. Nanti ümoma:

—Arrtü cuati comandanterrü Lisias, rrapariquia aübuti. Auqui caüma surapoi ausucarü causane sobi aübuti Pablo.

²³Bacüpuruti ümoti taman capitán, nauqui acuirati itacuti Pablo. Arrti caüma chebatai uiti, nauqui ayematü bama nesarrrti amigorrrü Pablo, na acumanama ümoti.

²⁴Tübupasao mümanantai naneneca. Auqui ññataiti tato Félix au pueblurrü auqui yapaseacarrrti. Ññataiti ichepe nicüpostoti, nürirri Drusila. Tone israelitarrü. Maemencoma iyoti Pablo. Rranrrüma oncoimía arrüna causane numacoconauncu ümoti Jesucristo. ²⁵Manitanati Pablo ümoma. Urapoiti isucarüma arrüna tiene que uisamune arrüna urria, y tapü baviviquia isiu nurrianca. Urapoitito arrüna carrticurrü cuabotiqui ümo bama chicocotapüma nürirrrti Jesús. Auqui birrubuti Félix. Masamunuti nariorrü ümoti Pablo, nanti: —Raemenca ácü tatito, arrtü urria ññemo.

²⁶Barrüperaratito arrtü bacheboti Pablo monirri ümoti, na aitaesümununutiti auqui preso. Sane nauquiche nantarrrtai maemencoti iyoti, nauqui apariti aübuti. ²⁷Sane bupasao manio torrü añoca. Auqui caüma cuati quiatarrü yüriaburrü, nürirrrti Porcio Festo, atocoti itoboti Félix. Tapü arrti Félix rranrrti nauqui urria nisüboriquirrrti aübu bama israelitarrü. Sane nauquiche onconoti Pablo uiti au preso (nauqui acurrtati Festo caüma aübuti).

Artti Pablo esati Festo

25 ¹Numo tütabe trerrü naneneca nüriacarrrti Festo auqui sürotitü auqui Cesarea au Jerusalén. ²Acamanu cuamatü esati bama üriatu sacerdoterrü ichepe bama israelitarrü ane nüriacarrüma. Cuamatü aparimía aübuti, na acurrtati aübuti Pablo. ³Namatü ümoti:

—Asamu nurria suiñemo, aiquiarrrti tauna Pablo, nauqui acurrrta aübuti auna Jerusalén.

Namatü sane, itopiqui rranrrüma aítabajromati Pablo isiu cutubiurrü.

⁴Pero arrti Festo ññumutati:

—Artti Pablo anati au preso au Cesarea, y arrüñü contoatai yasücübüca tato taha. ⁵Sane nauquiche apacüpu ümo mañonünca bama ane nüriacarrüma aboi, nauqui aüromatü saübuñü au Cesarea na urabomati Pablo acamanu isucarüñü, arrtü ññemanauntu ane nipünatenti.

⁶Taqi ocho o diez naneneca nacarrrti Festo au Jerusalén. Auqui süroti tato au Cesarea. Ññataiti tato taha. Au quiatarrü nanenese masamunuti reunión, na acurrtati aübuti Pablo. ⁷Aboma acamanu bama israelitarrü isiuti auqui Jerusalén. Artti Festo maemencoti iyoti Pablo. Numo tiññataiti esama, atüraimía manuma israelitarrü itupecuti Pablo, urabomati isucarüiti Festo. Urapoimía sürümana arrüba nomünantü uiti Pablo. Pero champü arrüna itusiancatama, na atusi nurria arrtü ññemanauntu. ⁸Auqui arrti Pablo manitanati itacutiatoe, nanti:

—Champü isane nünantü isamute ümo nüriacarrü nesa bama israelitarrü, ni ümopü niporrti Tuparrü au Jerusalén, ni ümotipü yarusürürü yüriaburrü César au Roma.

⁹Tapü arrti Festo rranrti asamuti nurria ümo bama israelitarrü. Sane nauquiche ñanquitioti pünanaquiti Pablo:

—¿Arrianca aürotü au Jerusalén, nauqui rracurra aübucü taha, na atusi arrtü ñemanauntu nurarrüma aemo?

¹⁰Auqui nanti Pablo ümoti Festo:

—No, chirrancapü, irranca nauqui acurrtati yarusürürü yüriaburrü César saübuñü. Tusio nurria aemo, champü causane sobi ümo bama israelitarrü. ¹¹Urria iñemo arrtü isonca, itopiqui arrüna arrtü ane isane nipüenate. Pero como mapancarrtai arrüna nurarrüma iñemo, chüpuerurrüpü aitorrimianañü mecuma, nauqui ison uimia. Irranca te na acurrtati yarusürürü yüriaburrü César saübuñü au Roma.

¹²Auqui baparioti Festo baeta aübu bama ayuranterrü ümoti. Chauqui yapariquirrti aübuma, urapoiti isucarüti Pablo arrüna sane:

—Chauqui turapoi que arrianca na acurrtati yarusürürü yüriaburrü César aübucü. Sane nauquiche icüpucü caüma esati.

Nacarrti Pablo esati yüriaburrü Agripa

¹³Bupasao manio naneneca. Auqui iñataiti maniqui yüriaburrü Agripa au Cesarea. Iñataiti ichepe niquiastoti, nürirri Bernice. Cuamatü anquimia nurria ümoti Festo. ¹⁴Aboma au Cesarea ümo manio naneneca. Arrti Festo manitanati cütüpüti Pablo isucarüti yüriaburrü Agripa, nanti:

—Anati auna au preso taman ñoñünrrü, onconoti uiti Félix, nauqui rracurra aübuti. ¹⁵Numo anancañü au Jerusalén, cuamatü aparimia saübuñü bama üriatu sacerdoterrü ichepe bama mamayoreca israelitarrü. Rranrrüma nauqui ataboriti sobi. ¹⁶Arrtüñü caüma iñumuta nurarrüma, sucanañü ümoma: “Arrüsomü rromanorrü nantarrai primero supacurrtaca nurria aübuti naqui urabomati. Sane puerurrü uraboiti arrtü ñemanauntu o chüñemanauntupü arrüna manitacarrü ümoti. Arrtü tusio nurria arrüna nipünatenti, auqui caüma torrioti ümo bama uiche carrtigaboti. Chüpuerurrüpü sopitorrimianatiatai”. Sane nisura ümoma.

¹⁷Auqui ise tato auna Cesarea. Arrübama üriatu sacerdoterrü cuamatü isiuñü. Au quiatarrü nanenese tiñasamuca reunión aübuma. Cuati sobi, itusiancacati maniqui ñoñünrrü isucarüma. ¹⁸Urabomati isucarüñü. Arrtüñü nirraquioncopi urapويمia caüma arrüna tarucapae nomünantü uiti, pero chüsanempü. ¹⁹Pururrtai nuratoquiquirrimia itacu arrüna ñacoconauncurrüma ümoti Tuparrü, y itacuti maniqui taman ñoñünrrü, nürirrti Jesús, naqui tücoiñoti, pero arrti Pablo nanti que süboricotiqui. ²⁰Arrtüñü chütusiopü nurria iñemo nanaiña arrüna sane. Sane nauquiche rranquitisio pünanaquiti Pablo, arrtü rranrti aürotitü au Jerusalén, nauqui rracurra aübuti taha. ²¹Auqui nanti iñemo, que rranrti aürotitü esati

yarusürürrü yüriaburrü César au Roma, na acurratati aübuti. Sane nauquiche rracüpuca na asiote au preso auna, cheperütü icüpuicati esati César.

²² Auqui nanti Agripa ümoti Festo:

—Irranca ñonsape nurarrti maniqui ñoñünrrü.

Aiñumuti Festo:

—Tubaca tiene que anitati usucarü.

²³ Au quiatarrü nanenese iñataiti yüriaburrü Agripa ichepe Bernice aübu tarucu nicoñoporrüma. Süromatü au manu local sürümanarrü. Cuamatito ichepema bama üriatu masortaboca y bama mayüriabuca auqui pueblurrü. Numo taboma namanaiña, maemencoti Festo iyoti Pablo. Iquianamati esama. ²⁴ Auqui nanti Festo:

—Yüriaburrü Agripa, y namanaiña arraño bama abaca aunampo, tonenti naqui ñoñünrrü naqui itopiquiche cuamatü aparimia saübuñü bama israelitarrü auqui Jerusalén y auquina ito. Namatü que tiene que aconti.

²⁵ Chauqui tütusio iñemo, champü nipünatenti nauqui ataboriti. Pero rranrrti na acurratati yarusürürrü yüriaburrü César aübuti. Sane nauquiche irrancia icüpuruti esati. ²⁶ Pero arrüñü caüma chütusiopü iñemo isane surapoboiboñü ümoti César icütüpüti naqui ñoñünrrü. Sane nauquiche iquiacati tauna aesacü, arrücü yüriaburrü Agripa, y aubesa ito namanaiña bama maquiataca abaca auna. Amonsoi nurria nurarrti, nauqui aburaboi isucarüñü isane arrüna corobobo sobi ümoti César. ²⁷ Churriampü te rracüpu ümoti taman preso, arrtü chüsurapoipü arrüna nipünatenti.

Arri Pablo urapoiti isucarüti yüriaburrü

Agripa arrüna pasabo ümoti

26 ¹ Auqui nanti Agripa ümoti Pablo:

—Puerurrü anitaca caüma atacucüatote.

Arri Pablo iquiampetati nipiarrti, na atusi que rranrrti anitati. Nanti sane:

² —Ipuçünunca nurria, itopiqui puerurrü rranita caüma ichacuñüantoe asucarücü, yüriaburrü Agripa, nauqui iñumu nurarrüma bama israelitarrü iñemo. ³ Arrücü tusio nurria aemo nanaiña arrüna yacheatarrüma bama israelitarrü y nanaiña arrüna nuratoquiquirrimia. Asamu nurria iñemo, onsapesio baeta arrüna nisura.

Nisüboriquirrti Pablo nauquiche

chicocorotitiquipü Jesús

⁴ Tusio ümo namanaiña bama israelitarrü causane nisüboriqui tücañe eanama taha au Jerusalén nauquiche yaürrüñüqui. ⁵ Abomainqui bama isuputaramañü tücañe. Arrüma puerurrü uraboimia asucarücü, arrtü rranrrüma. Arrüñü tücañe arucu nurria iñemo nirranauncu ümoti Tuparrü, itopiqui fariseorüñü. Arrübama fariseorrtü tarucu ñacoconauncurrüma ümo nüriacarrü. ⁶ Pero caüma yaca auna nauqui acurrta saübuñü, itopiqui na urabomañü. Urabomañü itopiqui

icocota arrüna nurarrti Tuparrü tücañe ümo bama uyaütaiqui. Yarrüperaca nauqui acoco manu nurarrti Tuparrü, arrtü süboricoma tato uiti bama coiño. ⁷Arrüna noesa genterü Israel omeanaqui ba doce familiarrü barrüperarama ito na acoco nurarrti Tuparrü. Arrüma arucu ümoma yaserebiquirrimia ümoti Tuparrü, naneneca y tobiquia. Pero caüma, señor yüriaburrü, namatü que arrüñü ane nipüinate itopiqui yarrüperaca na acoco manu nurarrti Tuparrü. ⁸¿Aensapiü ane nomünantü sobi, itopiqui icocota arrüna süboricoma tato bama coiño? ¿Causanempü aucütobü, arrtü uiti Tuparrü süboricoma tato bama coiño?

Nauquiche mataquisünumacanatiqui Pablo ümo bama icocoromati Jesús

⁹Arrüñü tücañe ichüboriquiatü ümoti Jesús, naqui auqui Nazaret. ¹⁰Sane isamute tücañe au Jerusalén. Rranquiquia isüriacabo pünanaqui bama üriatu sacerdoterrü. Sürümanama bama icocoromati Jesús süroma au preso sobi. Urriampae inemo arrtü taborioma. ¹¹Taquisürüma sobi au ba poca sinagoga, nauqui anitama chomirriampatai ümoti Jesús sobi. Tücañe tarucapae nichübori. Yacatito ubau piquiataca puebluca isiuma.

Urapoiti tatito Pablo niquiampiaca nisüboriquirrti

¹²Sane nauquiche yerotü au Damasco, yacüpucurrti yarusürürü sacerdoterrü inemo, itopiqui uiti ane nisüriaca. ¹³Onsoi nisura, señor yüriaburrü. Anancañü isü cutubiurrü, toce, yasacatü ümo tarucapae nanentarrü auqui napese, manrrü tarucapae pünanaqui nicua surrü. Cuara ichupecuñü y itupecu bama isumpañeru. ¹⁴Enterurrü somü suipiaquiquia yuchacuqui cabayuca. Auqui ñoncoi manitacarrü inemo auqui hebreo, nantü sane: “Saulo, Saulo, ¿causane atüboriquiatü inemo? Churriampü arrüna nachüicoi aemoantoe, tacana arrone buyese bapateara icutacu mapirrumuturrü”. ¹⁵Auqui inumu: “¿Ñacucü, Señor?” Nanti Señor: “Arrüñü Jesús, naqui ümoche atüboriquiatü. ¹⁶Atüisai. Itusiancacañü asucarücü, nauqui aserebi inemo, y nauqui uraboi ito arrüna asacañü one, y arrüna itusiancata asucarücü ñana. ¹⁷Itaesiumuncü ñünana bama israelitarrü y ñünana bama ito chütüpü israelitarrü. ¹⁸Icüpucü eanama nauqui atusi ümoma, y nauqui aiñocomo nomünantü, y aye uimia eana nanentarrü uiti Tuparrü. Obi ito taesüburuma pünanaqui nüriacarrti Satanás (naqui choborese), nauqui aserebimia ümoti Tuparrü. Rrimiacana tato nomünantü uimia. Torrio ñana ümoma nicuarrüma sobi ichepe namanaiña bama maquiataca icocoromañü, bama samamecanama ümoti Tuparrü”.

ICOCOTATI PABLO NURARRTI SEÑOR

¹⁹Sane nauquiche, señor yüriaburrü Agripa, icocota nurria arrümanu manitacarrü auqui manu quiatarrü niyasata. ²⁰Surapoi nurarrti Tuparrü primero isucarü bama pohoso au manio puebluca Damasco y Jerusalén. Auqui

taha surapoi au manu cürri Judea, y auqui taha yerotü esa bama chütüpü israelitarrü. Sucanañü ümoma: “Apíñorroncosaño, apicoñoco nausüboriqui aübuti Tuparrü. Apisamuse arrüna urria, na atusi, ta chauqui tapiñorroncocaño”.²¹ Itopiqui arrüna sane nirranitaca iñenomañü bama israelitarrü au niporrti Tuparrü, nirrancarrüma aitaabairomañü. ²²Pero arrti Tuparrü bayurarati iñemo. Sane nauquiche yaca auna, isüboriquiaiqui. Surapoi arrüna manitacarrü isucarü namanaiña macirrtianuca, isucarü bama ane nüriacarrüma y isucarü bama ito maquiataca. Isiatai nisura tacana nurarrüma bama profetarrü tücañe, y nurarrti Moisés. ²³Urapoimiaticau arrüna nitaquisürücürri Cristo y arrüna cusürüboti süboricoti tato eanaqui macoñoca. Sane na atusi ümo bama israelitarrü y ümo bama ito chütüpü israelitarrü, ta puerurrü ataesübuma eanaqui nomünantü.

Arrti yüriaburrü Agripa mapensarati aicocorotiti Jesús

²⁴Numo manitanati Pablo itacutiatoe sane, tosibicoti Festo, nanti:

—Arrücü Pablo anitacatai. Mameso napensaca ui tarucu estudiorrü obi.

²⁵Pero arrti Pablo nanti:

—Champürrtü rranitacatai, señor Festo. Urria niñapensaca, itopiqui ñemanauntu arrüna nisura. ²⁶Arrti yüriaburrü Agripa tusio nurria ümoti nanaiña arrüna sucanañü. Sane nauquiche ümoti arrüna nirranitaca. Arrti artaiti y oncoiti te nanaiña arrüna pasabo, itopiqui champürrtü anecanatai. ²⁷Arrücü yüriaburrü Agripa, ¿aicocota nurarrüma bama profetarrü tücane? Tusio te iñemo, ta aicocota.

²⁸Auqui nanti Agripa ümoti Pablo:

—Tüsaipü yatache obi nauqui icocorotito Jesús.

²⁹Aiñumuti Pablo:

—Rreanca te ümoti Tuparrü atacucü nauqui contoatai aca tacana arrüna niyaca. Champürrtü irrancapü nauqui aca au preso tacanañü, pero irranca te nauqui aicocoroti Jesús tacanañü. Champürrtü arrücüatai, sino namanaiña bama aboma auna achepecü.

³⁰Auqui atüraiti Agripa ichepeti Festo y Bernice y bama maquiataca.

³¹Süromatü auqui manu local. Baparioma aübumantoe, namatü:

—Arrti naqui ñoñünrrü champü nipünatenti nauqui ataboriti, ni nauqui aürotipü au preso.

³²Arrti Agripa nanti ümoti Festo:

—Abu puerurrüpü aitaesümunucati naqui ñoñünrrü, arrtünampü chiñanquitiotipü aürotitü esati yarusürürü yüriaburrü César.


Icüpurumati Pablo au Roma

27 ¹Tirranrrüma aicüpurumati Pablo au Italia. Sane nauquiche torrioti ümoti maniqui taman capitán, nürirrti Julio. Arrti auqui manu batallón nürirri Augusto. Torrioma ito bama maquiataca preso ümoti. (Arriñü Lucas yecatito ichepema.) ²Somecatü au taman barco auqui Adramitio, niyücürri

au manio puebluca abe abeu narubaitu turrü au manu cürrü Asia. Somecatü. Sürotitito suichepe Aristarco, naqui auqui Tesalónica au manu cürrü Macedonia. ³Au quiatarrü nanenese sopiñatai esa manu pueblurrü Sidón. Artti capitán Julio bien buenurrti aübuti Pablo. Torrio uiti nauqui aüroti acü auqui barco na apaseati ümo bama nesarrti amigorrü au Sidón. Arrüma macumananama ümoti arrüna necesitaboti ümo nesarrti viajerrü. ⁴Auqui manu somecatito. Supapasaca bien auqui saimia nurria manu cürrü cümüinta turrü nürirri Chipre, tusio auna sane ümo nepaurrü. Au na narücüquirri chümaquiütücapü fuerte. ⁵Auqui sopitompücata manu narubaitu turrü, somequi ñome manio cüca Cilicia y Pamfilia. Sopiñatai au manu pueblurrü nürirri Mira au manu cürrü Licia.

⁶Acamanu artti capitán tabüco uiti taman barco auqui Alejandría, niyücürrü ümo Italia. Somecatü uiti au manu barco. Somecatito. ⁷Masamuñatai somequi. Bupasao sürümana naneneca. Apenarrü sopiñanai saimia manu pueblurrü nürirri Gnido. Maquiütücaiqui suisümenu, sane nauquiche somecatü ümo mancarrü. Sopiñatai abeu manu cürrü cümüinta turrü, nürirri Creta. Suipiasaca auqui manu nürirri Salmón. ⁸Cuerrtarrü somenotü isiuqui nabeu manu cürrü Creta. Au nitacürurrü sopiñatai au taman puertorrü nürirri “Coñorrtai”, ane saimia manu pueblurrü Lasea.

⁹Tütabe sürümana naneneca sobesa viajerrü. Tüsai aiñanai nitiempo maquiütürrü, anche peligrosorrü viajerrü isuqui turrü. Auqui artti Pablo macuansomoconoti ümo bama maquiataca au barco, ¹⁰nanti ümoma:



(Hch. 27.2)

—Mañoñünca, mejor basiquia auna. Arrtü üicatito, rrepente ensoro barco usaübu y aübu niquiacarrü.

¹¹Pero arrti capitán Julio chicocotatipü nurarrrti Pablo. Manrrü oncotitü ümoti maniqui esache manu barco y ümoti maniqui manejabo. ¹²Arrümanu puertorrrü nürirri Coñorrtai champürrtü urria nurria ümoma na asioma acamanu enterurrü nitiempo maquiütürrü. Tüsaipü namanaiña chepatai ñapensacarrüma nauqui somenotito auqui manu. Rranrrüma aiñanaimia au manu quiatarrü puertorrrü au manu cürrü Creta, nürirrti Fenice, itopiqui acamanu chümaquiütücapü fuerte auqui ba torrrü nitoripiacü tansürü.

Unantü napese, nacarrüma isu turrrü

¹³Auqui iñatai pario mancarrü. Arrüma caüma ñaquioncorrüma puerurrü aiñanaimia au Fenice. Auqui itononioma ape manio cüboca yerurrü, arrüba uiche tochenco barco. Somecatü isiuqui nabeu manu cürrü Creta. ¹⁴Pero contoatai maquiütüca fuerte auqui manu cürrü Creta. Arrümanu maquiütürrü nürirri uimía “Nitoripiacü Tansürü”. ¹⁵Chüpuerurrüpü manrrü aüromatü aübu barco auna cauta rranrrüma. Peoro barco au narubaitu turrrü ui maquiütürrü. ¹⁶Supapasaca auqui manu cüma cümüinta turrrü, nürirri Clauda, ane ümo maquiütürrü. Acamanu champürrtü tarucapae maquiütürrü. Sane nauquiche puerurrü sopiñe manu canoarrü arrüna tonono isiu barco. Pero corrtabapae suiñemo. ¹⁷Sopitonota au barco. Auqui quiñoeno barco uimía oboi tucumaca, tapü iñarrio ui turrrü, itopiqui tarucu nipococo turrrü ui maquiütürrü. Birrubuma ito tapü iñataimía ui maquiütürrü onü manu cüosorrrü quiurubatai ane abeu manu cürrü Libia. Arrümanu cürrü Libia ane topü narubaitu turrrü. Iquiaübutama ba belaca uiche amenco barco. Auqui caüma chebatai uimía, nauqui aürotü barco ui maquiütürrü. ¹⁸Tarucu suichaquisürücü uirri. Au quiatarrü nanenese yarutaübutama au turrrü cümüinta niquiaca barco. ¹⁹Au manu tercer nanenese yarutaübutama ito au turrrü nanaiña erramientorrrü y nanaiña arrüba abe au barco, tapü umianeneiqui. ²⁰Omenotü naneneca. Ünantatai napese, chütusiopü surrü ni norrtöñecapü. Maquiütücaiqui fuerte, y tarucapae ito nipococo turrrü. Au nitacürurrü suisucheca, chauqui chüsupapensacaiquipü nauqui suisübori.

²¹Chauqui tüsürümana naneneca chüsubacapü. Auqui atüraitü Pablo eanama, nantü ümoma:

—Mañoñünca, ¿causanempü chapicocotapü nisura numo sucanañü aume tapü oecatü auqui Creta? Uirri caüma utaquisürüca auna, y chauqui tensoro chama noñenarri oñopünanaqui. ²²Pero caüma, tapü ane penarrü aboi, itopiqui champüti coiño au na barco. Tapü arrüna barco tiene que añarri. ²³Itopiqui arrüñü rranaunca ümoti Tuparrü, yaserebiquia ümoti. Nütoba cuati yesañü taman ángel esaquiti, ²⁴nanti iñemo: “Tapü airruca, Pablo. Tiene que anitaiqui isucarüti yarusürürrü yüriaburrü César. Arrti Tuparrü bayurarati aume, tapü anati naqui coiño eanaqui bama acumpañeru au barco”. Tone nurarrrti iñemo. ²⁵Sane nauquiche, tapü aupirruca, mañoñünca. Tusio nurria iñemo, itopiqui ñoncatü

nurria ñmoti Tuparrü. Pasao caüma isiu arrüna nurarrti ññemo. ²⁶Contoatai tiene que uññanai ui maquiütürri esa taman cürri ane cümüinta turrü.

²⁷Tütabe catorce naneneca subaca isu manu narubaitu turrü nürirri Adria ui manu maquiütürri. Au manu tobirri ñaquiönccörüma bama batrabacara au barco, que tüsubaca saimia cürri. ²⁸Auqui ññemecatama au turrü taman canrri tomoeno icutacu pita, na atusi notüicürri. Ane treinta y seis metros. Manrri tahiqui merirao tatito, ane veintisiete metros. ²⁹Birrubuma, tapü sürotü barco ubuturu canca ui maquiütürri y ui nipococo turrü. Sane nauquiche ññemecanioma manio cuatro cüboca yerrurrü motomoeno yucutacu tucumaca, iyoto barco, nauqui atoché. Auqui meaboma nauqui anene conto. ³⁰Tapü arrübama batrabacara au barco rranrrüma aesüboma auqui barco au manu canoarri. Mapañama rranrrüma aiññemecanioma cüboca icutacuqui barco, abu ññapanturrüma, abu ññatama canoarri isiu turrü. ³¹Auqui nanti Pablo ñmoti capitán y ñmo bama masortaboca:

—Arrtü süromatü auqui barco manuma maññünca, auconca nanaiña arrañö.

³²Auqui süromatü bama masortaboca aittüsünanioma manio tucumaca uiche ananca tomoeno canoarri. Sane caüma sürotü canoarri pünanaquimia.

³³Barrüperaramainqui nauqui anene. Arrti Pablo manitanati nurria ñmoma, nanti:

—Auba caüma, chauqui tabe catorce naneneca chaubacapi, nabaca isu na turrü aübu tarucu naupirru. ³⁴Sucanañü aume, auba na ane naucusüu, nauqui puerurrü autaesübu. Nanaiña arrañö caüma urria nabaca, champü causane.

³⁵Chauqui ññanitarri ñmoma, ññentati pan. Machampienanati ñmoti Tuparrü isucarüma, chepesünana pan uiti, basoti. ³⁶Auqui arucu pario ñmo namanaiña bama maquiataca. Basoma ito. ³⁷Arrüna sububiqui au barco doscientos setenta y seis. ³⁸Numo tabecoma, yarutaübutama au turrü nanaiña manu trigo, niquiaca barco, tapü umianeneiqui.

Ubacara barco

³⁹Numo tütaneneca, tusio cürri. Ane cüosorrü isiu nabeurrü. Chisuputacaipüma manu cürri. Rranrrümapü caüma aüromatü eana manu cüosorrü aübu barco. ⁴⁰Botüsüro uimia ba tucumaca apüche abe motomoeno manio cuatro cüboca yerurrü. Omoncono eana turrü. Icoñcotama manio torrü rremorrü uiche manjaboma barco. ññatama ito ape taman vela, nauqui aürotü barco ui maquiütürri, somequi caüma ñmo manu cüosorrü. ⁴¹Rrepenteatai ññatai barco eana cüosorrü, auna cauta chotüsapi. Sürocütu nurria niñau barco, pero auna iyoto masamuña aññarri ui na tarucapae nipococo turrü. ⁴²Arrübama masortaboca caüma rranrrümapü aitaibairoma namanaiña bama preso, tapü besüburuma auqui barco yatucurrüma hasta isiu nabeurrü. ⁴³Pero arrti capitán Julio chirranrrtipü na aconti Pablo. Sane nauquiche chütorriopü uiti na aisamunema sane bama masortaboca. Más bien bacüpuruti ñmo bama ipiacama atuma, nauqui atobüma eana turrü auqui barco, nauqui atuma hasta nabeurrü. ⁴⁴Arrübama maquiataca süroma omonü

tauraca y arrüba nipearrtu barco nauqui aïñanaimia ito hasta nabeurrü. Sane nauquiche namanaiña iñataimia isiu nabeurrü, champüti naqui coïño.

Anati Pablo au manu cürrü Malta

28 ¹Numo turria tato supaquionco, sopiplate nüri manu cürrü cümüinta turrü, nürirri Malta. ²Arrübama pohoso acamanu quiatarrü ñanitacarrüma, pero manquioma nurria suiñemo. Maunrrimianama pese chama suiñemo, itopiqui rrobeoca, tarucu rrimianene suiñemo. ³Auqui arrti Pablo macanati niyupa sueca, nauqui aïñanti oto pese. Au manu rratorrü tobüco noirroborrü omeanaqui ui nipequi pese. Ositot neherrti. ⁴Acamanu bama pohoso ane nituparrüma, nürirri “Bacurrtacarrü”. Numo asaramatü ümo manu noirroborrü ane apü neherrti Pablo, namatü ümomantoe:

—Artri naqui ñoñünrrü canapae yatabayorrti. Taesüburuti eanaqui turrü, pero caüma arrüna tuparrü Bacurrtacarrü chirranrrüpü na asüboriti naqui ñoñünrrü.

⁵Pero artri Pablo yarutaübutati oto pese manu noirroborrü. Champü yacheurrü ümoti. ⁶Arrübama maquiataca barrüperarama caüma arrtü quichusabo neherrti, arrtü coïñoti uirri. Tücoboï yarrüperacarrüma, urriainqui ümoti Pablo. Auqui campiabo ñapensacarrüma, namatü caüma:

—iCanapae tupartri naqui ñoñünrrü!

⁷Acamanu saimia ane taman nerrtancia. Artri maniqui esache yüriaburrti au manu cürrü Malta, nürirrti Publio. Yasuriuruti somü. Yasaparati somü ñome trerrü naneneca. ⁸Au manio naneneca artri yaütoti Publio orro cübobiti, pacütayoti. Auqui artri Pablo sürotitü esati. Meaboti itacuti. Iñatati neherrti itati. Auqui urriancati tato. ⁹Ui arrüna sane cuamatito bama maqiataca maunrocono eanaqui bama pohoso auqui manu. Arrüma ito urriancama tato uiti Pablo. ¹⁰Sane nauquiche tarucu suisua ümoma. Numo tüsuirranca somenotito auqui manu, macumananama suichapiquibo.

Iñataiti Pablo au Roma

¹¹Trerrü panca subaca au manu cürrü Malta. Ane acamanu taman barco auqui Alejandría, itopiqui chüpuerurrüpü viajabo isuqui turrü arrümanu nitiempo rrimianene y tarucu maquiütürrü. Arrümanu barco nürirri “Bama Matocaca”. Numo tüpasao nitiempo maquiütürrü, somecapo au manu barco. Somenotito auqui manu isuqui turrü. ¹²Sopiñatai au manu pueblurrü Siracusa. Subaca acamanu ñome trerrü naneneca. ¹³Auqui manu somenotito isiuqui nabeurrü. Sopiñatai esa manu pueblurrü Regio. Au quiatarrü nanenese bausüciro pario auqui mancarrü. Uirri sopiñatai au manu pueblurrü Puteoli iyau torrü naneneca. ¹⁴Acamanu sopicuñucama bama icocoromati Jesús. Namatü suiñemo:

—Abasiquia auna sobesa ümo taman semana.

Auqui subasiquia esama ümo taman semana. Auqui manu somecatü acü au manu pueblurrü Roma. ¹⁵Arrübama suisaruquitaqui au nürirrti Jesús

au Roma toncoimia, tiene que sopiñanai esama. Cuamatü suisümenu hasta manio poca, nürirri Foro de Apio y Trerrü Taverna. Numo asaratitü Pablo ümoma, machampiencanati ümoti Tuparrü, pucünañati, auqui arucu tato ümoti. ¹⁶Sane sopiñatai au Roma. Torrio ümoti Pablo na aviviti au taman porrü aübuti taman sortaborrü, nauqui acuirati itacuti.

Manunecanati Pablo au Roma

¹⁷Bupasao trerrü naneneca. Auqui tasuruma uiti Pablo bama üriatu bama israelitarrü au Roma. Iñataimia esati. Manitanati Pablo ümoma, nanti:

—Bueno, bama masaruquитай, arrüñü champü causane sobi ümo noesa genterrü Israel, ni rranitapito churriampü ñome arrüba nesarrüma costumberrü bama uyaütaiqui tücañe. Pero ta iñenomañü manuma mayüriabuca au Jerusalén. Itorrimianamañü ümo bama rromanorrü. ¹⁸Arrüma bacurratama saübuñü. Auqui rranrrümapü aiñemecanamañü, itopiqui champü isane nipüinate nauqui aítabajomañü. ¹⁹Pero arrübama israelitarrü chichüüpümacü. Sane nauquiche sucanañü: “Irranca yerotü esati yarusürürrü yüriaburrü César, na acurratati saübuñü”. Pero champürrtü irranca suraboma bama niyesa genterrü Israel isucarüti César. ²⁰Sane nauquiche rraemeca abapa, nauqui rrapari abaübu. Itopiqui arrüñü yaca au preso auqui naca arrüna icococati Cristo, naqui ümoche barrüperaca, arroñü bama israelitarrü.

²¹Auqui namatü ümoti:

—Champürrtü bacüpuruma suiñemo quichonimiacarrü auqui Judea aübu manitacarrü aemo, ni aiñanaimiapü bama suisaruquитай auqui taha, uraboimia arrüna ünantü obi. ²²Pero suirranca te atusi suiñemo isane arrüna nanunecaca. Somoncoi que ünantü ümo macrirrtianuca, uratoquioma ümo bama icocotama au nanaiñantai.

²³Auqui iñocotama ümo quiatarrü nanenese arrümanu sane. Au manu nanenese iñataimia bama israelitarrü sürtümanama esati Pablo. Arrti manitanati ümoma. Comensaboti anitatu auqui tansürü hasta au tobirri. Urapoiti isucarüma arrüna causane arrtü üriabucati Tuparrü oemo. Leheboti isucarüma arrüna nüriacarrü corobo uiti Moisés y Nicororrü ui bama profetarrü tücañe, nauqui puerurrüma aicocoromati Jesús. ²⁴Aboma eanama bama icocotama nurarrti, tapü arrübama maquiataca chicocotapüma. ²⁵Sane caüma chichepepü ñapensacarrüma. Tirranrrü aüromatü auqui manu. Auqui nanti Pablo ümoma:

—Ñemanauncurratoe nurarrti Espíritu Santo ümo bama uyaütaiqui turuquiti profetarrü Isaías tücañe. Nanti sane:

²⁶Sane nanti Tuparrü:

Acosi esa na genterrü, ucanü ümoma sane:

Amonsapecatai, pero chiyebopü aboi.

Amasacatü, pero chamarrtaipü.

²⁷Itopiqui arrübama macrirrtianuca chirranrrüpüma acoconauma.

Cuestarrü ümoma onsaperioma nurarrti Tuparrü, tacanarrtü
iñamatama nirrtorrüma, tapü asaramatü, y itamurriquiata ito
numasurrüma, tapü oncoimia.

Chiyebopü uimia nísura.

Sane nauquiche champürrtü ñorronconomacü, arrüñü Tuparrü
chüpuerurrüpu rracura ümoma.

²⁸Nantito Pablo:

—Suraboirä ausucarü arrüna sane: Taesüburuma caüma uiti Tuparrü
bama chütüpü israelitarrüma. Arrüma te icocotama nurarrti.

²⁹Auqui süromatü esaquiti Pablo bama israelitarrü, nuratoquiquirrimia
ümomantoe.

³⁰Artri Pablo bavivicoti au manu porrü ñome torrü añoca. Champüti
naqui asioti icuatati. Buenurrti ümo namanaiña bama cuamatü
apasearamati. ³¹Urapoiti isucarüma nanaiña arrüna nüriacartri Tuparrü
aübu narucurrü ümoti. Urapoitito que artri Jesús Señorti.